

MESYUARAT KEDUA, PENGGAJAL KELIMA
PARLIMEN KEEMPAT BELAS
2022

HARI ISNIN : 25 JULAI 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 8, 11 HINGGA NO. 104)**

**[SOALAN NO. 8 DIJAWAB BERSEKALI DENGAN
SOALAN NO. 50]**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI DR. MUJAHID BIN YUSOF RAWA
[PARIT BUNTAR]**

TARIKH : 25 JULAI 2022 (ISNIN)

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **MENTERI SUMBER MANUSIA** menyatakan berapa jumlah majikan yang didakwa tidak mematuhi Perintah Gaji Minimum 2022 yang berkuat kuasa mulai 1 Mei 2022.

JAWAPAN

Tuan Yang di-Pertua,

Izinkan saya menjawab soalan **NOMBOR 8** daripada YB Parit Buntar bersekali dengan soalan **NOMBOR 50** daripada YB Lenggong.

Sehingga **30 Jun 2022** masih belum ada majikan yang didakwa kerana gagal mematuhi Perintah Gaji Minimum 2022. Ini kerana, gaji bulan Mei 2022 hanya mula diterima oleh pekerja pada **awal bulan Jun 2022**.

Statistik majikan yang telah mematuhi dan tidak mematuhi Perintah Gaji Minima 2022 masih tidak dapat disediakan berikutan kuat kuasanya perintah tersebut pada **1 Mei 2022** dan pematuhan hanya dapat dikenal pasti melalui pemeriksaan berkanun.

Penangguhan kuat kuasa gaji minimum RM1,500 sebulan hanya terpakai kepada majikan yang menggajikan kurang **5 orang pekerja**.

Ini adalah bagi memberi peluang kepada majikan kategori ini membuat persediaan sewajarnya. Kerajaan melalui Kementerian Sumber Manusia telah memutuskan tiada penundaan diberi kepada mana-mana sektor ekonomi atau jenis pekerjaan.

Ini kerana, bantuan kepada majikan melalui pakej bantuan COVID-19 seperti Program Subsidi Upah telah berupaya mengekalkan perniagaan dan pekerjaan.

Bagi memastikan semua pekerja di Malaysia mendapat manfaat daripada Perintah Gaji Minimum 2022, Jabatan Tenaga Kerja Semenanjung Malaysia sentiasa menjalankan pemeriksaan berkanun atau pemeriksaan mengejut ke atas majikan.

Sehingga 30 Jun 2022 sebanyak **20,452** majikan telah diperiksa. Bagi bulan Jun 2022 sahaja sebanyak **3,049** tempat pekerjaan telah diperiksa diseluruh negara.

Selain daripada itu, Jabatan Tenaga Kerja Semenanjung Malaysia juga akan menjalankan siasatan sekiranya aduan diterima dari pihak pekerja.

Pada bulan Jun 2022, Tenaga Kerja Semenanjung Malaysia telah menerima sebanyak **157** aduan berkaitan dengan pelaksanaan Perintah Gaji Minimum 2022. Hasil siasatan mendapati **118** majikan tidak mematuhi Perintah tersebut.

Nasihat telah diberikan kepada majikan untuk mematuhi. Sekiranya gagal, tindakan perundangan akan diambil ke atas mereka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG
SAUNI [SIBUTI]**

TARIKH : 25 JULAI 2022 (ISNIN)

SOALAN

TUAN LUKANISMAN BIN AWANG SAUNI [SIBUTI] minta **MENTERI PENGANGKUTAN** menyatakan apakah langkah Kerajaan menangani kos logistik terutama dalam penghantaran kontena yang merupakan punca kenaikan kos pembinaan dan harga barangan di Sarawak dan Sabah naik mendadak.

JAWAPAN

Tuan Yang Di Pertua,

1. Peningkatan kos penghantaran kontena merupakan realiti yang berlaku di seluruh dunia dan Malaysia adalah tidak terkecuali. Ini berlaku ekoran pandemik COVID-19 yang mana telah memberi kesan kepada keseluruhan rangkaian bekalan, bukan sahaja di Sabah dan Sarawak, tetapi di seluruh dunia. Di samping itu, seperti yang dinyatakan sebelum ini, kos pengangkutan juga dipacu oleh permintaan pasaran (*market-driven*) dan Kerajaan tidak menetapkan sebarang kawalan kepada kos pengangkutan.

2. Semakan Kementerian mendapati kenaikan kos penghantaran adalah sebanyak RM1,318.00 bagi kontena bersaiz 20 kaki (1 TEU) dan RM2,526.00 bagi kontena bersaiz 40 kaki (2 TEU) iaitu 35% kenaikan secara keseluruhan.

SOALAN NO: 11

3. Walau bagaimanapun, kenaikan kos penghantaran kontena ini bukanlah faktor utama kenaikan kos pembinaan dan harga barang di Sabah dan Sarawak.
4. Kerajaan mengambil berat mengenai isu ini dan usaha-usaha bagi mengurangkan kos pengangkutan dilakukan menerusi pengurusan pergerakan kargo yang lebih efisien dan cekap di pelabuhan-pelabuhan utama negara.
5. Antaranya pihak Kementerian bersama pengendali-pengendali pelabuhan telah mengambil langkah-langkah:
 - a. memberi pengecualian (*waiver*) kepada *late gate in charges and replanning fees* kepada pengguna pelabuhan;
 - b. menyelesaikan isu kekurangan tenaga kerja akibat jangkitan COVID-19 dengan bantuan KKM dan pasukan SBCTP COVID-19; dan
 - c. meningkatkan kecekapan pengurusan pelabuhan untuk mengurangkan *vessel's turnaround time*.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 25 JULAI 2022 (ISNIN)

SOALAN

DATUK IGNATIUS DARELL LEIKING [PENAMPANG] minta **MENTERI KESIHATAN** menyatakan sama ada Projek Pembinaan Klinik Kesihatan Baru di Daerah Penampang (yang kerap kali diumumkan sejak 2013) akan dilaksanakan atau tidak dan apakah penyelesaian terhadap kekurangan pegawai Perubatan dan kesesakan di Poliklinik Daerah Penampang.

JAWAPAN

Tuan Yang di-Pertua,

1. Projek Klinik Kesihatan (Jenis 3), Penampang, Kota Kinabalu telah diluluskan di bawah Rancangan Malaysia Kesembilan (RMKe-9). Kelulusan projek ini pada awalnya hanya melibatkan skop kerja awalan (Fasa 1) iaitu rawatan tanah yang telah siap sepenuhnya pada 2 Jun 2015.

2. Namun begitu, Fasa 2 projek ini iaitu bagi skop kerja bangunan tidak dapat diteruskan berikutan tempoh yang terlalu lama untuk mendapatkan kelulusan Pelan Pembangunan (DP) dan Pelan Bangunan (BP) daripada Majlis Daerah Penampang (MDP). Susulan itu, projek ini telah dibatalkan pada 24 Oktober 2018 kerana proses

SOALAN NO : 12

perancangan yang mengambil masa terlalu lama iaitu selama sembilan (9) tahun.

3. Kementerian Kesihatan Malaysia (KKM) merancang untuk melaksanakan semula projek ini pada tahun 2021. Walau bagaimanapun, pelaksanaan Fasa 2 tersebut telah ditangguhkan bagi tujuan penambahan skop *Infectious Disease* (ID) dalam projek ini yang menyebabkan plan rekabentuk asal perlu dipinda.

4. KKM juga telah mengemukakan permohonan baharu bagi pelaksanaan Fasa 2 Projek Klinik Kesihatan (Jenis 3) Penampang, Sabah ini di bawah Rancangan Malaysia Kedua Belas, *Rolling Plan 3* (RMKe-12, RP3). Sekiranya permohonan ini diluluskan, projek ini boleh ditender secepat mungkin kerana penyediaan rekabentuk dan anggaran kos projek telah diselesaikan oleh Jabatan Kerja Raya Malaysia (JKR).

5. Klinik Kesihatan Penampang pada masa ini mempunyai dua (2) orang Pakar Perubatan Keluarga dan 14 orang pegawai perubatan yang memberikan perkhidmatan kesihatan. Bilangan ini mencukupi untuk memberi perkhidmatan yang menyeluruh di Klinik Kesihatan Penampang dengan kedatangan purata 524 pesakit sehari pada tahun 2021. Pada masa ini ruang di Klinik Kesihatan Penampang sememangnya tidak dapat menampung pertambahan bilangan pegawai perubatan dan ini menyebabkan bilik konsultasi menjadi sesak. Oleh itu, bagi menangani masalah ini, KKM komited bagi memastikan projek ini dapat diteruskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL (BUKIT GANTANG)**

TARIKH : 25.7.2022 (ISNIN)

SOALAN

DATO' SYED ABU HUSSIN BIN HAFIZ SYED ABDUL FASAL (BUKIT GANTANG) minta **MENTERI PEMBANGUNAN LUAR BANDAR** menyatakan peruntukan Kerajaan Persekutuan yang lulus pada tahun 2022 bagi kawasan Parlimen Bukit Gantang mengikut pecahan DUN untuk projek seperti bina baru Jalan Perhubungan Desa (JPD), baik pulih Jalan Perhubungan Desa (JPD), Ameniti Sosial dan Pemasangan Baru Lampu Jalan Kampung.

JAWAPAN

Tuan Yang Di-Pertua,

Untuk makluman Yang Berhormat, pada tahun 2022 sebanyak 31 projek Jalan Perhubungan Desa (JPD) berjumlah RM955 ribu dan 2 projek Program Ameniti Sosial (PAMS) berjumlah RM300 ribu telah diluluskan untuk pelaksanaan di kawasan Bukit Gantang.

Untuk makluman Yang Berhormat juga, tiada peruntukan yang diluluskan bagi pelaksanaan projek baharu di bawah Program Pemasangan Baharu Lampu Jalan Kampung (LJK) untuk tahun 2022. Peruntukan yang diluluskan pada tahun ini adalah bagi tujuan bayaran muktamad projek pemasangan LJK yang telah siap pada tahun 2021. Bagi pelaksanaan projek tersebut, Parlimen Bukit Gantang telah menerima sebanyak 390 unit LJK melibatkan kos sebanyak RM501,420.00.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK DR. HASAN BIN BAHROM
[TAMPIN]**

TARIKH : 25 JULAI 2022 (ISNIN)

SOALAN

YB DATUK DR. HASAN BIN BAHROM [TAMPIN] minta **MENTERI PERUMAHAN DAN KERAJAAN TEMPATAN** menyatakan sejauh mana Pelan Tindakan Aksesibiliti Orang Kurang Upaya dilaksanakan, apakah ada tindakan yang sewajarnya kepada pihak pengusaha yang tidak melaksanakan pelan tersebut, jika tidak, apakah Kementerian berhasrat untuk menguatkuasakan perkara ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa peka dalam memastikan semua bangunan/ premis baharu menyediakan infrastruktur lengkap bagi kemudahan Orang Kurang Upaya (OKU) seperti yang ditetapkan dalam Seksyen 34A, Undang-undang Kecil Bangunan Seragam 1984 (UKBS 1984). KPKT membuat pemantauan terhadap pewartaan UKBS oleh semua kerajaan negeri bagi memastikan pelaksanaan penguatkuasaan di peringkat Pihak Berkuasa Tempatan (PBT).

KPKT juga meningkatkan penguatkuasaan terhadap pemaju yang tidak melaksanakan atau melanggar undang-undang berkaitan reka bentuk sejagat. Antara tindakan yang telah dilaksanakan adalah seperti berikut:

- (a) memaklumkan kepada PBT mengenai pelaksanaan penalti dan penguatkuasaan terhadap ketidakpatuhan garis panduan dan Undang-Undang Kecil yang diperuntukkan; dan
- (b) mengemaskini rekod pelaksanaan penalti dan penguatkuasaan ketidakpatuhan terhadap Akta Jalan, Parit dan Bangunan, 1974 (Akta 133) dan UUK 34A (UKBS 1984) secara berkala sebanyak dua (2) kali setahun.

Untuk makluman Ahli Yang Berhormat juga, sebarang pemajuan yang gagal menyediakan kemudahan infrastruktur lengkap bagi kemudahan golongan OKU, boleh dikenakan denda tidak melebihi RM50,000 atau dipenjarakan selama tempoh tidak melebihi 3 tahun serta boleh dikenakan denda tambahan tidak melebihi RM1,000 bagi tiap-tiap hari kesalahan diteruskan.

Di peringkat PBT, penyediaan keperluan OKU bagi semua pembangunan adalah diwajibkan. Syarat kemudahan OKU ini dimasukkan di dalam surat Kelulusan Pelan Bangunan yang

mensyaratkan kemudahan OKU sebagaimana Akta Orang Kurang Upaya 2008 (Akta 685) dan Piawaian MS 1184:2014.

Di samping itu, KPKT juga telah melaksanakan Program Audit Aksesibiliti Kemudahan OKU setiap tahun di lima (5) buah PBT terpilih bagi melihat tahap pematuhan mengikut UUK 34A dan MS1184. Sejak tahun 2016 sehingga 2022, sebanyak 30 buah PBT telah diaudit yang melibatkan 59 buah premis. Bagi tahun 2022, Audit Aksesibiliti telah dilaksanakan di Majlis Daerah Rembau, Majlis Bandaraya Subang Jaya, Majlis Perbandaran Kubang Pasu dan Majlis Daerah Marang. Hasil dapatan dan cadangan penambahbaikan dimaklumkan kepada PBT untuk diambil tindakan penambahbaikan. Program audit ini juga melibatkan wakil-wakil NGO OKU sebagai salah seorang panel audit yang akan melakukan simulasi aksesibiliti bagi kemudahan-kemudahan OKU yang disediakan. Selain itu, audit susulan juga dilaksanakan bagi memastikan penambahbaikan yang telah dilaksanakan mematuhi MS1184.

Untuk makluman Ahli Yang Berhormat, semua PBT telah melaksanakan pelbagai usaha dan inisiatif dalam menyediakan pelbagai kemudahan bagi golongan OKU mengakses kepada persekitaran fizikal di bandar yang berkonsepkan reka bentuk sejagat. Selain itu, terdapat usaha PBT untuk meningkatkan tahap aksesibiliti dan kebolegunaan kemudahan pengangkutan awam kepada golongan OKU serta kemudahan-kemudahan lain yang memerlukan penglibatan OKU dalam pengurusan kehidupan harian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 25 JULAI 2022 (ISNIN)

SOALAN

TUAN STEVEN CHOONG SHIAU YOON [TEBRAU] minta **MENTERI SUMBER MANUSIA** menyatakan jumlah kekosongan pekerjaan di semua sektor dan industri setakat 30 Jun 2022 kerana kekurangan pekerja akan memberi impak negatif yang besar kepada pembangunan ekonomi negara. Sekiranya ianya berlaku, apakah strategi akan diambil oleh rakyat Malaysia untuk menggantikan pekerja asing.

JAWAPAN

Tuan Yang Di Pertua,

Berdasarkan statistik yang dikeluarkan oleh Sistem Insurans Pekerjaan, Pertubuhan Keselamatan Sosial (EIS, PERKESO) sehingga 24 Jun 2022, jumlah kekosongan pekerjaan yang dilaporkan bagi semua sektor dan industri adalah sebanyak 462,994 kekosongan.

Dalam usaha mengurangkan kebergantungan kepada guna tenaga asing, Kerajaan masih berpegang kepada dasar-dasar sedia ada yang memberikan keutamaan kepada penggajian pekerja tempatan seperti berikut:

SOALAN NO : 15

- i. menggalakkan sektor-sektor berintensifkan buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing dan mewujudkan peluang pekerjaan yang memerlukan kemahiran;
- ii. penggajian pekerja asing dari mana-mana negara sumber hendaklah berdasarkan kepada keperluan sebenar industri dan sektor-sektor yang dibenarkan sahaja;
- iii. syarat-syarat permohonan pekerja asing diperketatkan dari segi penetapan nisbah pengambilan berdasarkan komposisi pekerja tempatan dan pekerja asing;
- iv. hanya majikan yang berkeupayaan dan mematuhi standard perburuhan seperti pematuhan gaji minimum, menyediakan kemudahan penginapan beserta kemudahan asas dan tiada rekod pelanggaran kes buruh sahaja dipertimbangkan kelulusan pekerja asing. Keupayaan majikan ditentukan melalui proses saringan dan pemeriksaan Jabatan Tenaga Kerja;
- v. mengutamakan *exit policy* penggajian pekerja asing dengan menyediakan pelan latihan kemahiran kepada pekerja tempatan, memberi keutamaan kepada mekanisme *Industrialised Building System (IBS)* dalam sektor pembinaan, peralihan kepada intensif mekanisasi dan automasi, restoran berkonsepkan layan diri dan sebagainya;
- vi. program *Technical and Vocational Education and Training (TVET)* untuk warga tempatan diperkasakan bagi melahirkan individu berkemahiran tinggi selaras dengan hasrat Negara untuk beralih daripada industri berintensif buruh kepada *high end industry*; dan
- vii. pembiayaan latihan di bawah Pembangunan Sumber Manusia Berhad (PSMB) melalui caruman levi majikan untuk melatih semula pekerja bagi meningkatkan kemahiran pekerja.

Pada masa yang sama, beberapa dasar baharu dengan tujuan memperkukuhkan sebahagian dasar sedia ada juga telah dilaksanakan oleh Kerajaan, antaranya seperti:

- i. mewajibkan pengiklanan kekosongan jawatan untuk tempoh tidak kurang dari 30 hari di portal MyFutureJobs bagi tujuan pengambilan pekerja asing dan pegawai dagang (ekspatriat). Sekiranya tiada pengisian dari kalangan pencari pekerja tempatan dalam tempoh tersebut, barulah majikan dibenarkan membuat permohonan pengambilan pekerja asing dan pegawai dagang;
- ii. supaya jawatan petugas barisan hadapan (*Frontliners*) tidak dibenarkan kepada pekerja bukan warganegara; dan
- iii. Kementerian Sumber Manusia melalui Talent Corporation Malaysia Berhad (TalentCorp) (ILMIA) telah membangunkan *Critical Occupations List* (COL) yang bertujuan memberi penekanan terhadap kebolehpasaran tempatan dengan mengenalpasti kemahiran dan pekerjaan yang sukar dipenuhi merangkumi keperluan tenaga kerja mahir dan separa mahir. COL juga digunakan sebagai rujukan dalam mempertimbangkan kelulusan penggajian ekspatriat asing oleh pihak berkuasa yang terlibat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH JAWAB : 25 JULAI 2022 (ISNIN)

YB TENGKU ZULPURI BIN RAJA PUJI [RAUB] minta **MENTERI PERUMAHAN DAN KERAJAAN TEMPATAN** menyatakan rancangan dan dasar Kerajaan Pusat (KPKT) serta masa depan negara dalam aspek Kebenaran Merancang pembangunan setempat dengan perubahan iklim yang ketara serta taburan hujan yang lebat dan bertambah yang boleh mengakibatkan bencana alam seperti tanah runtuh, banjir yang menyebabkan kerugian berjuta-juta ringgit duit rakyat dan negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah menyediakan undang-undang, garis panduan dan pekeliling berkaitan dengan kawalan pembangunan sebagai panduan kepada Pihak Berkuasa Tempatan (PBT). Ia bertujuan untuk memastikan sebarang projek yang dibangunkan tidak akan mengakibatkan bencana seperti tanah runtuh dan banjir kilat di kawasan sekeliling. Peraturan tersebut telah mengambil kira aspek-aspek keselamatan, kesejahteraan awam dan kelestarian alam sekitar. Akta dan Undang-undang Kecil yang perlu dipatuhi oleh pihak pemaju sebelum sesuatu projek pembangunan dilaksanakan adalah seperti berikut:

- (i) Akta Jalan, Parit dan Bangunan 1974 (Akta 133);
- (ii) Akta Perancangan Bandar dan Desa 1976 (Akta 172); dan
- (iii) Undang-Undang Kecil Bangunan Seragam 1984 (UKBS 1984).

Untuk makluman Ahli Yang Berhormat juga, sebarang jenis pemajuan yang hendak dilaksanakan perlu mendapat Kebenaran Merancang yang diluluskan oleh PBT sebagaimana peruntukan Seksyen 20 di bawah Akta 172. PBT perlu memastikan pemaju mematuhi syarat-syarat agensi teknikal seperti Jabatan Kerja Raya (JKR), Jabatan Pengairan dan Saliran (JPS), Jabatan Alam Sekitar (JAS) dan lain-lain agensi yang berkaitan dalam mempertimbangkan sebarang kelulusan Kebenaran Merancang.

Selain itu, KPKT telah mengambil beberapa langkah bagi mengawal pembangunan di kawasan lereng bukit dan tanah tinggi. Antaranya, melaksanakan pindaan Seksyen 70 di bawah Akta 133 bagi tujuan meningkatkan tahap keselamatan struktur bangunan bertingkat dan cerun serta kualiti pembaikan jalan di kawasan PBT. Pindaan terhadap Seksyen 70 menyatakan bahawa sebarang pemajuan di kawasan kecerunan lebih dua puluh lima (25) darjah dan ketinggian lebih daripada sepuluh (10)

meter diwajibkan mengemukakan laporan geoteknikal yang ditentusahkan oleh Pemeriksa Bertauliah yang berdaftar dengan Lembaga Jurutera Malaysia.

KPKT juga telah mengeluarkan Garis Panduan Pengurusan Cerun pada tahun 2021 dan Garis Panduan Perancangan Pembangunan di Kawasan Bukit dan Tanah Tinggi pada tahun 2009. Garis Panduan ini bertujuan untuk memberikan panduan kepada Pihak Berkuasa Negeri (PBN) dan PBT untuk menyemak dan menyelaraskan pembangunan di kawasan bukit dan tanah tinggi berikutan daripada beberapa kejadian tanah runtuh di kawasan bukit dan tanah tinggi yang berkecerunan tinggi.

Bagi aspek pengurusan banjir, Manual Saliran Mesra Alam (MSMA) telah dikeluarkan oleh JPS. Manual ini bertujuan untuk membuat kawalan di punca dalam pengurusan air larian hujan dengan menggunakan kaedah takungan, tahanan dan resapan bagi mengurangkan atau memperlahankan bebanan terus air larian hujan ke sungai dan pada waktu puncak. Kaedah ini akan dapat mencegah atau mengurangkan risiko kejadian banjir kilat.

Sehubungan itu, Kerajaan telah mengambil langkah-langkah seperti di atas bagi memastikan projek-projek yang dibangunkan tidak menyebabkan berlakunya bencana alam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHIL BIN SHAARI
[PASIR MAS]**

TARIKH : 25 JULAI 2022 [ISNIN]

SOALAN

Minta **MENTERI BELIA DAN SUKAN** menyatakan perkembangan proses naik taraf Mini Stadium Pasir Mas yang telah diluluskan oleh Menteri terdahulu.

JAWAPAN

Tan Sri Yang Di-Pertua,

Untuk makluman Ahli Yang Berhormat, Kementerian Belia dan Sukan (KBS) telah mengangkat permohonan untuk menaik taraf Stadium Mini Pasir Mas di bawah *Rolling Plan* Ketiga (RP3), Tahun 2023 Rancangan Malaysia Kedua Belas (RMKe-12) dan tertakluk kepada kelulusan Unit Perancang Ekonomi, Jabatan Perdana Menteri (UPE, JPM).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB DR AZMAN BIN ISMAIL (KUALA KEDAH)

TARIKH : 25 JULAI 2022 (ISNIN)

SOALAN

DR AZMAN BIN ISMAIL (KUALA KEDAH) minta **MENTERI DALAM NEGERI** menyatakan tentang tempat-tempat tahanan imigresen: mohon dinyatakan semua tempat tahanan imigresen di Malaysia, jenis fasiliti yang ada di setiap pusat, jumlah kakitangan, kapasiti tahanan serta jumlah bajet khusus tahunan bagi pusat tahanan.

JAWAPAN

Tuan Yang Di Pertua,

Untuk makluman Ahli Yang Berhormat, Seksyen 51A Akta Imigresen 1959/63 memperuntukkan bahawa Ketua Pengarah Imigresen boleh menetapkan mana-mana tempat sebagai suatu depot imigresen untuk pemastian, pemeriksaan, penyiasatan atau penahanan orang-orang yang di bawah Akta Ini. Pada masa ini, Jabatan Imigresen Malaysia (JIM) menguruskan 18 buah depot imigresen dan tiga buah depot imigresen sementara dengan kapasiti keseluruhan seramai 21,150 orang.

Tahanan yang berada dalam depot imigresen merupakan tahanan reman daripada Jabatan Imigresen Malaysia bagi tujuan siasatan, pemastian dan pemeriksaan di bawah Akta Imigresen 1959/63 [Akta 155] dan juga tahanan atau banduan asing yang telah selesai menjalani hukuman penjara serta tahanan daripada agensi penguatkuasaan lain bagi tujuan pengusiran ke negara asal.

Antara fasiliti yang terdapat di depot imigresen termasuklah:

- (i) Blok tahanan mengikut pecahan jantina
- (ii) Blok kuarantin untuk tahanan
- (iii) Bilik rawatan
- (iv) Bilik perjumpaan untuk tahanan
- (v) Sudut rekreasi untuk kanak-kanak

Jumlah pegawai dan kakitangan yang ditempatkan di setiap depot imigresen bergantung antara lainnyanya kepada kapasiti sesebuah depot imigresen. Pada masa ini, JIM mempunyai 2,745 perjawatan untuk penugasan di semua depot imigresen seluruh negara. Pada masa yang sama, JIM turut dibantu oleh Jabatan Sukarelawan Malaysia untuk membuat kawalan perimeter luar di samping mempunyai dua orang Penolong Pegawai Perubatan Gred U29/32 jawatan kader untuk menguruskan perihai kesihatan tahanan daripada proses saringan awal, kes-kes ringan dan juga rawatan susulan. Manakala, bajet yang diperuntukkan bagi perbelanjaan mengurus tahun 2022 bagi depot imigresen berjumlah RM81,488,500 meliputi perbelanjaan utiliti, sewaan perkhidmatan bas untuk penghantaran pulang, sajian makanan tahanan dan sebagainya.

SENARAI DEPOT IMIGRESEN DI SELURUH MALAYSIA

BIL.	DEPOT	KAPASITI
1.	AJIL	900
2.	BELANTIK	950
3.	BEKENU	600
4.	BUKIT JALIL	1200
5.	JURU	500
6.	KEMAYAN	950
7.	KOTA KINABALU	2100
8.	KLIA	900

SOALAN : 18

BIL.	DEPOT	KAPASITI
9.	LANGKAP	800
10.	LENGGENG	1000
11.	MACHAP UMBOO	1000
12.	PAPAR	1500
13.	PEKAN NENAS	1250
14.	SEMENYIH	1250
15.	SEMUJA	600
16.	SANDAKAN	1500
17.	TANAH MERAH	550
18.	TAWAU	1500
19.	BERANANG (DEPOT SEMENTARA)	700
20.	BIDOR (DEPOT SEMENTARA)	700
21.	SUNGAI BAKAP (DEPOT SEMENTARA)	700
JUMLAH KAPASITI		21,150

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 25 JULAI 2022 (ISNIN)

SOALAN

DATO' HAJI MOHD FASIAH BIN HAJI MOHD FAKEH minta **MENTERI KESIHATAN** menyatakan setakat manakah kemajuan Pasukan Petugas Khas bagi Penambahbaikan Budaya Kerja Perkhidmatan Kesihatan (HWCITF) khususnya dari segi budaya kerja, pengurusan sumber manusia terutama melibatkan Pegawai Perubatan Siswazah (PPS) dan nyatakan langkah Kerajaan khususnya Kementerian Kesihatan Malaysia (KKM) bagi menghapuskan budaya kerja toksik di fasiliti-fasiliti kesihatan KKM.

JAWAPAN

Tuan Yang di-Pertua,

1. Pasukan Petugas Khas Bagi Penambahbaikan Budaya Kerja Perkhidmatan Kesihatan atau *Healthcare Work Culture Improvement Task Force* (HWCITF) telah ditubuhkan secara rasminya pada 13 Mei 2022. Objektif penubuhan pasukan khas ini adalah bagi:

- (i) menganalisis dapatan dan menilai:
 - a. budaya kerja;
 - b. pengurusan sumber manusia kakitangan perkhidmatan kesihatan;

- c. aspek masa dan beban kerja;
 - d. saluran aduan;
 - e. kepimpinan;
 - f. bimbingan dan latihan;
 - g. penyampaian perkhidmatan; serta
 - h. peluang kerjaya.
- (ii) mendapatkan input dan menganalisis maklumat berkaitan insiden kematian Pegawai Perubatan Siswazah (PPS);
- (iii) menyediakan laporan berkenaan penilaian dan cadangan penambahbaikan budaya kerja dan pengurusan sumber manusia kakitangan perkhidmatan kesihatan secara umum dan PPS secara khususnya dalam masa tiga (3) bulan dari tarikh penubuhan.

2. Bagi membolehkan kajian ini dilaksanakan dalam tempoh masa yang diberikan, Pasukan Petugas Khas telah dibahagikan kepada lima (5) kumpulan dengan memberi penumpuan kepada elemen berikut:

(i)	WG1 Pasukan Suara Kakitangan: Mengkaji Selidik Budaya Kerja	:	Melaksanakan Kaji Selidik <i>Healthcare Work Culture Improvement</i> bertujuan untuk mendapatkan maklum balas daripada pegawai dan kakitangan KKM berkaitan budaya kerja dalam perkhidmatan kesihatan di KKM, seterusnya melakukan analisis kajian.
(ii)	WG2: Pasukan Libat Urus Bersama Persatuan/Individu dan Mana-Mana Pihak Berkaitan	:	Melaksanakan libat urus bersama pemegang taruh (<i>stakeholders</i>) termasuklah Badan Bukan Kerajaan (NGO), persatuan, wakil universiti, individu dan lain-lain berkaitan

SOALAN NO. 19

			sektor kesihatan dan KKM bagi mendapatkan pandangan mengenai budaya kerja KKM secara holistik.
(iii)	WG3: Pasukan Menyemak Semula Proses Kerja dan Dasar Sedia Ada	:	<ul style="list-style-type: none"> ● Mengenal pasti sama ada polisi sedia ada lengkap, difahami dan dilaksanakan secara efektif; ● Mengesyorkan penambahbaikan kepada polisi, sistem dan prosedur serta menggariskan pelan tindakan; ● Menggariskan elemen penting bagi memastikan tadbir urus baik untuk saluran dan pengurusan aduan.
(iv)	WG4: Pasukan Menyemak Semula Kontrak PPS	:	Mengkaji dan menganalisis proses serta tatacara bagi pengurusan PPS dan Pegawai Perubatan (Lantikan Tetap dan Kontrak) merangkumi aspek penawaran kontrak, pelantikan, pelanjutan serta penamatan kontrak / perkhidmatan.
(v)	WG5: Pasukan Insiden dan Lawatan Kerja	:	<ul style="list-style-type: none"> ● Menganalisis laporan insiden kematian PPS di Hospital Pulau Pinang. ● Meneliti dan menganalisis aduan yang diterima oleh HWCITF. ● Melaksanakan lawatan penanda aras ke hospital awam KKM berkaitan bagi

			mendapatkan input berkaitan budaya kerja KKM di lapangan.
--	--	--	---

Tuan Yang di-Pertua,

3. Sebagai makluman, pada 27 Mei 2022 sehingga 10 Jun 2022, Pasukan Petugas Khas telah melaksanakan sesi soal selidik secara dalam talian berkaitan topik budaya kerja ke atas anggota perkhidmatan kesihatan KKM. Hebahan soal selidik dan peringatan kepada Pusat Tanggungjawab (PTj) telah dilaksanakan secara harian dalam tempoh 15 hari dan telah memperoleh sambutan dan maklum balas yang amat menggalakkan daripada 111,981 orang responden.

4. Selain daripada pelaksanaan sesi soal selidik bagi mendapatkan input berkaitan, sesi libat urus dan lawatan kerja telah dilaksanakan bermula pada 23 Mei 2022 dan berakhir pada 30 Jun 2022. Sesi libat urus telah diadakan bersama lima (5) agensi Badan Bukan Kerajaan (NGO) yang antaranya ialah:

- (i) *Malaysian Association of Medical Assistants;*
- (ii) *Malaysian Nurses Association (MNA);*
- (iii) *Association of Private Hospitals of Malaysia (APHM);*
- (iv) *Malaysian Medics International (MMI);* dan
- (v) Persatuan Perubatan Islam Malaysia (IMAM).

5. Libat urus juga turut diadakan bersama individu yang pernah memegang jawatan tertinggi di KKM, wakil daripada Doktor Hartal dan tiga (3) institusi pendidikan tinggi.

6. Berdasarkan kepada hasil maklumat yang diperolehi, Pasukan Petugas Khas kini dalam peringkat menganalisis dan menyusun atur penemuan bagi penyediaan laporan cadangan penambahbaikan budaya kerja perkhidmatan kesihatan yang komprehensif dan akan dibentangkan dalam masa terdekat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : DR. KELVIN YII LEE WUEN [BANDAR
KUCHING]**

TARIKH : 25 JULAI 2022 (ISNIN)

SOALAN

DR. KELVIN YII LEE WUEN [BANDAR KUCHING] minta **MENTERI PENGANGKUTAN** menyatakan langkah-langkah yang diambil untuk mengurangkan kes pembatalan, penangguhan dan penukaran masa jadual penerbangan untuk setiap syarikat penerbangan di Malaysia.

JAWAPAN

Tuan Yang Di Pertua,

1. Kod Perlindungan Pengguna Penerbangan Malaysia 2016 (*Malaysian Aviation Consumer Protection Code 2016*, MACPC) telah dikuatkuasakan oleh Suruhanjaya Penerbangan Malaysia (MAVCOM) mulai 1 Julai 2016. Kod ini bertujuan untuk melindungi hak dan kepentingan pengguna dengan memastikan semua aduan terhadap syarikat-syarikat penerbangan diambil tindakan dan diselesaikan.
2. Syarikat penerbangan yang menunda penerbangan atas faktor di bawah kawalan syarikat penerbangan seperti masalah operasi, komersial atau teknikal adalah tertakluk untuk pampasan dan penjagaan kepada penumpang sepertimana yang diperuntukkan di dalam MACPC.
3. Suruhanjaya Penerbangan Malaysia (MAVCOM) telah menjalankan siasatan awal dan kini sedang menjalankan siasatan secara mendalam terhadap syarikat-syarikat penerbangan termasuk syarikat penerbangan tambang murah berhubung dengan penundaan penerbangan semasa tempoh perjalanan Hari Raya Aidilfitri 2022. Tindakan selanjutnya akan diambil selepas proses siasatan selesai dijalankan.
4. Sekiranya syarikat penerbangan gagal mematuhi **MACPC**, MAVCOM boleh mengenakan penalti kewangan sebanyak amaun yang tidak melebihi RM200,000, dan ketidakpatuhan kedua atau berikutnya, amaun sepuluh kali daripada penalti kewangan yang dikenakan bagi ketidakpatuhan yang pertama. Dari tahun 2018 sehingga 2020, MAVCOM telah mengenakan penalti sebanyak RM4.72 juta ke atas kegagalan syarikat penerbangan dalam mematuhi pelbagai kesalahan di bawah MACPC.
5. Berdasarkan MACPC 2016, sekiranya penerbangan dibatalkan oleh syarikat penerbangan yang dikategorikan sebagai “**dalam kawalan**” syarikat penerbangan, sebagai contoh pembatalan atas sebab teknikal, atau kapasiti penumpang yang tidak memuaskan menyebabkan

penerbangan tersebut dilewatkan atau dibatalkan, maka berdasarkan Peraturan 12 MACPC 2016, penumpang hendaklah ditawarkan pilihan-pilihan berikut:

- (i) pembayaran ganti dalam masa 30 hari, daripada kos tiket sepenuhnya pada harga yang dibeli, termasuk cukai dan fi, bagi bahagian atau bahagian- bahagian perjalanan yang tidak dilakukan jika penerbangan itu tidak lagi menyediakan perkhidmatan bagi apa-apa maksud berhubung dengan rancangan perjalanan asal penumpang tanpa hak untuk menaiki pesawat, atau
- (ii) perubahan laluan dalam keadaan pengangkutan yang setanding ke destinasi akhir mereka pada peluang yang terawal atau pada tarikh yang kemudian mengikut kemudahan pengguna, tertakluk kepada ketersediaan tempat duduk tanpa dikenakan bayaran tambahan.

6. Dalam situasi berbeza di mana **pengguna sendiri yang membatalkan penerbangan**, maka bayaran balik tiket kepada pengguna adalah tertakluk kepada terma dan syarat yang telah dipersetujui oleh kedua-dua pihak iaitu syarikat penerbangan dan pengguna, semasa pengguna membeli tiket tersebut.

7. MAVCOM sedang dalam proses penambahbaikan MACPC di mana perkara berkaitan penundaan penerbangan akan turut ditambahbaik bagi melindungi pengguna. Proses penambahbaikan ini dijangka akan selesai pada Disember 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN
HAJI NASARAH (LENGGONG)**

TARIKH : 25.7.2022 (ISNIN)

SOALAN

DATUK SERI DR. SHAMSUL ANUAR BIN HAJI NASARAH (LENGGONG) minta **MENTERI PEMBANGUNAN LUAR BANDAR** menyatakan apakah bentuk usaha yang telah dilaksanakan oleh pihak Kementerian bagi meningkatkan keupayaan ekonomi belia luar bandar dapat diperkasakan bagi mengurangkan migrasi dari luar bandar ke bandar.

JAWAPAN

Tuan Yang di-Pertua,

Untuk makluman Yang Berhormat, pemerkasaan ekonomi belia luar bandar merupakan antara agenda penting di bawah Dasar Pembangunan Luar Bandar 2030 (DPLB 2030). Antara program yang dilaksanakan oleh KPLB untuk meningkatkan ekonomi belia luar bandar adalah:

- a) melaksanakan program ekonomi dan keusahawanan iaitu Program Peningkatan Pendapatan (PPP), Skim Pembiayaan Ekonomi Desa (SPED), Program Start Right@KPLB dan Program Desa Lestari serta program-program di bawah MARA seperti Program Pecutan Usahawan Baharu/ *Start-Up Accelerator Program* (STAR);
- b) menyediakan platform pemasaran secara atas talian melalui Program DesaMall@KPLB;
- c) melaksanakan program pembangunan modal insan seperti Program Latihan Kemahiran dan Kerjaya (PLKK), TVET@KPLB, program-program di bawah KEMAS dan INFRA;
- d) melaksanakan pelbagai program seperti Program Pemerkasaan Wanita, Program Keusahawanan dan Pusat Pengumpulan Produk Usahawan Desa di Pusat Komuniti Desa (PKD) yang berfungsi sebagai Pusat Hentian setempat dengan moto Satu Hentian Pelbagai Perkhidmatan; dan
- e) meneruskan penyediaan infrastruktur dan prasarana yang lengkap dan mencukupi di luar bandar dalam menyokong pembangunan ekonomi dan mewujudkan persekitaran luar bandar yang kondusif.
- f) selain itu, KPLB melalui RISDA, FELCRA Berhad dan LKW turut melibatkan belia luar bandar dalam bidang pertanian dan penternakan dengan memberi peluang pekerjaan dalam sektor perladangan dan membuka tanah terbiar untuk projek pertanian iaitu melibatkan Projek Pertanian Petani Luar Bandar (PPLB).

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M
PARAMESWARAN [BATU]**

TARIKH : 25 JULAI 2022 (ISNIN)

SOALAN

TUAN PRABAKARAN A/L M PARAMESWARAN minta **MENTERI KESIHATAN** menyatakan :-

- (a) usaha KKM bagi membendung penularan varian baru COVID-19 ini dan benarkan status kekurangan doktor di KKM dan apakah langkah KKM bagi mengatasi isu ini; dan
- (b) mengapa pihak KKM melancarkan Jabatan Pendaftaran Kecederaan Bunuh Diri dan Maut Kebangsaan Malaysia (NSFIRM) sedangkan kita sudah mempunyai National Suicide Registry Malaysia satu ketika dahulu (NSRM).

JAWAPAN

Tuan Yang di-Pertua,

1. Dalam menghadapi gelombang varian Delta dan Omicron sebelum ini, Kementerian Kesihatan (KKM) telah melaksanakan strategi yang berlandaskan kepada empat (4) pendekatan berikut:

- (i) Menyelamatkan nyawa;
- (ii) Mengurangkan tahap keterukan jangkitan COVID-19, terutama sekali dalam kalangan golongan berisiko tinggi;
- (iii) Melindungi sistem kesihatan awam negara bagi memastikan ia

- mampu untuk berfungsi secara optima pada setiap masa;
- (iv) Memudahkan proses pemulihan penghidupan (*livelihood*) rakyat yang terjejas akibat kejadian pandemik yang berlaku.

2. Justeru, bagi menghadapi ancaman varian baru COVID-19 di Malaysia sebagaimana yang turut dilaporkan di peringkat antarabangsa, KKM telah mempersiapkan beberapa langkah proaktif sebagaimana berikut:

- (i) Mengaktifkan semula *National COVID-19 Rapid Response Task Force* (RRTF) apabila peningkatan kes COVID-19 mencapai suatu nilai ambang yang dikenal pasti. Pasukan RRTF ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19. Antara objektif utama penubuhan pasukan RRTF adalah bagi:
- a. menyelamatkan nyawa dengan memastikan akses rakyat kepada Pusat Kuarantin dan Rawatan COVID-19 Berisiko Rendah (PKRC) dan hospital terjamin serta melakukan pemantauan kes positif COVID-19 melalui Pusat Penilaian COVID-19 secara maya (*Virtual COVID-19 Assessment Centre*);
 - b. memastikan akses kecemasan dan krisis sentiasa tersedia apabila diperlukan, seperti menyediakan jumlah ambulans yang mencukupi dan tiba pada waktu yang singkat melalui sistem pengurusan berpusat;
 - c. memastikan kebajikan individu yang terkesan dengan jangkitan COVID-19 tidak terabai termasuk anak-anak kepada kes positif selain menitikberatkan kesihatan mental mereka; dan
 - d. memastikan pengendalian dan penyampaian komunikasi strategik yang berkesan bagi mengurangkan serta meredakan kegusaran dalam kalangan masyarakat umum.

- (ii) Memperkenalkan penggunaan ubat antiviral Paxlovid ke dalam *COVID-19 Clinical Care Pathway* sejak 15 April 2022 dalam kalangan pesakit yang menerima rawatan di Klinik Kesihatan, CAC, PKRC dan hospital KKM. Ia merupakan ubat antiviral *oral* pertama di Malaysia untuk merawat pesakit COVID-19 yang mengalami gejala ringan hingga sederhana, ataupun kategori 2 dan kategori 3. Keutamaan pemberian rawatan Paxlovid adalah kepada kumpulan pesakit COVID-19 yang berisiko tinggi.

Seterusnya, bagi memastikan akses yang lebih baik kepada pesakit, rawatan ini telah juga diperluaskan ke fasiliti kesihatan swasta dikenalpasti bermula 20 Jun 2022. Pemberian ubat ini kepada pesakit di fasiliti kesihatan swasta adalah secara percuma. Namun, pesakit masih tertakluk kepada caj khidmat rundingan dan lain-lain caj berkaitan yang ditentukan oleh fasiliti kesihatan swasta tersebut.

- (iii) Meningkatkan peratusan individu yang layak menerima vaksin dos penggalak bagi mengurangkan penularan jangkitan, jangkitan serius serta kematian. KKM menggesa agar semua individu yang layak, tampil untuk mendapatkan perkhidmatan ini supaya populasi Malaysia mendapat perlindungan yang optima terhadap penyakit COVID-19. Bagi menggalakkan lagi individu mengambil dos penggalak ini, KKM telah mengambil langkah-langkah berikut iaitu:
- a. bekerjasama dengan fasiliti swasta bagi pengoperasian PPV termasuk PPV Integrasi di fasiliti tersebut serta PPV “*Offsites*” serta membenarkan pemberian vaksin secara “*walk-in*” di semua PPV;
 - b. menggunakan pendekatan “*outreach*” bagi kawasan yang sukar dicapai; dan
 - c. meningkatkan hebahan melalui media sosial dan media arus perdana serta di kawasan setempat.

SOALAN NO. 22

- (iv) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambahbaik pengurusan COVID-19 melalui pendekatan *FTTIS (Find, Test, Trace, Isolate and Support)* yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera dikemaskini dalam MySejahtera pengguna. Kes positif akan diberikan Perintah Pengawasan dan Pemerhatian (*Home Surveillance Order*, HSO) dan juga Pelepasan Perintah Pengawasan dan Pemerhatian (*Release Order*, RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);
- (v) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut iaitu:
- a. mengenal pasti pesakit yang memenuhi kriteria untuk dipantau di rumah;
 - b. menilai dan memantau perkembangan pesakit sepanjang tempoh pengasingan;
 - c. memulakan rawatan Paxlovid → kepada kumpulan pesakit COVID-19 yang berisiko tinggi dan memenuhi kriteria yang ditetapkan;
 - d. mengenal pasti dan menyelaras pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital; dan
 - e. menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.

- (vi) memantau rapi penularan jangkitan COVID-19 dalam masyarakat melalui pelaksanaan aktiviti surveilans melibatkan lokasi sentinel *influenza-like illness* (ILI) dan *severe acute respiratory infection* (SARI) di seluruh negara. Ia turut disokong dengan aktiviti penjujukan genom menyeluruh (*whole genome sequencing* – WGS) bagi virus SARS-CoV-2 serta aktiviti surveilans persekitaran melalui persampelan air kumbahan dari lokasi persampelan yang dikenalpasti di seluruh negara.
- (vii) menggerakkan inisiatif Agenda Nasional Malaysia Sihat (ANMS) sejak awal tahun 2022 di semua peringkat. Ia antara lain bertujuan untuk memperkasa kawalan sendiri kesihatan merangkumi pemerikasaan individu dalam mengambil tindakan pencegahan penyakit, menilai status kesihatan diri, memastikan kepatuhan rawatan dan mengamalkan norma baharu iaitu penjarakan fizikal, kerap mencuci tangan dan pemakaian pelitup muka.

ANMS turut memberi tumpuan kepada pemerikasaan komuniti dalam membudaya hidup sihat. MyCHAMPION atau *Malaysian Health Community Agent* merupakan satu platform kolaborasi merentasi pelbagai kementerian, organisasi sektor awam, swasta dan pertubuhan bukan kerajaan sebagai rakan strategik untuk memainkan peranan membantu Kementerian Kesihatan dalam inisiatif dan aktiviti promosi kesihatan di peringkat komuniti serta sebagai penggerak dan penyokong (*advocator*). Keperluan penyelarasan sukarelawan dan agen kesihatan amat penting bagi membolehkan inisiatif ini dilaksanakan secara bersepadu dan terancang.

Tuan Yang di-Pertua,

- 3. Berdasarkan rekod KKM, hingga 31 Mac 2022, jumlah Pegawai Perubatan adalah seramai 59,348 orang iaitu:
 - (i) 32,106 orang pegawai lantikan tetap yang merangkumi:
 - a. 25,711 orang Pegawai Perubatan lantikan tetap; dan

- b. 6,395 orang Pegawai Perubatan Pakar lantikan tetap.
 - (ii) 27,242 orang pegawai lantikan kontrak yang merangkumi:
 - a. 27,218 orang Pegawai Perubatan lantikan kontrak; dan
 - b. 24 orang Pegawai Perubatan Pakar lantikan kontrak.
4. Nisbah doktor perubatan kepada penduduk di mana pada tahun 2011, nisbah doktor perubatan kepada penduduk di Malaysia adalah 1 doktor perubatan kepada 791 orang penduduk. Manakala pada tahun 2020, nisbahnya adalah 1:441 . Ini jelas menunjukkan jumlah keseluruhan doktor perubatan di seluruh negara semakin meningkat dari tahun ke tahun daripada 36,607 doktor pada tahun 2011 kepada 73,996 doktor pada tahun 2020.
5. Selain daripada itu, bilangan graduan perubatan telah meningkat dengan ketara sejak tahun 2008. Pada tahun 2012, bilangan graduan perubatan yang dilantik untuk menjalani latihan siswazah ialah seramai 3,743 orang, manakala pada tahun 2020 pula adalah seramai 5,113 orang. Bagi meningkatkan bilangan doktor di negara ini, Kerajaan juga telah memperkenalkan pelbagai insentif bagi menarik minat doktor dan pakar perubatan untuk terus berkhidmat dengan kerajaan serta pengambilan doktor pakar swasta berkhidmat secara sessional dan pengambilan doktor pakar perubatan luar negara secara kontrak.
6. Kerajaan juga telah dan sedang melaksanakan pelbagai inisiatif untuk menambahkan bilangan Pegawai Perubatan. Antara langkah yang telah diambil adalah dengan mempercepatkan lantikan graduan perubatan tersebut dengan inisiatif seperti berikut:
- (i) menyegerakan proses lantikan graduan perubatan melalui pelantikan secara kontrak tanpa perlu melalui proses temuduga oleh SPA mulai Julai 2017. Pelantikan hanya berasaskan graduan perubatan berdaftar dengan Majlis Perubatan Malaysia (MMC) dan SPA; dan
 - (ii) meningkatkan bilangan Hospital Latihan Siswazah (HLS) dari 38 HLS pada tahun 2009 kepada 47 buah HLS pada tahun 2018

dan tambahan bilangan penempatan alternatif daripada 5 penempatan kepada 9 penempatan di klinik-klinik kesihatan termasuk Kesihatan Primer dan Psikiatri. Melalui pendekatan ini, slot latihan siswazah di KKM telah ditingkatkan daripada 10,835 pada tahun 2013 kepada 12,198 pada tahun 2021.

7. Kerajaan sentiasa prihatin dalam menyediakan perkhidmatan kesihatan yang berkesan dan sentiasa komited untuk menyediakan tenaga kepakaran yang terbaik serta berdaya saing. Pembangunan tenaga kepakaran amat bergantung dengan ketersediaan sumber kepakaran sedia ada dalam usaha untuk melatih dan melahirkan tenaga kepakaran yang baharu.

8. Bagi menambahkan bilangan Pegawai Perubatan Pakar di seluruh negara, Kerajaan juga telah melaksanakan inisiatif seperti berikut:

- (i) menggalakkan lebih ramai Pegawai Perubatan melanjutkan pengajian dalam program Sarjana Kepakaran dan menambah slot tajaan Hadiah Latihan Persekutuan (HLP). Sebanyak 1,300 slot telah diperuntukkan pada tahun 2021;
- (ii) selain program Sarjana Kepakaran dengan HLP, Pegawai Perubatan juga boleh mengikuti pengajian kepakaran melalui Program Latihan Kepakaran *Parallel Pathway* (dengan izin). Seramai 189 Pegawai Perubatan telah berjaya menjadi Pakar Perubatan pada tahun 2020 berbanding hanya 98 orang pada tahun 2011 menerusi pelaksanaan kaedah ini;
- (iii) melantik semula Pegawai Perubatan Pakar yang telah tamat kontrak untuk berkhidmat dengan KKM mengikut keperluan;
- (iv) melantik semula secara kontrak Pegawai Perubatan Pakar warganegara yang telah bersara wajib untuk berkhidmat dengan KKM mengikut keperluan dan bidang kritikal;
- (v) mendapatkan perkhidmatan kepakaran luar untuk berkhidmat secara *sessional* (dengan izin); dan

- (vi) menggalakkan Pakar Perubatan warganegara Malaysia yang berkhidmat di luar negara untuk pulang ke tanah air.

9. Sehubungan itu, berdasarkan inisiatif-inisiatif yang telah dinyatakan di atas, jelas menunjukkan bahawa Kerajaan telah mengambil langkah yang proaktif bagi meningkatkan penyampaian kesihatan terutamanya melalui usaha menambahkan bilangan Pegawai Perubatan dan Pegawai Perubatan Pakar di seluruh negara.

Tuan Yang di-Pertua,

10. *National Suicide Registry Malaysia* (NSRM) telah dibangunkan menggunakan dana khas penyelidikan pada tahun 2007 dengan tujuan untuk mengumpul data mengenai kes bunuh diri di Malaysia. Dana khas penyelidikan ini diperolehi bermula tahun 2007 sehingga tamat tempoh pada tahun 2011 di mana NSRM tidak dapat diteruskan dan telah diberhentikan.

11. Memandangkan kadar kematian akibat bunuh diri merupakan salah satu indikator kesihatan di bawah *Sustainable Development Goal* (SDG) dan amat penting bagi usaha pencegahan kejadian bunuh diri, terdapat keperluan bagi membangunkan semula sistem registri bunuh diri di peringkat kebangsaan. Bermula pada tahun 2020, Kementerian Kesihatan telah memulakan usaha membangunkan Sistem Registri Bunuh Diri dan Kecederaan Fatal Kebangsaan atau *National Suicide and Fatal Injury Registry Malaysia* (NSFIRM).

12. NSFIRM juga telah disenaraikan sebagai projek di bawah Rancangan Malaysia Ke-12 (RMK-12) dan telah diperuntukkan sebanyak **RM4 juta** bagi pembangunan sistem tersebut. Projek ini **dijangka siap sepenuhnya pada tahun 2023**. Pembangunan NSFIRM akan membolehkan statistik terperinci dan tepat berkaitan kejadian bunuh diri dan kecederaan fatal diperolehi, yang mana ia akan membantu memperkukuhkan usaha pembangunan polisi dan program pencegahan tingkah laku bunuh diri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAJAL KELIMA PARLIMEN KEEMPAT BELAS,
TAHUN 2022**

PERTANYAAN : LISAN

DARIPADA : TAN SRI HAJI IDRIS BIN JUSOH [BESUT]

TARIKH : 25 JULAI 2022 (ISNIN)

SOALAN

TAN SRI HAJI IDRIS BIN JUSOH [BESUT] minta **MENTERI SUMBER MANUSIA** menyatakan langkah – langkah yang diambil pihak Kementerian dalam usaha menangani isu kekurangan buruh asing khususnya dalam industri agrikomoditi.

JAWAPAN

Tuan Yang di-Pertua,

Untuk makluman Tuan Yang di-Pertua, sektor agrikomoditi merangkumi sawit, getah, koko, lada, kenaf dan kayu kayan termasuk ladang hutan. Pihak kerajaan telah mengambil maklum mengenai masalah kekurangan pekerja dalam sektor agrikomoditi. Oleh itu, Mesyuarat Jemaah Menteri pada 10 Disember 2021 telah bersetuju membenarkan pengambilan pekerja warga asing dalam sektor yang dibenarkan bagi penggajian pekerja asing. Permohonan telah dibuka pada 28 Januari 2022 lalu untuk pengambilan 32,000 pekerja warga asing dalam sektor perladangan secara pengecualian khas. Manakala, permohonan pekerja asing untuk sektor-sektor lain yang dibenarkan bagi penggajian pekerja asing termasuk sektor perladangan tanpa pengecualian khas dibuka pada 15 Februari 2022.

Sehingga 24 Jun 2022, terdapat 320,199 kuota permohonan pekerja asing dari pelbagai sektor telah dibuat oleh syarikat / majikan. Manakala sejumlah 277,372 daripada kuota permohonan tersebut telah diluluskan.

Antara langkah – langkah yang diambil pihak Kementerian dalam usaha menangani isu kekurangan buruh asing adalah dengan pelancaran Dasar Agrikomoditi Negara (DAKN) 2021-2030. DAKN 2030 merupakan kesinambungan kepada Dasar Komoditi Negara (DKN) 2011-2020 telah diluluskan dalam Mesyuarat Jemaah Menteri pada 19 Januari 2022. Penggubalan dan hala tuju dasar ini adalah berteraskan kepada Agenda Nasional seperti Dasar Wawasan Kemakmuran Bersama 2030 (WKB2030), Matlamat Pembangunan Mampan (SDG), Rancangan Malaysia Ke-12 dan Rancangan Fizikal Negara Ke-3 (RFN3).

Sektor agrikomoditi telah mencatatkan jumlah nilai dagangan sebanyak RM270.2 bilion, iaitu peningkatan sebanyak 39.7% berbanding 2020 manakala imbalan dagangan adalah sebanyak RM148.8 bilion. Secara keseluruhan, DAKN 2030 merangkumi 5 teras utama iaitu Kemampanan, Produktiviti, Penjanaan Nilai, Pembangunan Pasaran dan Keterangkuman dengan 14 indikator dan sasaran keseluruhan.

Selain itu, kerajaan mengadakan Karnival Kerjaya Agrikomoditi 2021 secara maya dengan kerjasama Kementerian Sumber Manusia (KSM) melalui Pertubuhan Keselamatan Sosial (PERKESO) untuk memberi peluang kerja kepada warga tempatan serta komuniti Orang Asli.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN LIM LIP ENG (KEPONG)

TARIKH : 25 JULAI 2022 (ISNIN)

SOALAN

TUAN LIM LIP ENG (KEPONG) minta **MENTERI DALAM NEGERI** menyatakan siapakah pembocor dan penjual data peribadi milik 22.5 juta rakyat Malaysia dengan harga USD10,000 dan senaraikan nama 44 agensi yang dibenarkan mengakses data peribadi rakyat Malaysia menerusi pangkalan data Jabatan Pendaftaran Negara.

JAWAPAN

Tuan Yang Di Pertua,

PDRM telah menerima satu laporan polis berkaitan maklumat penjualan data penduduk bertaraf warganegara kelahiran tahun 1979 sehingga tahun 1998 di sebuah laman web iaitu Raidforums.com. Maklumat data penduduk tersebut dikatakan diperolehi melalui perkongsian maklumat MyIDENTITY di Lembaga Hasil Dalam Negeri (LHDN). Kertas siasatan telah dibuka di bawah Seksyen 4(1) Akta Jenayah Komputer 1997 (Akta 563) (Capaian tanpa kuasa dengan niat untuk melakukan atau memudahkan berlakunya kesalahan lanjut).

Modus Operandi kes ini ialah suspek akan membuat capaian tanpa kuasa terhadap pelayan (server) untuk tujuan menjual maklumat dan data dari pelayan tersebut di laman web Raidforum. Beberapa rampasan pelayan di JPN dan KPDNHEP telah dibuat untuk siasatan lanjut. Kes ini masih dalam siasatan dan tiada tangkapan setakat ini. Justeru, pihak Kementerian tidak berhasrat untuk mengulas lebih lanjut agar tidak mengganggu siasatan yang sedang dilakukan.

Pihak Kementerian juga ingin menegaskan bahawa keselamatan capaian dan data di dalam Sistem myIDENTITY di bawah kendalian JPN adalah terjamin dengan pelaksanaan aktiviti pengukuhan keselamatan secara berkala seperti Security Posture Assessment (SPA).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 25.07.2022 (ISNIN)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan langkah yang diambil oleh Kementerian dalam mengadaptasi teknologi digital rantaian blok (Block Chain) dalam industri peruncitan dan borong di negara dan apakah manfaat yang diperoleh daripada adaptasi teknologi ini kepada industri.

JAWAPAN

Tuan Yang di-Pertua,

Kementerian sedia maklum berkaitan teknologi *block chain* dalam pengurusan rantai bekalan dan telah mengetuai salah satu inisiatif pengadaptasian teknologi tersebut melalui pemantauan di bawah kluster ekonomi, Majlis Ekonomi Digital dan Revolusi Perindustrian ke-empat (MED4IR).

Di dalam hubungan ini, Kementerian juga bekerjasama rapat dengan pelbagai Agensi termasuk Kementerian Sains Teknologi dan Inovasi (MOSTI), MIMOS Berhad, Kementerian Pertanian dan Industri Makanan (MAFI) serta Unit Pemodenan Tadbiran dan Perancangan Pengurusan Malaysia (MAMPU) dalam mengenal pasti projek yang bersesuaian untuk dijadikan projek rintis bagi aplikasi teknologi *block chain*.

Kementerian yakin, pengenalan teknologi *block chain* dalam industri pemborongan dan peruncitan ini akan memberi banyak kelebihan kepada Kerajaan dan industri secara holistik diantaranya ialah berkaitan akses data yang tepat dari permulaan rantai sehingga ke pengguna akhir. Teknologi ini juga mempunyai keupayaan dalam memastikan keselamatan data di pelbagai peringkat dan pada masa yang sama ianya memastikan ketulenan sesuatu produk tersebut terpelihara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN WILLIAM LEONG JEE KEEN
(SELAYANG)**

TARIKH : 25 JULAI 2022 (ISNIN)

SOALAN

TUAN WILLIAM LEONG JEE KEEN (SELAYANG) minta **MENTERI DALAM NEGERI** menyatakan sebab-sebab Sistem Visa Asing (VLN) dikendalikan oleh satu kontraktor swasta dan langkah-langkah yang diambil untuk mencegah rasuah dan penyalahgunaan kuasa yang timbul daripada amalan tersebut.

JAWAPAN

Tuan Yang Di Pertua,

Untuk makluman Ahli Yang Berhormat, bagi perkhidmatan pengurusan sistem Visa Luar Negara (VLN), syarikat yang dilantik bagi perkhidmatan penyelenggaraan sistem VLN adalah melalui proses tender mengikut tatacara perolehan Kerajaan semasa.

Sehubungan itu juga, Kementerian Dalam Negeri (KDN) sentiasa komited untuk memastikan semua tatacara perolehan dan kewangan yang dilaksanakan adalah berlandaskan kepada tatacara yang teratur termasuklah mempertingkatkan kerjasama dengan Suruhanjaya Pencegahan Rasuah Malaysia (SPRM) dalam membanteras rasuah. Terkini, KDN dan SPRM sedang mempergiatkan kerjasama strategik melalui *Anti-Bribery Management System (ABMS)*.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

TARIKH : 25 JULAI 2022 (ISNIN)

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan jumlah kes yang melanggar Akta Anti Pencatutan pada tahun 2021 dan 2022 serta tindakan terhadap kes-kes itu. Apakah perancangan Kementerian berhubung aktiviti pergerakan dan penyeludupan barangan bersubsidi serta tindakan yang diambil serta hasilnya.

JAWAPAN

Tuan Yang di-Pertua,

Bagi tahun 2021 sebanyak 98 kes telah diambil tindakan melibatkan kesalahan antipencatutan. Daripada jumlah kes ini, 50 kes adalah melibatkan kesalahan di bawah Seksyen 14(1) iaitu mengambil keuntungan tinggi yang tidak munasabah, 27 kes melibatkan kesalahan di bawah Seksyen 21(5) iaitu kegagalan memberikan maklumbalas notis dan 21 kes melibatkan kesalahan dibawah Seksyen 53A iaitu kegagalan menyelenggara dan menyimpan rekod.

Bagi tahun 2022 sehingga 30 Jun, sebanyak 49 kes telah dihasilkan melibatkan 33 kes atas kesalahan Seksyen 14(1) iaitu mengambil keuntungan tinggi yang tidak munasabah, 11 kes melibatkan kesalahan Seksyen 21(5) iaitu kegagalan memberi maklumbalas notis dan 5 kes atas kesalahan gagal menyelenggara dan menyimpan rekod.

Bagi kesemua kes yang diambil ini, 22 kes telah diambil tindakan kompaun dan denda, 42 kes telah di NFA dan selebihnya masih dalam siasatan.

Kerajaan menzahirkan komitmen tinggi dalam usaha membendung sebarang penyelewangan atau kepincangan berhubung barangan keperluan bersubsidi negara terutama minyak masak. Justeru, Kementerian telah mengambil tindakan-tindakan seperti berikut:

- i. Mengarahkan pemeriksaan dan pengauditan di setiap peringkat rantai pengedaran minyak masak melalui aktiviti semakan *Pre-Delivery Plan*;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;

- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM);
- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga;
- vii. Melaksanakan Pemeriksaan Ops ATM melibatkan barang kawalan seperti ayam, telur dan minyak masak secara harian di setiap peringkat rantai pembekalan dan pengedaran bertujuan untuk memastikan keberadaan bekalan adalah stabil dan tiada isu berkaitan kegiatan sorok barang kawalan;
- viii. Melaksanakan program pemeriksaan berkala ke stesen-stesen minyak yang berhampiran dengan sempadan negara bagi mewujudkan suasana *omnipresence* anggota penguat kuasa; dan
- ix. Mengeluarkan arahan kepada pengusaha stesen minyak di sempadan bagi melarang penjualan petrol RON95 dan menghadkan penjualan diesel sebanyak 20 liter kepada kenderaan pendaftaran asing.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK SERI HAJI DZULKEFLY BIN AHMAD
(KUALA SELANGOR)**

TARIKH : 25 JULAI 2022 (ISNIN)

SOALAN

DATUK SERI DR. HAJI DZULKEFLY BIN AHMAD (KUALA SELANGOR) minta **MENTERI DALAM NEGERI** menyatakan mengapa penganjur 'Walk for Judicial Independence 2022' yang dianjurkan oleh Majlis Peguam Malaysia telahpun disiasat oleh pihak Polis. Di manakah hak perlindungan untuk rakyat berhimpun di bawah Akta Perhimpunan Aman 2012.

JAWAPAN

Tuan Yang Di Pertua,

Kerajaan tidak pernah menafikan hak asasi rakyat untuk mengadakan perhimpunan secara aman di bawah Akta Perhimpunan Aman 2012 (APA). Namun begitu, berlandaskan Perlembagaan Persekutuan, ianya bukan merupakan hak mutlak sebaliknya terdapat batasan-batasan yang perlu dipatuhi berdasarkan undang-undang dan peraturan yang ditetapkan. Tindakan yang diambil oleh Polis Diraja Malaysia ke atas pihak penganjur adalah berdasarkan kepada Perkara 10 Fasal 2 yang memperuntukkan bahawa Parlimen boleh melalui undang-undang mengenakan apa-apa sekatan yang didapatinya perlu atau suai manfaat demi kepentingan keselamatan Persekutuan atau mana-mana bahagiannya atau ketenteraman awam. Tindakan yang diambil oleh Polis Diraja Malaysia pada 17 Jun 2022 tersebut adalah bagi memastikan keselamatan dan ketenteraman awam Parlimen terjamin.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

TARIKH : 25.07.2022 (ISNIN)

SOALAN

**Datuk Zakaria bin Mohd. Edris @ Tubau [Libaran] minta MENTERI
PERDAGANGAN DALAM NEGERI DAN HAL EHWAL PENGGUNA
menyatakan :-**

- (a) usaha Kementerian memantau harga jualan makanan penjaja serta kedai makan dan minum; dan
- (b) apakah usaha Kementerian mencari mekanisme mengurangkan kos sara hidup rakyat yang kian meningkat.

JAWAPAN:

Tuan Yang di-Pertua,

Kerajaan memantau bekalan makanan dalam negara sama ada hasil tempatan atau pun barang import. Keberadaan bekalan yang stabil akan mendorong harga bahan mentah makanan negara berada pada harga yang baik dan munasabah. Walau bagaimanapun negara tetap bergantung 100% kepada harga kos pembelian barang tersebut seperti kos import, kos pengeluaran bagi barang tempatan serta kos pengangkutan bagi barang import dan tempatan.

Setelah bahan mentah dipastikan mencukupi dan stabil, makanan yang diproses, dimasak dan dijual kepada pengguna akhir juga dipantau oleh KPDNHEP bagi memastikan peniaga memaparkan tanda harga, keberadaan bekalan, tiada pencatutan, mematuhi harga kawalan semasa Skim Harga Maksimum Musim Perayaan dilaksanakan dan lain-lain pemantauan harian melalui aktiviti:

- i. Pemeriksaan harian; dan
- ii. Operasi khas seperti Ops Menu, Ops Rantai, Ops Pasar, Ops Pantau bagi memantau jualan penjaja dan kedai makan.

Dalam usaha kerajaan mengurangkan kos sara hidup, KPDNHEP meningkatkan aktiviti penguatkuasaan bagi mengatasi masalah kenaikan harga dengan memastikan bekalan mencukupi melalui pemantauan bersama agensi kerajaan lain serta pengeluar, pengimport dan pembekal. Antara barang keperluan yang mendapat subsidi kerajaan adalah minyak masak, tepung gandum, gas petroleum cecair, petrol RON95, diesel, ayam dan telur ayam, beras dan hasil tanaman.

Program Penyeragaman Harga (*Community Drumming*) juga dilaksanakan bagi memastikan harga barang keperluan runcit dapat dijual murah di tempat yang jauh di pedalaman. Program ini banyak dilaksanakan di Sabah, Sarawak, Kelantan, Pahang, Langkawi dan sebagainya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN
AYUB [PULAI]**

TARIKH : 25 JULAI 2022 (ISNIN)

SOALAN

DATUK SERI HAJI SALAHUDDIN BIN AYUB minta **MENTERI KESIHATAN** menyatakan perancangan atau pelan tindakan Kementerian untuk memperkasakan saluran pemulihan masalah kesihatan mental dalam kalangan kanak-kanak, sepertimana yang dimaklumkan oleh Persatuan Psikiatri Kanak-kanak dan Remaja Malaysia (MYCaps) mengenai peratusan kanak-kanak yang menghadapi masalah kesihatan mental namun tidak dapat dikesan dan tidak dirawat sebaiknya.

JAWAPAN

Tuan Yang di-Pertua,

1. Kementerian Kesihatan Malaysia amat prihatin dan menyedari bahawa isu kesihatan mental dalam kalangan kanak-kanak dan remaja merupakan satu agenda penting yang perlu diberi perhatian serius. Justeru, KKM telah menggariskan beberapa strategi di dalam Pelan Tindakan Strategik Kesihatan Mental Kebangsaan bagi menangani isu dan masalah dalam kalangan kanak-kanak dan remaja. Strategi yang dirangka melibatkan aktiviti seperti berikut:

a) Program Minda Sihat di Institusi Pendidikan

Program Minda Sihat di institusi pendidikan merupakan kerjasama KKM dengan Kementerian Pendidikan Malaysia bagi memastikan kesejahteraan mental golongan kanak-kanak dan remaja. Program ini bertujuan untuk memperkasa dari aspek psikososial dan kesejahteraan emosi serta menerapkan elemen kemahiran daya tindak (*coping skills*) dan resilien dalam kalangan kanak-kanak dan remaja. Bagi individu yang disaring dan dikenal pasti memerlukan intervensi, mereka akan dirujuk untuk penilaian dan rawatan lanjut. Sehingga kini program minda sihat di institusi pendidikan dilaksanakan menerusi Program Minda Sihat Dalam Kebiasaan Baharu di sekolah-sekolah seluruh negara. Kementerian Kesihatan juga turut bekerjasama dengan Kementerian Pendidikan bagi merangka garis panduan sistem rujukan pelajar yang dikesan mempunyai masalah kesihatan mental untuk rawatan lanjut.

b) Sesi Advokasi Melalui Aktiviti Promosi Kesihatan Mental kepada Kumpulan Sasar

Sesi advokasi kesihatan mental ini adalah melibatkan kumpulan sasar di peringkat sekolah dengan menerapkan komponen kesihatan mental ke dalam sistem pendidikan melalui penyampaian pengetahuan, sikap dan kemahiran yang bersesuaian dengan peringkat umur kanak-kanak dan remaja. Strategi ini dirangka untuk meningkatkan kesejahteraan

kesejahteraan kesihatan mental di kalangan kanak-kanak dan remaja.

c) Penganjuran Kempen dan Ceramah Kesedaran serta Kemahiran Keibubapaan

Kempen ini dianjurkan dengan kerjasama bersama KPWKMM yang mengetengahkan kemahiran keibubapaan, program advokasi serta penerapan nilai murni kekeluargaan.

d) Sesi Libat Urus bersama Agensi yang berkaitan

Sesi libat urus (*engagement*) juga telah dilaksanakan bersama pelbagai Kementerian dan agensi seperti Kementerian Pendidikan, Kementerian Pembangunan Wanita Keluarga dan Masyarakat (KPWKMM), Kementerian Komunikasi dan Multimedia, Institut Penyelidikan Pembangunan Belia (IYRES) di bawah Kementerian Belia dan Sukan serta pihak NGO seperti NGO *Child Care* bagi menangani isu permasalahan kesihatan mental di kalangan kanak-kanak dan remaja secara bersepadu.

Sekian, terima kasih

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH JAWAB : 25 JULAI 2022 (ISNIN)

SOALAN

YB DATO' SRI ABDUL AZEEZ BIN ABDUL RAHIM [BALING] minta **MENTERI PERUMAHAN DAN KERAJAAN TEMPATAN** menyatakan perancangan Kementerian untuk mengatasi lambakan rumah siap yang tidak terjual di negara kita dan adakah terdapat sebarang perbincangan bersama kerajaan negeri dan pemaju-pemaju untuk mengatasi masalah ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) memandang serius isu rumah kediaman siap yang tidak terjual. Isu ini telah dibincangkan dalam Mesyuarat Majlis Perumahan Mampu Milik Negara (MPMMN) yang dipengerusikan oleh YAB Perdana Menteri pada 10 Februari 2022. Mesyuarat ini turut dihadiri oleh kerajaan negeri dan wakil pihak pemaju. Antara punca lambakan rumah tidak terjual ini berlaku adalah ekoran daripada penawaran perumahan yang tidak sepadan dengan permintaan di sesuatu lokaliti, harga rumah yang tidak sepadan dengan pendapatan isi rumah, lokasi yang kurang menarik dan lain-lain lagi.

KPKT sedang melaksanakan beberapa tindakan untuk menangani isu ini melalui perancangan jangka pendek dan panjang. Antara langkah-langkah utama yang telah diambil oleh Kementerian adalah seperti berikut:

- (i) KPKT sedang melaksanakan pemetaan Rumah Mampu Milik (RMM) berdasarkan pendapatan median mengikut negeri dan daerah yang diperolehi daripada tinjauan *Household Income/ Expenditure Survey* (HIS). Kaedah ini mengambil kira pendapatan median rakyat mengikut lokaliti berdasarkan kaedah gandaan median (*median multiple*). Pemetaan ini bertujuan sebagai panduan kepada pemaju serta agensi penyedia perumahan bagi penetapan harga jualan rumah di satu-satu lokaliti;
- (ii) Kementerian juga bercadang untuk memperkenalkan peraturan/garis panduan kepada para pemaju perumahan untuk mengemukakan kajian kebolehlaksanaan (*feasibility study*) semasa memohon Kebenaran Merancang. Hasil kajian ini dapat membantu

mengelak daripada berlakunya sebarang pembangunan perumahan yang tidak sesuai dengan permintaan pasaran;

- (iii) Pembangunan Sistem Analisis Data Raya (*Big Data Analytics*; BDA) Perumahan yang akan menghimpunkan data perumahan yang komprehensif daripada pelbagai sumber bagi mendapatkan gambaran sebenar kedudukan dan ketersediaan data berkaitan sektor perumahan di Malaysia sebelum pembangunan sistem yang berkaitan. Kajian Pembangunan BDA Perumahan ini telah dimulakan pada bulan Februari 2021. Hasil kajian ini akan menentukan halatuju pembangunan sistem BDA dengan objektif seperti berikut:
- (a) membantu untuk mengetahui kedudukan pasaran perumahan hartanah yang lebih jelas dan tepat demi pembangunan sektor hartanah yang lestari dan efisien;
 - (b) dijadikan input bagi pembangunan platform pusat pengumpulan data hartanah yang meliputi permintaan dan penawaran; dan
 - (c) membantu pihak Kerajaan dalam membuat keputusan di peringkat Persekutuan dan kerajaan negeri dalam penyediaan dasar dan perancangan perumahan negara yang lebih komprehensif.

Isu rumah kediaman siap tidak terjual akan sentiasa diberi perhatian oleh Kementerian dan penyelesaiannya memerlukan kerjasama daripada pelbagai pihak termasuk pemain industri, Kerajaan Persekutuan, kerajaan negeri, Pihak Berkuasa Tempatan (PBT), institusi perbankan dan sebagainya. Kementerian yakin dengan langkah-langkah yang diatur ini, isu rumah tidak terjual akan dapat diatasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 25.07.2022 (ISNIN)

SOALAN

PUAN ALICE LAU KIONG YIENG [LANANG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan tindakan jangka masa pendek dan jangka masa panjang Kementerian dalam mengawal dan menstabilkan harga barangan yang melonjak di seluruh negara selepas menghentikan subsidi mulai bulan Julai ini dan apakah langkah proaktif dalam menangani masalah kekurangan bekalan seperti ayam, telur, tepung gandum dan sebagainya supaya masalah ini tidak berulang lagi.

JAWAPAN

Tuan Yang di-Pertua,

Untuk makluman Ahli Yang Berhormat, isu inflasi yang dihadapi oleh Malaysia adalah bersifat global yang disebabkan oleh gangguan berpunca daripada pandemik COVID-19. Ini menyebabkan pelbagai komoditi utama dunia seperti jagung, soya, gandum dan gula meningkat harganya selain kos perkapalan yang turut meningkat mendadak. Keadaan itu menjadi lebih teruk terutamanya pada permulaan perang Rusia – Ukraine.

Mengambil kira semangat Keluarga Malaysia, antara langkah jangka

pendek dan jangka panjang yang diambil bagi mengurangkan kesan kenaikan harga barangan adalah seperti berikut:

- a. RM1.1 bilion diperuntukkan kepada subsidi ayam dan telur bagi menstabilkan harga kedua-dua produk ini;
- b. Kerajaan juga dijangka membelanjakan subsidi minyak masak polibeg 1 kg sehingga RM4 bilion pada tahun ini. Jumlah ini naik secara mendadak berbanding keperluan pada tahun 2020 dan 2021;
- c. Bagi memastikan keberadaan bekalan minyak masak di pasaran serta minyak masak bersubsidi 1 kg ini dinikmati oleh pihak yang sepatutnya, KPDNHEP melaksanakan penguatkuasaan serta operasi membanteras penyeludupan dengan menggerakkan lebih kurang 2,200 anggota penguatkuasa seluruh negara;
- d. Kerajaan juga terus mengekalkan harga RON95 sekaligus menyebabkan Kerajaan menanggung perbelanjaan yang besar bagi membantu rakyat. Dengan tidak menaikkan harga RON95 ia telah memberi ruang supaya harga barangan dan perkhidmatan kekal stabil; dan
- e. Bagi membolehkan rakyat mendapat akses untuk membeli barangan pada harga berpatutan, Kerajaan meneruskan Program Jualan Keluarga Malaysia (PJKM) dengan peruntukan sebanyak RM100 juta melibatkan 222 kawasan Parlimen terlibat tanpa mengira status kawasan Parlimen tersebut.

Benar, kita tidak dapat menghalang kenaikan kerana ia adalah disebabkan faktor inflasi global. Namun, impaknya dikurangkan dengan strategi-strategi yang telah dirancang oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : 25.07.2022 (ISNIN)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah mekanisme yang bakal dilaksanakan oleh Kementerian bagi memastikan subsidi bersasar menggantikan subsidi minyak masak sawit botol 1 hingga 5 kilogram benar-benar mencapai matlamatnya.

JAWAPAN

Tuan Yang di-Pertua,

Kementerian ini sedang melaksanakan Kajian Mengoptimumkan Program Subsidi di bawah KPDNHEP untuk mencari penyelesaian terbaik bagi agihan minyak masak bersubsidi. Kajian ini dijangka selesai pada September 2022.

Sehingga satu mekanisme baharu diumumkan, Kerajaan akan meneruskan mekanisme sedia iaitu pemberian subsidi minyak masak dalam pek polibeg 1kg melalui Program Skim Penstabilan Minyak Masak (COSS).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN NATRAH BT. ISMAIL (SEKIJANG)

TARIKH : 25 JULAI 2022 (ISNIN)

SOALAN

PUAN HAJAH NATRAH BINTI ISMAIL (SEKIJANG) minta **MENTERI DALAM NEGERI** menyatakan :-

(a) tempoh yang akan diambil oleh pihak Kementerian untuk memproses permohonan kewarganegaraan bagi anak yang dilahirkan di luar negara; dan

(b) apakah taraf anak-anak ini walaupun ibunya merupakan warganegara Malaysia.

JAWAPAN

Tuan Yang Di Pertua,

- a) Untuk makluman Ahli Yang Berhormat, setiap permohonan kewarganegaraan yang diterima oleh Kementerian Dalam Negeri (KDN) melalui Jabatan Pendaftaran Negara (JPN) akan diproses dan diteliti dengan sewajarnya sebelum sesuatu keputusan dikeluarkan. Beban untuk membuktikan kelayakan untuk dianugerahkan kewarganegaraan Malaysia ini adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan

berkaitan yang berkuatkuasa dalam isu pendaftaran perkahwinan, pengangkatan, kesahtarafan anak dan peraturan imigresen.

Permohonan kewarganegaraan dikemukakan secara berasingan dengan kandungan maklumat dan dokumen sokongan yang berbeza-beza, maka hasil penilaian dan pertimbangan juga adalah berbeza mengikut keperluan, bukti dan fakta kes berdasarkan maklumat yang diberikan. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes. Sukacita diingatkan bahawa syarat-syarat yang ditetapkan dalam Perlembagaan Persekutuan hanya melayakkan permohonan dikemukakan tetapi tidak menjamin bahawa permohonan akan diluluskan.

- b) Kelahiran seseorang individu di negara ini tidak menjamin kewarganegaraan Malaysia secara automatik bagi individu tersebut. Kewarganegaraan seseorang individu adalah ditentukan berdasarkan kepada status perkahwinan dan taraf kewarganegaraan ibu bapa kandung individu berkenaan sewaktu kelahiran berlaku selaras dengan peruntukan Bahagian III Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI TIONG KING SING
[BINTULU]**

TARIKH : 25 JULAI 2022 (ISNIN)

SOALAN

DATO' SERI TIONG KING SING minta **MENTERI KESIHATAN** menyatakan :-

- (a) bilakah Kementerian akan membekalkan mesin pengimbas Pengimejan Resonans Magnetik (Magnetic Resonance Imaging – MRI) di Hospital Bintulu untuk kemudahan dan kebajikan pesakit di Bintulu; dan
- (b) berapa jumlah peruntukan yang disediakan untuk tujuan membaik pulih prasarana klinik kesihatan luar bandar terutamanya di Bintulu.

JAWAPAN

Tuan Yang di-Pertua,

1. Kementerian Kesihatan Malaysia (KKM) sedia maklum terdapat keperluan untuk melengkapi Hospital Bintulu dengan mesin Pengimejan Resonans Magnetik (Magnetic Resonance Imaging – MRI). Pemasangan mesin MRI ini akan dimulakan dengan penyediaan ruang bangunan dan infrastruktur terlebih dahulu sebelum pembekalan mesin MRI yang dijangka akan diselesaikan pada tahun 2023.

SOALAN NO. 35

2. Buat sementara waktu, Hospital Bintulu telah menyumberluarkan prosedur MRI (seperti *MRI neck, upper abdomen, pelvis* dan *spine*) ke Bintulu Medical Centre dan Columbia Asia Hospital-Bintulu. Inisiatif ini baru bermula pada pertengahan Jun yang lalu, di mana setakat ini sebanyak 2 kes telah disumberluarkan (sehingga 7 Julai 2022).

3. Bagi tahun 2022, KKM telah memperuntukkan sebanyak RM13.63 juta bagi menaik taraf dan membaik pulih fasiliti kesihatan di Negeri Sarawak. Daripada jumlah tersebut, sebanyak RM3.86 juta diperuntukkan bagi fasiliti-fasiliti kesihatan di Bintulu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI DR. WAN AZIZAH WAN ISMAIL
(PANDAN)**

TARIKH : 25.7.2022 (ISNIN)

SOALAN

DATO' SERI DR. WAN AZIZAH WAN ISMAIL (PANDAN) minta
MENTERI PEMBANGUNAN LUAR BANDAR menyatakan;

- a) apakah status kesihatan, pendidikan serta kemudahan awam di penempatan Orang Asli kaum Bateq di Gua Musang yang pernah berdepan dengan masalah kesihatan dan
- b) kematian akibat pencemaran; dan apakah langkah-langkah penambahbaikan yang telah dilakukan oleh pihak Kementerian.

JAWAPAN

Tuan Yang di-Pertua,

Untuk makluman Yang Berhormat, Jabatan Kemajuan Orang Asli (JAKOA) telah menyediakan air *tiubwell* (air bawah tanah) yang dibangunkan oleh Jabatan Mineral dan Geosains (JMG). Sebelum ini penempatan tersebut menggunakan air tandak tetapi sumber air telah tercemar akibat aktiviti perlombongan bijih yang beroperasi berhampiran Kampung Kuala Koh. Rawatan kesihatan secara berkala juga telah dilaksanakan oleh Pasukan Bergerak Orang Asli (PBOA) ke Kuala Koh.

Bagi status pendidikan kepada anak-anak masyarakat Orang Asli di Kuala Koh, JAKOA telah mewujudkan alternatif Learning Centre (Pendidikan Pro Khas) di dalam kawasan penempatan tersebut, untuk

SOALAN NO : 36

memberi pendidikan kepada anak-anak penduduk agar tidak ketinggalan dalam bidang pendidikan.

Terdapat empat (4) buah perkampungan Orang Asli yang terdiri daripada suku Bateq di DUN Paloh, Parlimen Gua Musang. Perkampungan tersebut mempunyai 926 orang penduduk.

Dari aspek kemudahan awam dan infrastruktur, sepanjang tahun 2016 sehingga tahun 2022 JAKOA telah melaksanakan pelbagai projek iaitu seperti berikut:

Bil.	Kampung	Projek	Kos (RM)
1.	KOA Pasir Linggi	Baikpulih dewan	50,000.00
2.		Baikpulih bangunan PROKHAS	20,000.00
3.		Membina padang aktiviti sukan	20,000.00
4.		Menaiktaraf jalan perhubungan desa	20,000.00
5.		Menaiktaraf sistem rawatan air	380,000.00
6.		Naiktaraf tabika	80,000.00
7.	KOA Aring 5	Menaiktaraf sistem perparitan	50,000.00
8.		Membina jambatan I beam	320,000.00
9.		Menaiktaraf dewan komuniti	20,000.00
10.		Menaiktaraf sistem rawatan air	425,000.00
11.	KOA Kuala Koh	Membina dewan terbuka orang ramai	200,000.00
12.		Baikpulih 5 unit rumah PPRT	65,000.00
13.		Menaiktaraf sistem rawatan air	150,000.00
14.		Projek bekalan elektrik talian grid	950,000.00
15.		Membina padang aktiviti sukan	20,000.00
16.	KOA Machang	Naiktaraf Jalan perhubungan desa	50,000.00

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB DATUK SERI TIONG KING SING (BINTULU)

TARIKH : 25 JULAI 2022 (ISNIN)

SOALAN

DATO' SERI TIONG KING SING (BINTULU) minta **MENTERI DALAM NEGERI** menyatakan :-

(a) berapa jumlah permohonan kewarganegaraan dari negeri Sarawak terutamanya Bintulu di bawah Perkara 15 dan 15(A) yang diterima oleh Jabatan Pendaftaran Negara pada tahun 2020 sehingga ini dan berapa yang telah lulus ; dan

(b) kekangan atau masalah yang dihadapi oleh pemohon terhadap permohonan kewarganegaraan mereka dan apakah tindakan dan bimbingan yang diberi oleh pihak Jabatan Pendaftaran Negara untuk membantu memohon semula.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN), sebanyak **323 permohonan** kewarganegaraan di bawah Perkara 15(1), 15(2) dan 15A diterima di Negeri Sarawak dari tahun 2020 hingga 30 Jun 2022. Seramai **253 orang** telah diberikan sijil kewarganegaraan di bawah Perkara 15(1), 15(2) dan 15A di Negeri Sarawak bagi tempoh yang sama.

Manakala sebanyak **37 permohonan** kewarganegaraan di bawah Perkara 15(1), 15(2) dan 15A diterima di Bintulu, Sarawak dari tahun 2020 hingga 30 Jun 2022. Seramai **19 orang** telah diberikan sijil kewarganegaraan di bawah Perkara 15(1), 15(2) dan 15A di Negeri Sarawak bagi tempoh yang sama.

Untuk makluman Ahli Yang Berhormat, beberapa kekangan atau masalah yang dihadapi oleh pemohon terhadap permohonan kewarganegaraan adalah kegagalan untuk mengemukakan dokumen sokongan yang lengkap. Selain itu, dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Walau bagaimanapun, Kementerian dan JPN sentiasa berusaha dan mengambil tindakan proaktif membantu menyelesaikan masalah masyarakat khususnya mengenai isu pendaftaran dokumen pengenalan diri dengan mengadakan pelbagai program turun padang dan khidmat nasihat berterusan yang dilaksanakan oleh Jabatan seperti Program Menyemai Kasih Rakyat (MEKAR) JPN, Program Aspirasi Keluarga Malaysia dan Program Kita Demi Negara.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 25 JULAI 2022 (ISNIN)

SOALAN

YB PUAN NOR AZRINA BINTI SURIP [MERBOK] minta **MENTERI PERUMAHAN DAN KERAJAAN TEMPATAN** menyatakan apakah pendekatan terkini Kementerian pengasingan sisa pepejal di punca lebih sistematik termasuklah sistem “composting” secara sukarela bermula di rumah.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Perbadanan Pengurusan Sisa Pepejal dan Pembersihan Awam (SWCorp) telah melaksanakan beberapa pendekatan bagi memastikan pengasingan Sisa Pepejal di Punca (SAS) yang lebih sistematik seperti pendidikan yang berterusan dan sesi libat urus bersama isi rumah serta melaksanakan penguatkuasaan melalui kompaun ke atas premis-premis yang tidak mengasingkan sisa.

Kegagalan dalam melaksanakan pengasingan sisa tersebut boleh menyebabkan isi rumah dikenakan kompaun minimum RM50.00 dan maksimum RM1,000.00 jika disabit kesalahan bagi jenis perumahan bertanah (*landed housing*). Bagi jenis perumahan bertingkat (*non-landed housing*) pula, isi rumah boleh dikenakan kompaun minimum RM100.00 dan maksimum RM1,000.00 jika disabit kesalahan.

Sebanyak 17,942 operasi penguatkuasaan SAS telah dilaksanakan bagi premis bertanah mulai tahun 2018 hingga 2022 melibatkan 1,471,443 bilangan premis dan 26,769 taman. Selain itu, sebanyak 1,517,115 sesi libat urus telah dijalankan kepada isi rumah dengan mengedarkan risalah dan memberi penerangan kepada isi rumah mengenai SAS. Hasil operasi yang telah dijalankan, sebanyak 713 Notis Pemberitahuan Kesalahan (NPK) telah dikeluarkan kepada isi rumah yang gagal mengasingkan sisa pepejal. Sebanyak 385 NPK telah berjaya dikompaun dengan nilai terkumpul sebanyak RM19,700.00 manakala sebanyak 328 NPK masih dalam siasatan oleh Pegawai Penyiasat.

Sementara itu, bagi pelaksanaan pengkomposan (*composting*) di setiap rumah, pihak Kementerian melalui SWCorp telah melaksanakan satu projek rintis di 17 buah Program Perumahan Rakyat (PPR) terpilih yang dinamakan sebagai Program Komuniti Sifar Sisa (KOSIS). Program ini dirancang bagi memudahkan dan membantu penduduk PPR

SOALAN NO: 38

melaksanakan pengasingan sisa di punca dengan cara yang betul, melaksanakan aktiviti menukar sisa dan barangan kitar semula kepada wang tunai serta aktiviti perawatan sisa makanan di punca.

Bagi tujuan perawatan sisa makanan, pusat KOSIS telah mempraktikkan beberapa kaedah yang bersesuaian seperti kaedah *Takakura Home Method*, *Bokashi* dan menggunakan mesin kompos. Namun, kebanyakan pusat KOSIS mempraktikkan kaedah *Takakura Home Method* kerana kaedah tersebut tidak melibatkan kos yang tinggi dan lebih praktikal untuk dilaksanakan oleh komuniti.

Menjelang tahun 2025, SWCorp mensasarkan sebanyak 70% bersamaan 38,040 orang penduduk daripada 17 PPR sedia ada untuk menyertai program KOSIS yang merangkumi penglibatan masyarakat setempat dalam aktiviti kesedaran terhadap kebersihan persekitaran serta amalan dan budaya kitar semula.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH JAWAB : 25 JULAI 2022 (ISNIN)

SOALAN

YB DATUK ROZMAN BIN ISLI [LABUAN] minta **MENTERI PERUMAHAN DAN KERAJAAN TEMPATAN** menyatakan status pembinaan Projek Perumahan Rakyat Jalan Batu Arang dan berapa permohonan yang telah diterima, diluluskan serta ditolak dan adakah pakej baharu akan ditambah di Labuan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah melaksanakan projek Program Perumahan Rakyat (PPR) Batu Arang, Labuan pada tahun 2018 di bawah Rancangan Malaysia Kesebelas (RMKe-11). Projek ini dijadualkan siap pada 13 Julai 2022. Walau bagaimanapun, status semasa projek ini adalah 92%. Faktor utama yang telah menyebabkan kelewatan adalah pihak kontraktor menghadapi masalah kekurangan bahan binaan seperti simen, pasir dan batu daripada pembekal serta produktiviti juga

berkurangan kerana penurunan tenaga kerja semasa tempoh Perintah Kawalan Pergerakan (PKP). Sehubungan itu, projek ini telah diluluskan tarikh siap baharu iaitu pada bulan Mac 2023.

Bagi memastikan projek ini dapat disiapkan mengikut jadual baharu, beberapa langkah telah diambil oleh pihak kontraktor seperti berikut:

- i) membuat *stockpiling* secara berterusan untuk material yang bermasalah; dan
- ii) membawa masuk pekerja daripada luar Labuan dari semasa ke semasa.

Untuk makluman Ahli Yang Berhormat seterusnya, permohonan bagi PPR Batu Arang, Labuan ini telah dibuka mulai 20 Januari 2020 sehingga 31 Disember 2020 secara dalam talian melalui laman sesawang Sistem Pengurusan Perumahan Negara, KPKT. Urusan pemprosesan permohonan pula dikendalikan oleh Perbadanan Labuan selaku pihak bertanggungjawab menguruskan PPR tersebut dengan kerjasama KPKT.

Sehingga 5 Julai 2022, sebanyak **528 permohonan** telah diterima dan telah disaring mengikut syarat-syarat kelayakan permohonan PPR. Daripada jumlah tersebut, didapati hanya **205 pemohon sahaja yang layak dipertimbangkan** untuk penawaran PPR manakala sebanyak **323 permohonan pula telah ditolak** kerana tidak melepasi syarat. Bagi **baki 295 unit rumah yang masih kosong** daripada 500 unit keseluruhan PPR Batu Arang, Perbadanan Labuan akan membuka semula permohonan setelah proses penawaran untuk 205 pemohon selesai. Pengisian dijangka akan dibuat bermula pada bulan Disember 2022 tertakluk kepada tarikh pengeluaran Perakuan Siap dan Pematuhan (CCC).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 25.07.2022 (ISNIN)

SOALAN

DATO' ABDULLAH SANI BIN ABDUL HAMID [KAPAR] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan komitmen bagi memastikan bekalan minyak masak paket bersubsidi ini mencukupi dan mampu sampai kepada golongan sasaran.

JAWAPAN:

Tuan Yang di-Pertua,

Kerajaan menzahirkan komitmen tinggi dalam memastikan bekalan minyak masak paket bersubsidi mencukupi dan sampai kepada golongan sasaran. Justeru, Kementerian telah mengambil tindakan-tindakan seperti berikut:

- i. Mengarahkan pemeriksaan dan pengauditan di setiap peringkat rantai pengedaran minyak masak melalui aktiviti semakan Pre-Delivery Plan;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM);
- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga; dan
- vii. Melaksanakan Pemeriksaan Ops ATM melibatkan barang kawalan seperti ayam, telur dan minyak masak secara harian di setiap peringkat rantai pembekalan dan pengedaran bertujuan untuk memastikan keberadaan bekalan adalah stabil dan tiada isu berkaitan kegiatan sorok barang kawalan.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KEDUA
PENGKAL KELIMA PARLIMEN KEEMPAT BELAS**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 25 JULAI 2022 (ISNIN)

SOALAN

Dato' Johari bin Abdul [Sungai Petani] minta **MENTERI BELIA DAN SUKAN** menyatakan apakah Kementerian sedar belia-belia di seluruh negara sudah hilang semangat kesukarelawan kerana kegiatan persatuan-persatuan belia semakin pudar. Apakah perancangan Kementerian bagi memastikan persatuan-persatuan belia aktif dan hidup semula.

JAWAPAN

Tan Sri Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) sentiasa menyokong pertubuhan-pertubuhan belia di negara ini supaya aktif memainkan peranan sebagai badan yang bertanggungjawab dalam pembangunan belia negara. Peruntukan berupa pemberian geran Kerajaan kepada pertubuhan-pertubuhan disalurkan mengikut prosedur bagi membiayai sepenuhnya atau sekurang-kurangnya sebahagian kos pentadbiran dan pelaksanaan program atau aktiviti pertubuhan khususnya kepada pertubuhan belia dan sukan dan amnya kepada semua pertubuhan yang berdaftar.

KBS juga telah merangka beberapa inisiatif kepada pertubuhan-pertubuhan belia bagi menggerakkan mereka secara aktif di peringkat akar umbi, daerah dan negeri. Inisiatif yang telah dirancang antaranya melibatkan

SOALAN NO : 41

penyaluran peruntukan pelaksanaan program, hubungan kerjasama strategik dalam pelaksanaan program, dan pengukuhan kepimpinan.

Bagi tujuan rekod, Kementerian telah menyalurkan geran sebanyak RM173,304,225.00 kepada 2,758 pertubuhan daripada 4,093 pertubuhan yang telah memohon bantuan kewangan dari tahun 2015 hingga 2022 menggunakan peruntukan sedia ada untuk membantu pelaksanaan program terutamanya di peringkat akar umbi dan seterusnya di tahap yang lebih tinggi.

Selain itu juga, Kementerian ini komited membangunkan serta menggalakkan inisiatif kesukarelawanan agar terus relevan serta menjadi amalan di kalangan masyarakat khususnya golongan belia. Minat masyarakat Malaysia terhadap kerja-kerja kesukarelawanan dilihat semakin meningkat dengan rekod pendaftaran bagi menyertai inisiatif kesukarelawanan yang dilaksanakan oleh Kementerian mencatatkan pendaftaran baharu sebanyak 330,460 sukarelawan bermula Disember 2020 sehingga Mac 2022.

Untuk makluman, sukarelawan yang telah berdaftar dengan Kemeterian telah digerakkan melalui program seperti *Malaysia Vaccine Support Volunteer* (MyVac) untuk membantu dalam melancarkan program imunisasi kerajaan dengan menempatkan individu yang bersedia berkhidmat dalam pasukan vaksinasi. Rakan Muda *Sport Bubble Volunteer* (RM-SBV) juga telah diaktif menggunakan sukarelawan berdaftar bagi melaksanakan khidmat pemantauan Prosedur Operasi Standard (SOP) di pertandingan/kejohanan/acara sukan yang berjalan.

Bagi merealisasikan hasrat dalam menggalakkan serta melahirkan sukarelawan daripada kalangan belia yang berpengetahuan, berkemahiran, prihatin, bertanggungjawab, mempunyai nilai-nilai kesukarelawanan yang tinggi, saling bantu membantu serta peka dengan keadaan sekeliling, Kementerian telah memperkenalkan inisiatif Skuad Sukarelawan Anak Malaysia (SATRIA) pada tahun ini (2022) bertujuan untuk mendayaupayakan sukarelawan melalui latihan secara *upskilling* dan *reskilling* serta mempunyai sistem pentadbiran dan pengurusan sukarelawan yang efisien lagi sistematik.

SOALAN NO : 41

Dengan adanya pelaksanaan SATRIA ini, pertubuhan belia dan sukan dapat diperkasakan bagi mengerakkan aktiviti kesukarelawanan dalam melahirkan pemimpin di samping membudayakan kesukarelawanan di kalangan masyarakat khususnya golongan belia. Sebagai inisiatif tambahan, Kementerian juga telah menyalurkan bantuan pentadbiran bagi membantu meningkatkan keberkesanan tadbir urus pertubuhan belia serta memberikan kesan langsung kepada ahli-ahli pertubuhan belia tersebut. Bantuan pentadbiran yang telah diperuntukan adalah seperti berikut:-

Bil.	Tahun	Jumlah (RM)	Pertubuhan Belia
1.	2018	412,000.00	Peringkat Daerah
2.	2019	1,000,000.00	Peringkat Kebangsaan
3.	2020	3,780,000.00	Peringkat Daerah
4.	2021	3,816,000.00	Peringkat Daerah
5.	2022	3,780,000.00	Peringkat Daerah

Selain itu, bagi memberi penghargaan kepada pertubuhan-pertubuhan belia yang aktif di pelbagai peringkat, pertubuhan-pertubuhan ini berpeluang untuk diberikan pengiktirafan melalui pertandingan Anugerah Perdana Belia Negara dalam Kategori Pertubuhan Belia. Anugerah ini adalah bagi memberi penghargaan kepada pertubuhan belia yang menunjukkan potensi dan prestasi yang cemerlang dalam menyumbang kepada pembangunan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN BARU BIAN [SELANGAU]

TARIKH : 25 JULAI 2022 (ISNIN)

SOALAN

TUAN BARU BIAN [SELANGAU] minta **MENTERI SUMBER MANUSIA** menyatakan :-

- (a)terdapat kekurangan tenaga kerja dalam industri perladangan dan pembinaan di Sarawak. Apa yang berlaku kepada 32,000 permit yang telah diumumkan untuk pekerja Indonesia untuk ladang kelapa sawit; dan
- (b)apakah rancangan Kerajaan untuk menyediakan pekerja untuk semua industri yang menghadapi kekurangan tenaga kerja.

JAWAPAN

Tuan Yang Di Pertua,

Bagi mengatasi masalah kekurangan pekerja dalam pelbagai sektor, Kementerian Sumber Manusia melalui Pertubuhan Keselamatan Sosial melaksanakan inisiatif di bawah Jamin Kerja Keluarga Malaysia atau Program JaminKerja Insentif Penggajian di bawah Sistem Insurans Pekerjaan dengan sasaran 300 ribu orang dan peruntukan sebanyak RM2 bilion.

Menerusi JaminKerja Insentif Penggajian, para majikan yang menggajikan individu yang tidak aktif bekerja bakal menerima insentif sebanyak 20 peratus daripada gaji bulanan bagi tempoh enam bulan pertama dan 30 peratus bagi 6 bulan berikutnya. Bagi golongan rentan pula, majikan layak menerima insentif sebanyak 30 peratus untuk 6 bulan pertama, sebelum dinaikkan kepada 40 peratus bagi 6 bulan berikutnya. Kadar insentif yang sama turut akan dipanjangkan bagi pengambilan pekerja golongan wanita yang telah mengganggur melebihi tempoh setahun, ibu tunggal dan suri rumah.

Selain itu, sebagai kesinambungan kejayaan Program Perantisan, JKIP akan meneruskan program ini dengan pemberian insentif RM900 sebulan untuk tempoh enam bulan kepada majikan yang menggajikan golongan perantis lepasan sekolah dan graduan berumur 18 hingga 30 tahun dalam jawatan Eksekutif. Golongan Perantis ini perlu ditawarkan kontrak 6 bulan dengan bayaran gaji minima RM1,500.

Kementerian melalui PERKESO juga telah menyediakan platform portal MYFutureJobs yang perlu dimanfaatkan oleh setiap pencari kerja. PERKESO turut mempergiatkan beberapa program bagi menggalakkan penyertaan tenaga kerja serta memastikan pengambilan pekerja dapat dilaksanakan dengan berkesan melalui program-program berikut :

- i. Program Karnival Kerjaya (Job Carnival);
- ii. Program Insentif Pengambilan Pekerja (*Hiring Incentive Programme*) ; dan
- iii. Program latihan kemahiran semula (*reskilling* dan *upskilling*) dan peningkatan kemahiran melalui Penyedia Latihan yang dilantik.

Di bawah JaminKerja Insentif Penggajian, perluasan Elaun Mencari Pekerjaan atau Program EMP+ turut diberikan kepada golongan yang tidak mencarum dengan PERKESO termasuklah graduan baharu, lepasan sekolah dan pekerja sektor tidak formal serta aktif mencari pekerjaan di dalam MYFutureJobs.

PERKESO turut bekerjasama dengan Kementerian Pengajian Tinggi dan Kementerian Belia dan Sukan untuk melaksanakan program-program penempatan pekerjaan dan giat menganjurkan aktiviti temu duga termasuk kepada golongan siswazah dan belia.

Selain itu, Sistem Insurans Pekerjaan juga menyediakan program-program bagi peningkatan modal insan dan kebolehpasaran pekerja seperti khidmat kaunseling kerjaya, pemprofilan kemahiran, penulisan *resume*, *mock interview*, latihan persediaan temuduga, latihan kemahiran bahasa dan penyampaian serta seminar pekerjaan bagi mereka yang mencari pekerjaan.

Untuk makluman Ahli Yang Berhormat,

-Kementerian melalui Pembangunan Sumber Manusia Berhad secara berterusan melaksanakan program latihan *reskilling* dan *upskilling*. Melalui Akta Pembangunan Sumber Manusia Berhad (Akta PSMB 2001), majikan yang berdaftar dengan PSMB akan membayar levi Pembangunan Sumber Manusia berjumlah 1% daripada gaji pekerja warganegara Malaysia dan levi tersebut boleh digunakan kembali bagi menggalakkan latihan dan pembangunan pekerja tempatan, perantis dan pelatih.

SOALAN NO :42

Melalui levi ini yang berperanan sebagai insentif latihan, majikan boleh menghantar pekerja tempatan mengikuti pelbagai aktiviti latihan peningkatan kemahiran dan latihan semula kemahiran melalui PSMB. Setakat Jun 2022, seramai 561,324 pelatih telah diluluskan merangkumi pelbagai sektor meliputi bidang latihan kemahiran; insaniah (*softskills*) dan teknikal.

Selain itu, PSMB telah membangunkan platform e-LATiH iaitu platform pembelajaran dalam talian untuk memberi peluang kepada rakyat Malaysia meningkatkan kemahiran dan pengetahuan bagi meningkatkan prospek pekerjaan dan keupayaan menjana pendapatan melalui pelbagai kursus pembangunan peribadi dan profesional secara percuma. Sehingga Jun 2022, seramai lebih 200 ribu pengguna telah berdaftar dengan e-LATiH dan lebih 400 ribu kursus telah diikuti.

PSMB juga menubuhkan **HRDCorp Placement Centre** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga Jun 2022, sebanyak **42,310 peluang pekerjaan tersedia** melalui HPC dan lebih **6,000 pekerja berjaya** ditempatkan melalui inisiatif ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
(SUNGAI SIPUT)**

TARIKH : 25.7.2022 (ISNIN)

SOALAN

TUAN KESAVAN A/L SUBRAMANIAM (SUNGAI SIPUT) minta **MENTERI PEMBANGUNAN LUAR BANDAR** menyatakan Kerajaan telah meluluskan peruntukan berjumlah RM93 juta bagi pelaksanaan Projek Membina Jalan Perhubungan dan Kampung Orang Asli (KOA) Bawong ke RPS Kemar serta jajaran jalan ke beberapa Kampung Orang Asli. Nyatakan status terkini projek tersebut.

JAWAPAN

Tuan Yang di-Pertua,

Untuk makluman Yang Berhormat, Kerajaan telah meluluskan peruntukan berjumlah RM90.0 juta bagi pelaksanaan Projek Membina Jalan Perhubungan Desa Dari KOA Bawong, Kuala Kangsar Ke RPS Kemar, Hulu Perak sepanjang 60 kilometer pada tahun 2021.

Walau bagaimanapun selepas mengadakan Makmal Kajian Nilai dan sesi libat urus bersama YAB Menteri Besar Perak, didapati terdapat keperluan untuk meminda skop dan kos projek disebabkan oleh perkara berikut;

- i. Anggaran kos bagi cadangan jajaran asal sepanjang 60 kilometer yang dikemukakan oleh Jabatan Kerja Raya adalah sebanyak RM160.0 juta, di mana kos ini melebihi siling projek yang diluluskan oleh Unit Perancang Ekonomi;
- ii. Jalan sedia ada dari KOA Bawong ke KOA Gentes telah mempunyai lapisan minitar berturap yang masih berkeadaan baik dan hanya memerlukan kerja-kerja pembaikan minor;
- iii. Jajaran jalan yang dicadangkan daripada KOA Bawong ke RPS Kemar terlibat dengan aktiviti pembalakan yang masih aktif. Dikhuatiri akan menyebabkan kerosakkan kepada jalan tersebut apabila ia siap dibina dan ini akan mengakibatkan pembaziran wang kerajaan; dan
- iv. Lokasi projek yang terletak jauh di kawasan pedalaman mempengaruhi kos pengangkutan dan kos logistik bahan binaan seterusnya menyebabkan berlakunya peningkatan kos projek.

Projek jalan yang menghubungkan KOA Bawong ke RPS Kemar akan dipinda kepada KOA Gentes ke RPS Kemar dengan jarak 23 kilometer dan kos berjumlah RM94.5 juta.

Permohonan pindaan skop dan peningkatan kos telah dikemukakan kepada Unit Perancang Ekonomi, Jabatan Perdana Menteri (UPE, JPM) untuk tindakan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI MOHD REDZUAN BIN MD
YUSOF [ALOR GAJAH]**

TARIKH : 25 JULAI 2022 (ISNIN)

SOALAN

DATUK SERI MOHD REDZUAN BIN MD YUSOF [ALOR GAJAH] minta **MENTERI SUMBER MANUSIA** menyatakan kadar purata kenaikan gaji di Malaysia.

JAWAPAN

Tuan Yang di-Pertua,

Pandemik COVID-19 memberi impak besar kepada ekonomi seluruh dunia termasuk pasaran buruh. Purata gaji dan upah bulanan pada tahun 2020 telah menunjukkan penurunan kali pertama sejak direkodkan mulai tahun 2010.

Data gaji dan upah terkini adalah berdasarkan Laporan Survei Gaji dan Upah bagi tahun 2020 yang diterbitkan Jabatan Perangkaan Malaysia. Berdasarkan laporan tersebut, pada tahun 2020, secara keseluruhannya, purata gaji dan upah bulanan menunjukkan penurunan sebanyak 9.0 peratus iaitu daripada RM3,224 pada tahun 2019 kepada RM2,933 pada tahun 2020.

Purata gaji dan upah bulanan bagi **bandar dan luar bandar** juga merosot pada tahun 2020. Purata gaji dan upah bulanan bagi pekerja di bandar menurun sebanyak 9.3 peratus kepada RM3,089 berbanding RM3,405 pada tahun 2019, manakala purata gaji dan upah bulanan bagi pekerja luar bandar menurun sebanyak 5.5 peratus kepada RM2,086 berbanding RM2,208 pada tahun 2019.

Tuan Yang di-Pertua,

Bagi purata gaji dan upah bulanan **mengikut kumpulan umur** pula, kumpulan umur 50 hingga 54 tahun merekodkan purata tertinggi dengan RM3,813 pada tahun 2020 berbanding RM4,125 pada tahun 2019. Kumpulan umur penerima terbesar bagi purata gaji dan upah bulanan iaitu umur 25 hingga 29 tahun merekodkan penurunan sebanyak RM357 dengan mencatatkan RM2,229 berbanding dengan RM2,586 pada tahun 2019.

Dari segi **pencapaian pendidikan** pula, purata gaji dan upah bulanan bagi semua pekerja menurun buat pertama kali terutamanya bagi pendidikan rendah dan menengah. Ini berikutan krisis kesihatan COVID-19 yang menyebabkan permintaan buruh merosot secara keseluruhannya. Ini telah mendorong kepada persaingan yang tinggi dalam pasaran buruh dan menjadi salah satu faktor pencari kerja terutamanya dalam kalangan graduan untuk menerima sebarang pekerjaan tanpa mengira kelayakan mereka bagi kelangsungan hidup. Sehubungan itu, purata gaji dan upah bulanan menunjukkan penurunan di mana pendidikan tertiar mencatatkan RM4,171 dengan pengurangan sebanyak 10.2 peratus atau RM472, pendidikan menengah merekodkan RM2,125 turun sebanyak 10.4 peratus atau RM247 dan pendidikan rendah pada RM1,556 menurun sebanyak 19.3 peratus atau RM373. Manakala, tiada pendidikan rasmi terus menurun sebanyak 10.0 peratus atau RM161 kepada RM1,447.

Berikutan pembukaan dan pemulihan semula ekonomi selepas pandemik, keadaan pasaran buruh juga dijangka bertambah baik. Maklumat gaji dan upah bagi tahun 2021 dijangka akan diterbitkan pada hujung tahun 2022.

Tuan Yang di-Pertua,

Dalam tempoh Rancangan Malaysia Kedua Belas, Kerajaan akan terus mempergiat usaha untuk meningkatkan sumbangan pampasan pekerja terhadap Keluaran Dalam Negeri Kasar (KDNK) sebanyak 40% menjelang tahun 2025 dan 48% menjelang tahun 2030 selaras dengan Wawasan Kemakmuran Bersama. Dalam masa yang sama, sasaran gaji dan upah penengah bulanan sebanyak RM2,900 dijangka akan dapat dicapai menjelang tahun 2025. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH JAWAB : 25 JULAI 2022 (ISNIN)

SOALAN

YB TUAN SABRI BIN AZIT [JERAI] minta **MENTERI PERUMAHAN DAN KERAJAAN TEMPATAN** menyatakan adakah wujud perancangan untuk mewajibkan pemaju perumahan menyiapkan dahulu rumah untuk dijual sebelum dijual kepada pembeli bagi mengelak projek perumahan terbengkalai yang akhirnya merugikan pembeli.

JAWAPAN

Tuan Yang di-Pertua,

Saya mengucapkan terima kasih kepada Ahli Yang Berhormat atas pertanyaan berkaitan konsep *Build-Then-Sell* bagi mengelakkan masalah projek perumahan terbengkalai yang merugikan pembeli.

Untuk makluman Ahli Yang Berhormat, Kerajaan melalui Dasar Perumahan Negara (DRN) menggalakkan konsep pembinaan secara *Build-Then-Sell* 10:90 bagi pemajuan perumahan swasta. Melalui kaedah pembinaan *Build-Then-Sell* ini, pemaju akan mengenakan 10% wang pendahuluan daripada harga jualan kepada pembeli, manakala baki 90% pula akan dibayar setelah rumah tersebut siap dengan Perakuan Siap dan Pematuhan (CCC) serta penyerahan pemilikan kosong.

Bagi pelaksanaan kaedah ini, Akta Pemajuan Perumahan (Kawalan dan Pelesenan) 1966 (Akta 118) dan peraturan-peraturannya telah memperuntukkan Jadual I dan Jadual J iaitu perjanjian jual beli bagi pembinaan pemajuan perumahan secara *Build-Then-Sell* 10:90. Berdasarkan maklumat daripada Housing Integrated Management System (HIMS), dari tahun 1993 hingga 28 Jun 2022, terdapat sebanyak 612 projek merangkumi 79,067 unit rumah yang telah dibina di bawah inisiatif *Build-Then-Sell* 10:90.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 25.07.2022 (ISNIN)

SOALAN

PUAN VIVIAN WONG SHIR YEE [SANDAKAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah yang diambil oleh Kementerian untuk memastikan bekalan minyak masak paket 1 kilogram bersubsidi adalah mencukupi untuk pengguna tempatan, khususnya di Sabah.

JAWAPAN

Tuan Yang di-Pertua,

Kerajaan menzahirkan komitmen tinggi bagi memastikan bekalan minyak masak paket bersubsidi mencukupi dan sampai kepada golongan sasar khususnya di Sabah. KPDNHEP telah melaksanakan tindakan seperti berikut:

- i. Mengarahkan pemeriksaan dan pengauditan di setiap peringkat rantai pengedaran minyak masak melalui aktiviti semakan Pre-Delivery Plan;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM);
- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga; dan
- vii. Melaksanakan Pemeriksaan Ops ATM melibatkan barang kawalan seperti ayam, telur dan minyak masak secara harian di setiap peringkat rantai pembekalan dan pengedaran bertujuan untuk memastikan keberadaan bekalan adalah stabil dan tiada isu berkaitan kegiatan sorok barang kawalan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEEMPAT
PARLIMEN KEEMPAT BELAS**

PERTANYAAN : LISAN

TARIKH : 25 JULAI 2022 (ISNIN)

DARIPADA : TUAN CHA KEE CHIN [RASAH]

SOALAN

minta **MENTERI PERPADUAN NEGARA** menyatakan berapa dan bagaimanakah peruntukan daripada Kerajaan pusat akan disalurkan kepada setiap kampung baru terutamanya di Negeri Sembilan.

JAWAPAN

Tuan Yang di-Pertua,

1. Peranan dan fungsi Bahagian Kampung Baru Cina telah dipindahkan dari Kementerian Perumahan dan Kerajaan Tempatan (KPKT) ke Kementerian Perpaduan Negara **berkuatkuasa pada 1 Januari 2022**. Pada masa ini terdapat sebanyak **613 buah kampung baru** di seluruh negara.
2. Peruntukan sebanyak **RM7.08 juta** telah disediakan untuk pembangunan **59 buah Kampung Baru Cina di Negeri Sembilan**.
3. Pengagihan peruntukan ini adalah **berdasarkan kepada keperluan Jawatankuasa Pembangunan dan Keselamatan Kampung Persekutuan (JPKKP)**.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SYED ABU HUSSIN BIN HAFIZ
SYED ABDUL FASAL
[BUKIT GANTANG]**

TARIKH : 25 JULAI 2022 (ISNIN)

SOALAN

YB DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI PERUMAHAN DAN KERAJAAN TEMPATAN** menyatakan status terakhir projek naik taraf Jeti Kuala Sepetang yang bernilai RM2 juta seperti mana yang diluluskan oleh YB Menteri semasa lawatan kerja pada 13 Januari 2020.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah mengemukakan permohonan projek Menaik Taraf Jeti Kuala Sepetang kepada Unit Perancang Ekonomi, Jabatan Perdana Menteri (UPE, JPM) pada 23 April 2021 untuk pertimbangan bagi pelaksanaan dalam tempoh *Rolling Plan* Kedua (RP2) bagi tahun 2022. Walau bagaimanapun, permohonan projek tersebut tidak diluluskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 25 JULAI 2022 (ISNIN)

SOALAN

TUAN CHONG CHIENG JEN [STAMPIN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah sebabnya walaupun Kementerian masih mengekalkan kuota minyak masak bersubsidi sebanyak 60,000 tan metrik setiap bulan tetapi minyak paket 1kg yang bersubsidi itu susah didapati di pasaran pada harga RM2.45 sekilo.

JAWAPAN

Tuan Yang di-Pertua,

Kerajaan masih mengekalkan subsidi minyak masak, dengan jumlah sebanyak RM4 bilion untuk tahun 2022 berbanding RM500 juta pada tahun 2020 dan RM2.2 bilion pada 2021. Minyak masak yang disubsidi oleh Kerajaan ialah sebanyak 60 ribu tan metrik sebulan, melebihi daripada keperluan sebenar pengguna iaitu sebanyak 55 ribu tan metrik sebulan. Subsidi yang ditanggung oleh Kerajaan ini adalah untuk kategori minyak masak kempit RM2.50 bagi satu kilogram (kg) sahaja, berbanding harga pasaran sebenar, RM9.00/kg. Subsidi ini telah bermula sejak Jun 2007.

Sehubungan itu, Kerajaan membuat keputusan mulai 1 Julai 2022 untuk tidak lagi menyambung subsidi untuk minyak masak berbotol kerana objektif awal program ini adalah untuk membantu golongan terkesan pandemik. Untuk itu, subsidi minyak masak kempit sahaja yang akan

diteruskan dan Kerajaan yakin subsidi sebanyak 60 ribu tan metrik sebulan adalah mencukupi untuk kegunaan Keluarga Malaysia.

Harga kawalan yang rendah iaitu RM2.50 bagi minyak masak subsidi polibeg 1 kilogram menjadi faktor utama mengapa minyak masak tersebut menjadi pilihan utama. Jurang harga yang ketara di antara minyak masak subsidi polibeg 1 kilogram dengan minyak masak botol 5 kilogram telah menyebabkan minyak masak polibeg tersebut mendapat permintaan yang tinggi di kalangan pengguna.

Walaupun Kerajaan telah menetapkan minyak masak subsidi polibeg 1 kilogram hanya untuk kegunaan isi rumah domestik, peniaga-peniaga kecil dan sederhana turut mengambil peluang untuk menggunakan minyak masak polibeg tersebut bagi mengurangkan kos operasi dalam perniagaan mereka. Pembelian dalam kuantiti yang banyak oleh peniaga dalam satu-satu masa telah mengakibatkan bekalan minyak masak polibeg itu sering kehabisan stok di kedai-kedai runcit dan pasaraya.

Sebagaimana sedia maklum, syarikat-syarikat pembungkus minyak masak diberi kuota pengeluaran bagi minyak masak subsidi polibeg 1 kilogram. Oleh disebabkan permintaan yang tinggi bagi minyak masak polibeg tersebut, di tambah pula *trend* pembelian meningkat semasa musim-musim perayaan dan cuti, kuota pengeluaran minyak masak polibeg mencapai had lebih awal dari kebiasaan. Ini menyebabkan berlaku gangguan pembekalan di peringkat pemborong terutama menjelang hujung bulan.

Selain itu, harga yang rendah berbanding negara-negara jiran telah menyebabkan minyak masak polibeg di Malaysia menjadi antara barangan yang sering diseludup keluar. Aktiviti penyeludupan tidak dinafikan turut menjadi punca berlaku kekurangan minyak masak subsidi polibeg 1 kilogram di pasaran tempatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 25 JULAI 2022 (ISNIN)

SOALAN

DATIN PADUKA DR. TAN YEE KEW minta **MENTERI KESIHATAN** menyatakan cara bagi menangani peningkatan jumlah pesakit buah pinggang Tahap 5 memandangkan penyakit ini tidak lagi boleh dicegah dan hanya boleh dirawat menggunakan mesin dialisis sepanjang hayat ataupun menunggu organ daripada penderma.

JAWAPAN

Tuan Yang di-Pertua,

1. Selaras dengan pertambahan pesakit memerlukan rawatan dialisis di seluruh negara, KKM mempergiatkan usaha dalam memperluaskan kaedah rawatan dialisis secara *Continuous Ambulatory Peritoneal Dialysis* (CAPD). Kaedah rawatan CAPD dapat dilakukan di rumah oleh pesakit sendiri dan dapat mengurangkan keperluan kemudahan hemodialisis. Sebanyak RM25 juta peruntukan yang diberikan setahun bagi perluasan kaedah rawatan dialisis peritoneal.
2. Penyakit buah pinggang adalah salah satu penyakit tidak berjangkit (NCD) yang disasar untuk diperkukuhkan inisiatif dari segi pencegahan, selain perluasan dari segi komponen rawatan. KKM komited dalam usaha mengurangkan prevalens penyakit kegagalan buah pinggang melalui

Pelan Tindakan Kesihatan Buah Pinggang 2018-2025 yang menggariskan empat (4) objektif utama iaitu:

- (i) Pencegahan Utama:
Melalui program pencegahan primer bersepadu bagi penyakit tidak berjangkit;
- (ii) Pengesanan Awal dan Pencegahan Sekunder:
 - a. Menyediakan perkhidmatan bersepadu dalam pengesanan dan pengurusan *Chronic Kidney Disease* (CKD); dan
 - b. Mewujudkan kerjasama pelbagai disiplin yang mampan dan pendekatan kesihatan komuniti untuk memenuhi keperluan pesakit CKD.
- (iii) Memperluaskan dan meningkatkan pilihan rawatan untuk pesakit dengan buah pinggang peringkat akhir penyakit; dan
- (iv) Membangun dan mengekalkan komponen penyelidikan yang kukuh untuk memacu dasar dan amalan bagi kesihatan buah pinggang.

3. Pelan Strategik Penyakit Tidak Berjangkit (*Non-Communicable Disease*, NCD) 2016-2025 menyediakan rangka kerja yang menyeluruh untuk pengukuhan pencegahan dan pengawalan NCD di Malaysia. Antara inisiatif yang telah dijalankan adalah Pilihan Dasar untuk Membanteras Obesiti di Malaysia 2016-2025, Strategi Pengurangan Garam untuk Mencegah dan Mengawal NCD Untuk Malaysia 2015-2020, Pelan Strategik Kebangsaan untuk Hidup Aktif 2016-2025 dan memperkukuh pengurusan penyakit kronik di Kesihatan Primer melalui Inisiatif Penjagaan Kesihatan Primer Dipertingkat (EnPHC).

4. Inisiatif lain juga telah dilaksanakan yang melibatkan komuniti dan perubahan tingkahlaku dalam menangani NCD seperti Program Komuniti Sihat Pembina Negara (KOSPEN) dan Agenda Nasional Malaysia Sihat (ANMS).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK MOHAMAD ABDUH BIN
NIK ABDUL AZIZ (BACHOK)**

TARIKH : 25.7.2022 (ISNIN)

SOALAN

TUAN NIK MOHAMAD ABDUH BIN NIK ABDUL AZIZ (BACHOK)
minta **MENTERI PEMBANGUNAN LUAR BANDAR** menyatakan
apakah perancangan Kementerian untuk membina Kolej Profesional
MARA di Bachok untuk meningkatkan akses pendidikan tinggi kepada
calon lepasan SPM.

JAWAPAN

Tuan Yang di-Pertua,

Projek Pembinaan Kolej Profesional MARA (KPM) Bachok, Kelantan telah diluluskan dalam Rolling Plan Keempat (RP4) Rancangan Malaysia Kesebelas (RMKe-11) pada tahun 2019 dengan kos projek sebanyak RM81.1 juta.

Untuk makluman Yang Berhormat, projek Pembinaan KPM Bachok ini telah ditangguhkan pelaksanaannya oleh Unit Perancang Ekonomi, Jabatan Perdana Menteri (UPE, JPM) pada 29 November 2019.

MARA telah mengemukakan permohonan untuk meneruskan semula projek ini. Namun sehingga kini, pihak UPE, JPM kekal dengan keputusan untuk menangguhkan pelaksanaan projek ini supaya MARA dapat memberi fokus terhadap pembinaan tujuh (7) buah Maktab Rendah Sains MARA (MRSM) dan dua (2) buah KPM di bawah Rancangan Malaysia Kedua Belas (RMKe-12).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 25.07.2022 (ISNIN)

SOALAN

PUAN NOORITA BINTI SUAL [TENOM] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan pelan proaktif yang diambil oleh Kementerian bagi mengenal pasti punca dan penyelesaian terhadap kenaikan harga ayam, telur, dan barang-barang keperluan lain dan setakat ini berapa kes yang telah diambil oleh Kementerian bagi mendakwa peniaga yang dengan sesuka hati menaikkan harga barang-barang keperluan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, isu inflasi yang dihadapi oleh Malaysia adalah bersifat global yang disebabkan oleh gangguan berpunca daripada pandemik COVID-19. Ini menyebabkan pelbagai komoditi utama dunia seperti jagung, soya, gandum dan gula meningkat harganya selain kos perkapalan yang turut meningkat mendadak. Keadaan itu menjadi lebih teruk terutamanya pada permulaan perang Rusia – Ukraine.

Mengambil kira semangat Keluarga Malaysia, antara langkah jangka pendek dan jangka panjang yang diambil bagi mengurangkan kesan kenaikan harga barangan adalah seperti berikut:

- i. RM1.1 bilion diperuntukkan kepada subsidi ayam dan telur bagi menstabilkan harga kedua-dua produk ini;
- ii. Kerajaan juga dijangka membelanjakan subsidi minyak masak

polibeg 1 kg sehingga RM4 bilion pada tahun ini. Jumlah ini naik secara mendadak berbanding keperluan pada tahun 2020 dan 2021;

- iii. Bagi memastikan keberadaan bekalan minyak masak di pasaran serta minyak masak bersubsidi 1 kg ini dinikmati oleh pihak yang sepatutnya, KPDNHEP melaksanakan penguatkuasaan serta operasi membanteras penyeludupan dengan menggerakkan lebih kurang 2,200 anggota penguatkuasa seluruh negara;
- iv. Kerajaan juga terus mengekalkan harga RON95 sekaligus menyebabkan Kerajaan menanggung perbelanjaan yang besar bagi membantu rakyat. Dengan tidak menaikkan harga RON95 ia telah memberi ruang supaya harga barangan dan perkhidmatan kekal stabil; dan
- v. Bagi membolehkan rakyat mendapat akses untuk membeli barangan pada harga berpatutan, Kerajaan meneruskan Program Jualan Keluarga Malaysia (PJKM) dengan peruntukan sebanyak RM100 juta melibatkan 222 kawasan Parlimen terlibat tanpa mengira status kawasan Parlimen tersebut.

Benar, kita tidak dapat menghalang kenaikan kerana ia adalah disebabkan faktor inflasi global. Namun, impaknya dikurangkan dengan strategi-strategi yang telah dirangka oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 25 JULAI 2022 (ISNIN)

SOALAN

DATUK WILSON UGAK ANAK KUMBONG [HULU RAJANG] minta
MENTERI BELIADAN SUKAN menyatakan :-

- (a) status terkini Stadium Pekan Belaga; dan
- (b) adakah pihak Kementerian mempunyai perancangan bagi membangunkan sukan massa di luar bandar seperti futsal dan bola tampar di kawasan luar bandar terutama di kawasan Parlimen P216 Hulu Rajang.

JAWAPAN

Tan Sri Yang di-Pertua,

(a) Status Terkini Stadium Pekan Belaga

Untuk makluman Ahli Yang Berhormat, Kementerian Belia dan Sukan (KBS) belum mempunyai perancangan untuk membina Stadium Pekan Belaga. Ahli Yang Berhormat boleh mengemukakan permohonan untuk membina Stadium ini di dalam Rolling Plan seterusnya Rancangan Malaysia Kedua Belas (RMKe-12).

(b) Kementerian Mempunyai Perancangan Bagi Membangunkan Sukan MASSA Di Luar Bandar Seperti Futsal Dan Bola Tampar Di Kawasan Luar Bandar Terutama Di Kawasan Parlimen P216 Hulu Rajang

Seiring dengan prinsip Kerajaan untuk memastikan “tiada Keluarga Malaysia yang tercicir atau terpinggir”, pelaksanaan program dan aktiviti pembangunan sukan untuk semua turut merangkumi kawasan luar bandar dan pedalaman di seluruh negara. Bermula tahun 2018 sehingga tahun 2019 Kementerian Belia dan Sukan (KBS) telah melaksanakan sebanyak 66 aktiviti Sukan Luar Bandar melibatkan penyertaan seramai 31,816 orang.

Walau bagaimanapun, pada tahun 2020 dan 2021 program ini dihentikan sementara bagi mengawal penularan jangkitan COVID-19. Pada tahun ini Kementerian meneruskan lagi program Sukan Luar Bandar dan telah merancang sebanyak 14 program Aktif @ Sukan Luar Bandar KBS 2022.

Program ini merupakan aktiviti sukan yang melibatkan penyertaan komuniti luar bandar atau mana-mana kawasan bersesuaian di seluruh negara. Sejumlah RM244,000.00 diperuntukan untuk pelaksanaan program Aktif @ Sukan Luar Bandar KBS 2022 di 14 negeri seluruh Malaysia dengan menyasarkan 7,000 orang penyertaan termasuk di Sarawak.

Sehingga Jun 2022 sebanyak dua (2) program Aktif @ Sukan Luar Bandar KBS 2022 telah dilaksanakan iaitu di Sabah dan Wilayah Persekutuan Labuan. Pelaksanaan program Aktif @ Luar Bandar Peringkat Negeri Sarawak akan dilaksanakan pada 23 hingga 27 Julai 2022 bertempat di Kampung Telian, Mukah dengan menyasarkan 500 penyertaan dari komuniti setempat. Pada tahun ini Kementerian telah memperkenalkan program baharu iaitu Liga Sukan Malaysia (MSL) dan 1000 Liga yang turut menyasarkan penglibatan komuniti sehingga ke peringkat daerah di seluruh Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN NOR AZRINA BT. SURIP (MERBOK)

TARIKH : 25 JULAI 2022 (ISNIN)

SOALAN

PUAN NOR AZRINA BINTI SURIP (MERBOK) minta **MENTERI DALAM NEGERI** menyatakan berapa bilangan permohonan kewarganegaraan yang diterima, diluluskan dan ditolak melalui Perkara 15(2) dalam tempoh 5 tahun lepas. Nyatakan secara terperinci SOP dan KPI semasa Kementerian mengenai jangka masa dan kriteria untuk memproseskan dan meluluskan permohonan-permohonan ini.

JAWAPAN

Tuan Yang Di Pertua,

Untuk makluman Ahli Yang Berhormat, Berdasarkan rekod Jabatan Pendaftaran Negara (JPN), jumlah permohonan kewarganegaraan di bawah Perkara 15(2) Perlembagaan Persekutuan yang diterima dari tahun 2018 hingga Jun 2022 adalah sebanyak **3407 permohonan**. Daripada jumlah tersebut, sebanyak **19 permohonan** telah diluluskan dan sebanyak **7 telah ditolak**.

Setiap permohonan kewarganegaraan yang diterima oleh KDN dan JPN akan diproses dan diteliti dengan sewajarnya sebelum sesuatu keputusan dikeluarkan. Beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen.

Permohonan kewarganegaraan dikemukakan secara berasingan dengan kandungan maklumat dan dokumen sokongan yang berbeza-beza, maka hasil penilaian dan pertimbangan juga adalah berbeza mengikut keperluan, bukti dan fakta kes berdasarkan maklumat yang diberikan. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes. Sukacita diingatkan bahawa syarat-syarat yang ditetapkan dalam Perlembagaan Persekutuan hanya melayakkan permohonan dikemukakan tetapi tidak menjamin bahawa permohonan akan diluluska

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN ANYI NGAU [BARAM]

TARIKH : 25 JULAI 2022 (ISNIN)

SOALAN

TUAN ANYI NGAU minta **MENTERI KESIHATAN** menyatakan rancangan Kementerian untuk membaik pulih Klinik Desa Long Banga, Long Moh, Beluru, Bario, Mulu, Long Jegan, Long Teran, Ulu Teru, Long Seridan, Long Lama, Long Miri, Long Naah, Long Jeeh, Long Jekitan, Long Teru dan sebagainya memandangkan keadaan klinik keadaan klinik-klinik tersebut adalah daif dan uzur di samping kekurangan kemudahan seperti bekalan elektrik, kuarters dan sebagainya. Mohon jelaskan juga status pelaksanaan Klinik Kesihatan Long San sehingga kini.

JAWAPAN

Tuan Yang di-Pertua,

1. Kementerian Kesihatan Malaysia (KKM) mengambil maklum terhadap keadaan klinik-klinik daif dan uzur yang masih terdapat di seluruh negara. Berdasarkan maklumat usia fasiliti klinik, di Sarawak terdapat 156 buah fasiliti berusia 21 hingga 50 tahun iaitu 53.2% dan 37 fasiliti berusia melebihi 50 tahun iaitu 12.6%.

2. Di dalam Rancangan Malaysia Ke-12, *Rolling Plan-2*, (RP2) Sarawak telah mendapat kelulusan peruntukan sebanyak RM1.03 juta untuk empat (4) Klinik Kesihatan iaitu KK long Jegan, KK Lingga, KK Nanga Mujau dan KK Tanjung Embang yang melibatkan kerja-kerja pembaikan dan naik taraf bangunan, sistem kejuruteraan dan infra di

klirik sedia ada. Untuk permohonan RMK-12 RP3, sebanyak RM1.34 juta melibatkan enam (6) klinik iaitu KK Kedup, KK Long Banga, KK Lusong Laku, KK Banga Ngungun, KK Long Semadoh dan KK KK Nyalau akan dilaksanakan sekiranya permohonan diluluskan.

3. KKM akan terus memohon peruntukan untuk pembaikan dan naiktaraf fasiliti dan klinik-klinik kesihatan terutamanya di luar bandar yang uzur dan daif bagi meningkatkan kesediaan fasiliti berkenaan dalam menyediakan perkhidmatan kesihatan yang terbaik kepada rakyat.

4. Atas faktor keselamatan dan tidak ekonomik untuk dinaik taraf dan dibaiki melibatkan klinik-klinik yang berusia melebihi 50 tahun dan ke atas, KKM akan mencadangkan klinik-klinik tersebut diganti dengan bangunan baru dengan mengambil kira keperluan populasi dan perkhidmatan yang akan diberikan serta liputan perkhidmatan kesihatan berdasarkan kepada kelulusan peruntukan yang diperolehi.

Tuan Yang di-Pertua,

5. Projek Klinik Kesihatan (Jenis 5) Dengan Kuarters Long San telah diluluskan pada tahun 2020 dengan kos sebanyak RM27.7 juta. KKM telah memperolehi kelulusan tapak projek daripada Kerajaan Negeri Sarawak pada 15 Disember 2020 dan melantik Jabatan Kerja Raya (JKR) Malaysia sebagai agensi pelaksana projek ini pada 12 Januari 2021.

6. Setelah mengambil kira keperluan mendesak, KKM telah memutuskan untuk memperluaskan skop projek ini dengan tambahan kemudahan X-ray, makmal, katil bersalin dan katil pemerhatian serta zon penyakit berjangkit. Oleh itu, JKR perlu membuat penambahbaikan kepada reka bentuk yang disediakan mengikut skop keperluan terkini.

7. Pada masa ini KKM dan JKR sedang memuktamadkan Jadual Keperluan Ruang dan Anggaran Kos Projek. Projek ini dijangka akan ditender pada bulan November 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : TUAN SIVAKUMAR VARATHARAJU
NAIDU (BATU GAJAH)**

TARIKH : 25 JULAI 2022 (ISNIN)

SOALAN

TUAN SIVAKUMAR VARATHARAJU NAIDU (BATU GAJAH) minta **MENTERI DALAM NEGERI** menyatakan jumlah pengambilan tenaga kerja mengikut ke dalam Pasukan Polis Diraja Malaysia (PDRM) sejak tahun 2020 sehingga kini. apakah usaha-usaha kerajaan untuk menggalakkan lebih ramai kaum bukan bumiputera diserapkan ke dalam PDRM.

JAWAPAN

Tuan Yang di-Pertua,

PDRM sentiasa memberi galakan kepada semua kaum untuk menyertai pasukan. Galakan juga diberikan kepada kaum belia Cina dan India untuk menyertai pasukan PDRM bagi memenuhi keperluan tugas dan kehendak masyarakat dari semasa ke semasa.

PDRM telah melaksanakan Pengambilan Khas Jawatan Konstabel Polis Gred YA1 Bukan Bumiputera (Lelaki/Wanita) Tahun 2021. Pengambilan khas ini telah memberikan kelonggaran syarat kelulusan kepada calon-calon bukan bumiputera yang tidak mempunyai kepujian dalam Bahasa Malaysia untuk memohon disamping syarat-syarat lain dipatuhi. Kelonggaran syarat ini hanya terpakai kepada calon yang telah dilantik ke dalam jawatan dan dikehendaki menduduki peperiksaan Kertas Julai Bahasa Malaysia bagi memenuhi syarat

wajib Skim Perkhidmatan dalam tempoh pengesahan jawatan. Seramai 2,335 calon Bukan Bumiputera telah dipanggil untuk menghadiri Ujian Pemeriksaan Fizikal pada 5 Oktober 2021 hingga 17 Oktober 2021. Eksesais pengambilan khas ini telah berlangsung dan selesai pada awal tahun 2022.

Hasil daripada program ini, PDRM akan dapat melahirkan warga PDRM daripada kalangan bukan bumiputera terutamanya kaum belia Cina dan India yang dapat membantu pasukan dalam memerangi jenayah seperti gengsterisme, kongsi gelap dan lain-lain unsur jenayah yang melibatkan penyertaan sesetengah kaum.

Program pengambilan khas ini juga mendapat sambutan yang baik terutamanya penglibatan kaum India berbanding lain-lain kaum. Berikut merupakan perangkaan kehadiran calon yang lulus Ujian Pemeriksaan Fizikal 5 Oktober 2021 hingga 15 Oktober 2021.

BIL	BANGSA		LELAKI	WANITA	JUMLAH
1.	Cina	:	55	26	81
2.	India	:	699	405	1104
3.	Lain-lain Bangsa	:	10	5	15
Jumlah		:	764	436	1200

*Jumlah calon yang dinyatakan adalah jumlah calon yang lulus Ujian Pemeriksaan Fizikal mengikut pecahan bangsa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN R. SIVARASA (SUNGAI BULOH)

TARIKH : 25 JULAI 2022 (ISNIN)

SOALAN

TUAN R. SIVARASA (SUNGAI BULOH) minta **MENTERI DALAM NEGERI** menyatakan apakah hasil siasatan Kerajaan terhadap insiden di Pusat Tahanan Imigresen Sementara Sungai Bakap pada 20 April 2022 yang telah menyebabkan kematian enam individu.

JAWAPAN

Tuan Yang Di Pertua,

Untuk makluman Ahli Yang Berhormat, Jawatankuasa Teknikal Pengurusan Darurat Bil. 2/2021 dan Sidang Darurat Majlis Keselamatan Negara pada 19 Januari 2021 antara lain telah bersetuju supaya JIM membuat perolehan perkhidmatan tiga buah Kem Program Latihan Khidmat Negara (PLKN) termasuk Kem Sri Impian di Sg. Bakap sebagai Depot Imigresen Sementara. Langkah jangka sederhana tersebut dilaksanakan bagi mengurangkan kesesakan di depot imigresen sedia ada dan mengawal risiko penularan jangkitan COVID-19 dalam kalangan tahanan termasuklah tahanan baharu serta pegawai.

Semasa kejadian, DIS Sg. Bakap menempatkan 664 orang tahanan iaitu 95% daripada kapasiti sebenar. Hasil siasatan mendapati insiden pembolosan 528 orang tahanan tersebut berpunca daripada rusuhan tahanan di Depot Imigresen Sementara Sg. Bakap. Sehingga 10 Julai 2022, seramai 458 orang tahanan berjaya ditangkap semula dan 62 orang masih bebas. Manakala, lapan orang tahanan telah meninggal dunia akibat kemalangan dalam cubaan melintas lebuh raya.

Kementerian Dalam Negeri melalui Jabatan Imigresen Malaysia komited dalam memastikan kebajikan dan keselamatan semua tahanan depot imigresen terpelihara. Antara langkah-langkah yang diambil termasuklah:

- (i) menyediakan perkhidmatan kesihatan percuma melalui penempatan penolong pegawai perubatan Gred U29/32 di depot-depot Imigresen sementara;
- (ii) penyediaan makanan berkhasiat sebanyak empat kali sehari mengikut spesifikasi yang diluluskan oleh Bahagian Pemakanan, Kementerian Kesihatan Malaysia; dan

- (iii) menaiktaraf infrastruktur blok tahanan dari masa ke semasa agar tahap keselamatan sentiasa terjamin dan menyediakan fasiliti untuk blok wanita dan kanak-kanak serta menjalankan aktiviti pembelajaran asas serta aktiviti riadah ringan.

Manakala bagi memastikan kejadian tersebut tidak berulang, JIM telah mengambil langkah-langkah seperti berikut:

- (i) meningkatkan ciri-ciri keselamatan di depot imigresen dengan pemasangan pagar *anti-climb* dan pagar kawat besi;
- (ii) meningkatkan kawalan keselamatan dengan bantuan anggota RELA; dan
- (iii) mempergiat aktiviti pengusiran tahanan ke negara asal.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ROBERT LAWSON CHUAT
[BETONG]**

TARIKH : 25.07.2022 (ISNIN)

SOALAN

DATUK ROBERT LAWSON CHUAT [BETONG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan status pelaksanaan misi francais antarabangsa terutama pengembangan francais tempatan di negara ASEAN dan Timur Tengah.

JAWAPAN

Tuan Yang di-Pertua,

Program Pengembangan Perdagangan Francais (EFDP) adalah program pengantarabangsaan yang dilaksanakan oleh Kementerian Perdagangan Dalam Negeri Dan Hal Ehwal Pengguna (KPDNHEP) sejak tahun 2015. Program ini dilaksanakan dengan kerjasama Kementerian bersama Persatuan Francais Malaysia (MFA). Objektif utama program EFDP ini adalah bagi meningkatkan eksport industri francais ke luar negara menerusi Misi Perdagangan Francais Antarabangsa.

Sejak tahun 2015, KPDNHEP dan MFA telah melaksanakan 14 program misi perdagangan francais antarabangsa. Di dalam program ini juga diadakan program pameran oleh syarikat francais, padanan perniagaan dan juga lawatan ke syarikat-syarikat francais.

Pelaksanaan misi perdagangan francais ini telah berjaya membawa syarikat-syarikat francais tempatan ke peringkat antarabangsa. Buat masa ini, terdapat 32 jenama di 19 negara ASEAN, Asia Pasifik dan Timur Tengah. Jenama-jenama tempatan yang telah menembusi pasaran antarabangsa adalah Marrybrown, PONEY, Global Art, Smart Reader Kids, CIC International Inc, Genius Aulad, Little Caliph, Siti Khadijah dan US Pizza.

Dalam hal ini, permintaan produk francais yang berasaskan pembelajaran awal kanak-kanak mendapat permintaan yang amat tinggi semenjak pandemik Covid-19 bermula.

Pada masa yang sama, Kementerian akan menggiatkan lagi promosi Francais Malaysia ke seluruh Negara Asia Pasifik seperti, New Zealand, Taiwan, Macau, Cambodia dan Myanmar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : DATO' SRI ABDUL AZEEZ BIN
ABDUL RAHIM [BALING]**

TARIKH : 25 JULAI 2022 (ISNIN)

SOALAN

Dato' Sri Abdul Azeez bin Abdul Rahim [Baling] minta **MENTERI PENGANGKUTAN** menyatakan selaras dengan penurunan had umur penunggang kenderaan p-hailing daripada 21 kepada 18 tahun, apakah perancangan Kerajaan untuk meningkatkan keselamatan pengguna jalan raya khususnya penunggang motosikal yang dilihat menunggang secara merbahaya dan semakin membanjiri jalan-jalan utama terutama di ibu kota.

JAWAPAN

Tuan Yang Di Pertua,

1. Penurunan had umur 21 tahun ke 18 tahun bagi penunggang motosikal yang bekerja sebagai penghantar barangan (*p-hailing*) adalah untuk mendapatkan Lesen Vokasional susulan daripada kemunculan sektor penghantaran barangan yang menggunakan motosikal ekoran penularan wabak COVID-19. Sektor penghantaran barangan ini telah menjadi satu pilihan utama rakyat Malaysia untuk mencari peluang pekerjaan, terutamanya bagi mereka yang telah hilang pekerjaan tetap ataupun yang mencari peluang pendapatan tambahan/sampingan.
2. Pada masa ini, terdapat golongan belia di lingkungan umur 18 hingga 20 tahun yang telah pun mempunyai Lesen Memandu

Kompeten, bekerja - sama ada secara sampingan mahupun tetap dalam sektor penghantaran barangan. Mengambil kira akan perkara ini, Kerajaan telah memutuskan untuk menurunkan syarat had umur kepada 18 tahun bagi mendapatkan Lesen Vokasional untuk bekerja sebagai penghantar barangan (*p-hailing*).

3. Antara langkah-langkah yang telah dan akan diambil bagi meningkatkan tahap keselamatan penunggang adalah:-

- (i) Kerajaan telah bersetuju untuk mengawal selia perkhidmatan penghantaran barangan terutamanya yang disediakan di bawah satu perniagaan pengantaraan (*p-hailing*) agar perkhidmatan yang disediakan adalah **sah dari segi undang-undang**. Perkara ini akan memastikan kebajikan penunggang akan dapat dilindungi, termasuk memastikan terdapatnya kawalan ke atas tahap penyediaan perkhidmatan dan tanggungjawab oleh syarikat penyedia perkhidmatan, tingkah laku pemandu untuk mematuhi semua peraturan jalan raya serta kebajikan pemandu dari aspek perlindungan pekerjaan dan insurans. Bagi tujuan ini, Kerajaan juga telah bersetuju secara dasarnya supaya pindaan dilaksanakan kepada Akta Pengangkutan Jalan 1987, Akta Pelesenan Kenderaan Perdagangan 1987 dan Akta Pengangkutan Awam Darat 2010;
- (ii) Mewajibkan agar semua individu yang menjalankan aktiviti pekerjaan sendiri dalam sektor perusahaan penghantaran barangan (termasuk sebagai penghantar barang makanan) mencarum di bawah Skim Keselamatan Sosial Pekerjaan Sendiri (SKSPS) PERKESO bagi melindungi kebajikan semua penunggang; dan
- (iii) Menjalankan aktiviti advokasi dan kempen keselamatan yang memberi fokus kepada penunggang terlibat. Antara aktiviti yang dijalankan bersempena kempen ini adalah seperti berikut:

- a. '*Road show*' keselamatan jalan raya;
 - b. Hebahan peringatan mesej keselamatan jalan raya dalam bentuk infografik melalui media sosial;
 - c. Kajian pemerhatian tingkah laku penunggang *p-hailing* melalui CCTV di Pusat Pengurusan Pengangkutan (ITIS) di 11 jalan raya di Kuala Lumpur yang melibatkan 16,308 penunggang. Melalui hasil kajian ini didapati bahawa 62% penunggang berhenti di petak kuning/lintasan pejalan kaki, 14% memegang telefon dan melanggar lampu isyarat, 7% membuat u-turn di tempat yang tidak dibenarkan dan 3% melawan arus / melalui trafik bertentangan; dan
 - d. Latihan penunggaran selamat yang menekankan aspek keselamatan ketika menunggang, penyelenggaraan kenderaan serta penunggaran defensif.
- (iv) Selain itu, sebanyak 30 kempen khas keselamatan jalan raya khusus untuk pemandu dan penunggang *e-hailing* dan *p-hailing* telah dirancang dengan kerjasama syarikat-syarikat *e-hailing* dan *p-hailing* untuk dilaksanakan pada tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : LISAN

**DARIPADA : DATO' ABDULLAH SANI BIN ABDUL HAMID
(KAPAR)**

TARIKH : 25 JULAI 2022 (ISNIN)

DATO' ABDULLAH SANI BIN ABDUL HAMID (KAPAR) minta MENTERI SUMBER MANUSIA menyatakan penjelasan mengapa urusan pengambilan pekerja asing mesti melibatkan Syarikat Bestinet yang mengendalikan sistem Foreign Workers Centralized Management System (FWCMS) sedangkan ianya boleh dilakukan oleh pihak Kementerian sendiri.

JAWAPAN

Tuan Yang di-Pertua,

Untuk makluman, pelantikan Syarikat Bestinet Sdn. Bhd. sebagai pihak pengendali sistem telah dimeterai oleh Kementerian Dalam Negeri pada tahun 2018. Sistem *Foreign Workers Centralized Management System* (FWCMS) yang telah dibangunkan oleh pihak Bestinet terdiri daripada 13 modul seperti eVDR, ePLKS, eEmbassy, Bio-Medical dan eQuota. Sehubungan itu, Kementerian Sumber Manusia telah diberi kebenaran untuk menggunakan modul eQUota bagi tujuan pemproses prosedur permohonan pengambilan pekerja asing secara dalam talian tanpa melalui agen. Penggunaan platform FWCMS hanyalah sebagai satu platform holistik untuk majikan di Malaysia mengambil pekerja asing. Bagi pengurusan dan proses permohonan penggajian pekerja asing adalah masih kekal dibawah pentadbiran Kementerian Sumber Manusia (KSM) dengan kerjasama agensi – agensi kawal selia yang berkaitan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : DATUK HAJAH RUBIAH BINTI HAJI WANG
[KOTA SAMARAHAN]**

TARIKH : 25 JULAI 2022 (ISNIN)

SOALAN

DATUK HAJAH RUBIAH BINTI HAJI WANG [KOTA SAMARAHAN]
minta **MENTERI PENGANGKUTAN** menyatakan :

- (a) status terkini Program Pemodenan Pengangkutan Awam di Sarawak, dan
- (b) mekanisme yang diperkenalkan oleh pihak Kementerian dalam mengawal kadar yuran pengambilan lesen memandu oleh institusi-institusi memandu.

JAWAPAN

Tuan Yang di-Pertua,

1. Pengangkutan awam darat terdiri daripada perkhidmatan teksi, kereta sewa, bas berhenti-henti, bas ekspres dan *e-hailing* yang menawarkan perkhidmatan mengikut model operasi masing-masing sepertimana yang telah ditetapkan.

2. Dana Bantuan Sementara Pengusaha Bas Berhenti-Henti (DBSPB) atau dikenali sebagai *Interim Stage Bus Support Fund* (ISBSF) telah diperkenalkan oleh Suruhanjaya Pengangkutan Awam Darat (SPAD) pada tahun 2012 bertujuan untuk meningkatkan kualiti perkhidmatan bas berhenti-henti serta meningkatkan persepsi dan keyakinan para penumpang bas terhadap kualiti perkhidmatan pengangkutan awam. Kerajaan Malaysia telah memperuntukkan dana sebanyak RM5.6juta setahun bagi Negeri Sarawak untuk 11 buah syarikat pengusaha bas berhenti-henti.

3. Syarikat pengusaha bas berhenti-henti di Sarawak yang menerima dana tersebut adalah seperti berikut:

- a) Petra Jaya Transport (S) Sdn Bhd.
- b) Biaramas Express Sdn Bhd.
- c) Bau Transport Company Sdn Bhd.
- d) City Public Link Bus Services Sdn Bhd.
- e) Lanang Road Bus Company Berhad.
- f) Rejang Transport Sdn Bhd.
- g) Sungei Merah Bus Berhad.
- h) Teku Road Bus Co Sdn Bhd.
- i) Miri Transport Co Sdn Bhd.
- j) Miri City Bus Sdn Bhd.
- k) Miri Belait Transport Company Sdn Bhd.

4. Pemberian dana ini bertujuan untuk memastikan syarikat-syarikat tersebut dapat meneruskan perkhidmatan dengan cemerlang dalam industri pengangkutan awam. Selain itu, ia dapat membantu menangan

kerugian operasi harian bas berhenti henti, memastikan kesinambungan perkhidmatan, menggalakkan pemulihan laluan yang telah ditamatkan perkhidmatannya dan mendorong untuk meningkatkan mutu perkhidmatan dengan menambah kekerapan perjalanan dan memperbaiki keadaan bas.

5. Berhubung dengan yuran pengambilan lesen memandu, Kementerian Pengangkutan Malaysia (MOT) melalui Jabatan Pengangkutan Jalan Malaysia (JPJ) **telah menetapkan harga siling (maksima)** bagi permohonan lesen memandu mengikut kelas-kelas kenderaan.

6. Bagi **kelas kenderaan B** (motosikal melebihi 500cc), harga siling adalah **RM900.00**. Bagi **kelas kenderaan B2** (motosikal tidak melebihi 250cc), harga siling adalah **RM350.00**. Bagi **kelas kenderaan D** (motokar BTM tidak melebihi 3500kg) adalah **RM1150**, dan bagi **kelas kenderaan DA** (motokar tanpa pedal klac BTM tidak melebihi 3500kg) adalah **RM1250**.

7. Sekiranya Institut Memandu (IM) mengenakan caj yang melebihi daripada harga siling yang telah ditetapkan, pihak IM perlu menyatakan secara terperinci setiap butiran caj yang dikenakan kepada calon. IM juga perlu mendapatkan persetujuan calon ke atas caj yang akan dikenakan bagi mengelak sebarang permasalahan antara calon dan IM. Contoh caj yang dikenakan adalah seperti kos pengangkutan, penyediaan makan minum, bayaran ulangan, dan caj-caj lain.

8. Untuk makluman Ahli Yang Berhormat, Jabatan Pengangkutan Jalan (JPJ) sentiasa melaksanakan naziran ke atas IM di setiap negeri. Operasi Khas Institut Memandu (OKIM) ini bertujuan untuk memantau dan mengawal kadar yuran yang dikenakan oleh pihak IM.

9. Sekiranya pihak JPJ menerima aduan daripada orang awam berhubung kadar yuran tidak munasabah yang dikenakan oleh IM, pihak JPJ akan membuat siasatan dan sekiranya kesalahan tersebut didapati sahih serta terbukti, permit IM tersebut boleh digantung atau dibatalkan. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH JAWAB : 25 JULAI 2022 (ISNIN)

SOALAN

YB DATUK HAJI SHABUDIN BIN YAHAYA [TASEK GELUGOR] minta **MENTERI PERUMAHAN DAN KERAJAAN TEMPATAN** menyatakan berapa bilangan projek perumahan yang dikategorikan sebagai 'projek sakit' sepanjang 2020 hingga kini di seluruh negara. Apakah langkah yang diambil bagi mengelakkan pembeli terus teraniaya.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan rekod Kementerian Perumahan dan Kerajaan Tempatan (KPKT), bilangan keseluruhan projek perumahan yang dikategorikan sebagai projek sakit dari tahun 2020 sehingga 30 Jun 2022 adalah sebanyak **1,249 projek**. Pecahan projek sakit mengikut tahun adalah seperti berikut:

Tahun	Bil. Projek	Bil. Unit Rumah	Bil. Pembeli
2020	332	70,391	32,890
2021	500	87,906	41,098
Sehingga 30 Jun 2022	417	84,498	38,070
Jumlah	1,249	242,795	112,058

Antara langkah utama yang diambil oleh KPKT bagi mengelakkan pembeli terus teraniaya adalah seperti berikut:

- i) senarai projek perumahan yang sakit iaitu projek telah tamat tempoh Perjanjian Jual Beli yang pertama akan dipaparkan di laman portal Jabatan Perumahan Negara <https://ehome.kpkt.gov.my/> kepada umum. Senarai projek ini boleh dijadikan panduan oleh bakal pembeli rumah dan pihak pembiaya sebelum meluluskan sesuatu pinjaman perumahan baharu dan mengawal bayaran kemajuan kepada pemaju sedia ada;
- ii) mengeluarkan surat pengesahan projek bermasalah (sakit) atas permohonan pembeli kepada pihak pembiaya pinjaman untuk penstrukturan semula bayaran ansuran pinjaman. Ini adalah bagi membantu meringankan beban kewangan yang ditanggung oleh pembeli;

- iii) melaksanakan pemantauan yang lebih kerap termasuk pembekuan akaun pemajuan perumahan (*Housing Development Account - HDA*) bagi projek-projek terpilih untuk mengelakkan pengeluaran wang secara tidak bertanggungjawab oleh pemaju;
- iv) menyenarai hitam pemaju dan Ahli Lembaga Pengarah bagi menyekat pemaju projek sakit daripada memohon Lesen Pemajuan Perumahan dan Permit Iklan dan Jualan (APDL) yang baharu selagi projek sakit sedia ada belum disiapkan dengan Perakuan Siap dan Pematuhan (CCC) Penuh;
- v) mengangkat kepada YB Menteri KPKT untuk disahkan sebagai projek terbengkalai bagi projek-projek sakit yang tiada kemajuan kerja di tapak dalam tempoh yang lama selaras dengan Seksyen 11(1)(ca), Akta Pemajuan Perumahan (Kawalan Dan Pelesenan) 1966 (Akta 118) dan peraturan-peraturan; dan
- vi) menubuhkan *War Room* Pemantauan Pemajuan Projek Perumahan Swasta bagi mendapatkan penyelesaian melalui pemantauan, penguatkuasaan, menyenarai pendek projek-projek sakit yang boleh dipulihkan (*quick win*) serta menggariskan langkah-langkah pemulihan dan penyelesaian yang terbaik bagi isu-isu berkaitan projek perumahan sakit dan terbengkalai di seluruh negara. Pelaksanaan *War Room* ini telah memberikan impak dan kesan yang positif di mana terdapat 11 projek yang telah menerima CCC meliputi **10 projek** Perumahan Penjawat Awam Malaysia (PPAM) dan **2 projek** SPNB.

KPKT akan terus memberi perhatian serius terhadap isu projek perumahan sakit bagi membantu pembeli yang teraniaya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 25 JULAI 2022 (ISNIN)

SOALAN

TUAN CHE ALIAS BIN HAMID [KEMAMAN] minta **MENTERI SUMBER MANUSIA** menyatakan sama ada wujudnya cadangan penyelarasan tangga gaji semula dilaksanakan bagi pekerja lama yang masih bergaji RM1500 susulan penetapan kadar gaji minimum yang baharu bermula 1 Mei 2022.

JAWAPAN

Tuan Yang di-Pertua,

Dasar gaji minimum kebangsaan digubal untuk menetapkan gaji lantai (*floor wages*) atau gaji pokok bagi pekerja kategori terendah dalam pasaran buruh. Berhubung penyelarasan tangga gaji, kadar gaji lebih tinggi boleh dirundingkan dengan majikan sesuai dengan kelayakan dan pengalaman yang dimiliki oleh seseorang pekerja.

Pihak majikan juga digalakkan membayar gaji pekerja berdasarkan produktiviti selain bayaran gaji pokok atau gaji minimum. Pendekatan seperti melaksanakan Sistem Upah Yang Dikaitkan Dengan Produktiviti (*Productivity Linked Wage System, PLWS*) yang diperkenalkan oleh Kementerian sejak tahun 1996 bukan sahaja mampu meningkatkan pendapatan pekerja melalui peningkatan produktiviti, malah akan meningkatkan daya saing syarikat kerana dapat mengekalkan kos buruh yang kompetitif. Galakan ini dibuat melalui program promosi dan publisiti PLWS secara berterusan di peringkat negeri mahupun nasional kepada persatuan majikan, majikan, pekerja dan kesatuan sekerja.

Kerajaan turut berpandangan bahawa kuasa pasaran dan perundingan bersama memainkan peranan penting dalam penetapan gaji pekerja dan bukan semata-mata melalui penggubalan undang-undang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS [HULU LANGAT]**

TARIKH : 25 JULAI 2022 (ISNIN)

SOALAN

DATUK HAJI HASANUDDIN BIN MOHD YUNUS [HULU LANGAT]
minta **MENTERI PENGANGKUTAN** menyatakan apakah langkah-
langkah yang dilakukan oleh MRT Corp bagi mengurangkan pencemaran
bunyi di stesen-stesen MRT yang terletak berhampiran dengan taman-
taman perumahan dan kampung.

JAWAPAN

Tuan Yang Di Pertua,

1. Isu berkenaan pencemaran bunyi merupakan salah satu aspek penting dalam perancangan projek pengangkutan awam khususnya MRT. Struktur penghadang bunyi telah dipasang di beberapa lokasi yang dikenalpasti melalui perbincangan bersama Jabatan Alam Sekitar serta dapatan awam semasa Pameran Awam (*Public Display*) sebelum projek dilaksanakan.

2. Usaha mengurangkan impak bunyi ini berterusan selepas projek siap dan dalam tempoh beroperasi. Pihak Rapid Rail selaku operator telah bekerjasama melantik pakar perunding, bunyi & akustik dari Universiti Teknologi Malaysia untuk pemantauan bunyi yang melebihi had yang ditetapkan oleh Jabatan Alam Sekitar. Beberapa tindakan penambahbaikan telah diambil hasil daripada pemantauan ini seperti berikut:

- (i) Menurunkan kadar kelajuan operasi tren daripada 70 km/j kepada 50 km/j di beberapa lokasi yang telah dikenal pasti; dan
- (ii) Beberapa tren yang mengeluarkan bunyi melebihi had dibenarkan oleh pihak Jabatan Alam Sekitar diperiksa dan dibaik pulih di Depoh Sungai Buloh, Shah Alam.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI AZALINA OTHMAN SAID
[Pengerang]**

TARIKH : 25 JULAI 2022 (ISNIN)

SOALAN

YB DATO' SRI AZALINA OTHMAN SAID [Pengerang] minta **MENTERI PERUMAHAN DAN KERAJAAN TEMPATAN** menyatakan status Pelan Tindakan Bandar Pintar 2030 dan adakah ini termasuk penaiktarafan status ke bandaraya dan adakah pelan tersebut mengambil kira rancangan infrastruktur termasuk pembinaan hospital Kerajaan dan pengangkutan awam.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) bersama Majlis Perbandaran Pengerang selaku agensi pelaksana telah menjalankan Kajian Pelan Tindakan dan Kebolehlaksanaan Bandar Pintar Pengerang 2030 di bawah Rolling Plan (RP) 1 Tahun 2021 Rancangan Malaysia Ke-12 (RMKe-12) yang bermula dari bulan Julai 2021 hingga Julai 2022.

KPKT telah meluluskan Laporan Akhir Pelan Tindakan Bandar Pintar ini melalui Jawatankuasa Pemandu Kajian Pelan Tindakan dan Kebolehlaksanaan Bandar Pintar Pengerang 2030 yang diadakan pada 7 Julai 2022. Pelan tindakan ini merupakan satu rancangan pembangunan bandar pintar yang terperinci dan komprehensif merangkumi perancangan fizikal dan spatial serta strategi pelaksanaan bagi merealisasikan hasrat untuk menjadikan Pengerang sebagai bandar pintar dan mampan menjelang tahun 2030.

Pada masa yang sama, penyediaan dan perancangan infrastruktur serta kemudahan awam di kawasan Pengerang telah pun disertakan di dalam Draf Rancangan Tempatan Daerah Kota Tinggi 2030 (DRT Daerah Kota Tinggi 2030) yang disediakan bersama oleh PLANMalaysia, Majlis Perbandaran Pengerang dan Majlis Daerah Kota Tinggi. DRT Daerah Kota Tinggi 2030 ini akan dibentangkan untuk kelulusan Mesyuarat Jawatankuasa Perancang Negeri yang dijangka bersidang pada pertengahan bulan Ogos 2022.

Dalam hal ini, tapak pembangunan hospital kerajaan yang baharu telah dicadangkan di atas tapak seluas 7.98 hektar di Bandar Penawar. Pembangunan hospital awam yang baharu ini adalah bagi menampung pertambahan penduduk Daerah Kota Tinggi serta masalah kesesakan Hospital Kota Tinggi sedia ada untuk kemudahan penduduk khususnya di Pengerang. Walau bagaimanapun, cadangan ini tertakluk kepada

pertimbangan Kementerian Kesihatan Malaysia. Bagi pengangkutan awam pula, terdapat projek menaik taraf terminal bas dan teksi sedia ada di Bandar Penawar yang meliputi naik taraf kemudahan fasiliti sedia ada, menambah ciri-ciri keselamatan serta mempelbagai perkhidmatan pengangkutan awam termasuk menggalakkan perkhidmatan *e-hailing* yang lebih meluas di kawasan Pengerang.

Buat masa ini, Majlis Perbandaran Pengerang belum memenuhi kriteria baharu naik taraf Pihak Berkuasa Tempatan (PBT) ke status bandaraya yang utama iaitu mempunyai penduduk tidak kurang daripada 500,000 orang dengan pendapatan hasil tahunan RM100 juta serta mampu mengimbangkan perbelanjaan. Berdasarkan data semasa, penduduk Pengerang pada tahun 2020 adalah seramai 151,664 orang dan unjuran penduduk pada tahun 2030 dijangka 176,653 orang. Hasil pendapatan tahun 2021 bagi Majlis Perbandaran Pengerang adalah sebanyak RM44,034,975 dan anggaran hasil pada tahun 2022 adalah RM52,809,705.

Untuk makluman Ahli Yang Berhormat jua, secara umumnya, inisiatif bandar pintar belum diambil kira sebagai salah satu kriteria dalam menaik taraf PBT ke status bandaraya. Walau bagaimanapun, KPKT sedang mengkaji untuk mengambil kira unsur-unsur bandar pintar dalam mempertimbangkan permohonan menaik taraf status PBT di seluruh Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 25 JULAI 2022 (ISNIN)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI PENGANGKUTAN** menyatakan jumlah saman yang telah dikeluarkan melalui Jabatan Pengangkutan Jalan (JPJ) setakat bulan Jun tahun 2022 dan adakah Kementerian bercadang untuk memberi diskaun seperti yang telah dilaksanakan oleh PDRM bagi menggalakkan orang ramai membayar saman, serta perancangan Kementerian untuk bekerja sama dengan Kementerian lain yang terlibat bagi membina sebuah sistem bagi menyatukan saman-saman.

JAWAPAN

Tuan Yang Di Pertua,

1. Jabatan Pengangkutan Jalan Malaysia (JPJ) adalah agensi utama dalam menguatkuasakan peraturan-peraturan jalan raya dan undang-undang lalu lintas. Kesalahan yang dikesan telah dilakukan oleh pemandu kenderaan adalah merupakan satu pelanggaran terhadap Akta Pengangkutan Jalan 1987 (Akta 333), Akta Pengangkutan Awam Darat 2010 (Akta 715) dan Akta Lembaga Perlesenan Kenderaan Perdagangan 1987 (Akta 334) yang khusus bagi negeri Sabah dan negeri Sarawak.
2. Bagi tempoh dari **tahun 2019 sehingga 30 Jun 2022**, JPJ telah mengeluarkan saman sebanyak **empat juta dua ratus tiga belas ribu sepuluh (4,213,010)**.
3. Pengurangan bayaran kompaun telah dilaksanakan sama seperti yang telah dilaksanakan oleh PDRM. Inisiatif ini adalah untuk menggalakkan orang ramai atau pesalah lalu lintas membayar saman bagi tujuan penyelesaian ke. MOT melalui JPJ telah melaksanakan pengurangan kompaun kepada orang ramai dalam program-program Kerajaan yang tertentu sebagai contoh, Sambutan Hari JPJ, Hari Kebangsaan, Sambutan Aspirasi Keluarga Malaysia dan lain-lain program yang terpilih. Salah satu objektif pengurangan ini adalah bagi memudahkan rakyat yang ingin menggunakan kenderaan bagi tujuan pekerjaan seperti pemandu e-hailing/ p-hailing yang selama ini telah disenarai hitam akibat terdapatnya saman tertunggak.
4. Kementerian Pengangkutan melalui JPJ secara proaktif telah melaksanakan inisiatif integrasi sistem bersama pihak Jabatan Siasatan dan Penguatkuasaan Trafik (JSPT), Polis Diraja Malaysia (PDRM) bagi urusan senarai hitam dan pengumpulan data demerit di bawah sistem KEJARA. Selain itu, beberapa sesi libat urus sedang dijalankan bersama Pihak Berkuasa Tempatan (PBT) untuk membangunkan integrasi sistem bagi menguatkuasakan kesalahan-kesalahan lalu lintas oleh Warden Trafik. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

TARIKH : 25 JULAI 2022 (ISNIN)

SOALAN NO. 67

TUAN ABDUL LATIFF BIN ABDUL RAHMAN [KUALA KRAI] minta **MENTERI PENGANGKUTAN** menyatakan adakah Kementerian bercadang untuk memulakan kembali Ekspres Rakyat Timuran yang dihentikan selepas banjir 2014 berikutan permintaan yang tinggi dan menggalakkan daripada pengguna terutama apabila KTMB memperkenalkan Ekspres Khas Keluarga Malaysia baru-baru ini.

JAWAPAN

Tuan Yang Di Pertua,

1. Kementerian Pengangkutan tidak mempunyai cadangan untuk menghidupkan semula perkhidmatan keretapi Ekspres Rakyat Timuran walaupun terdapat permintaan yang tinggi terhadap perkhidmatan ini yang dikenali sebagai Ekspres Khas Keluarga Malaysia sewaktu perayaan Aidilfitri dan Aidiladha baru-baru ini.
2. Perkhidmatan ini menelan kos operasi yang tinggi dan telah mengakibatkan kerugian sebanyak RM6 juta setiap tahun disebabkan kos operasi yang tinggi berbanding hasil. Perkhidmatan tersebut terpaksa ditamatkan pada tahun 2015.
3. Namun begitu, Kementerian Pengangkutan menyedari bahawa perkhidmatan ini memberi manfaat yang besar kepada rakyat di sebelah Pantai Timur khususnya Pahang dan Kelantan. Maka pihak KTMB sedang meneliti kaedah-kaedah bagi mengurangkan kos operasi serta kemungkinan untuk menyambung semula perkhidmatan tersebut di masa akan datang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI MOHD SALIM
SHARIF [JEMPOL]**

TARIKH : 25 JULAI 2022 (ISNIN)

SOALAN

DATUK SERI HAJI MOHD SALIM SHARIF minta **MENTERI KESIHATAN** menyatakan status terkini kajian penggunaan hemp dan ketum bagi tujuan perubatan supaya tanaman berkenaan boleh digunakan untuk industri perubatan dan dieksport ke luar negara.

JAWAPAN

Tuan Yang di-Pertua,

1. Dimaklumkan bahawa Kementerian Kesihatan Malaysia (KKM) telah menubuhkan Jawatankuasa Induk Pembangunan Industri Kanabis Dan Ketum Bagi Tujuan Perubatan untuk mengkaji serta merangka hala tuju pembangunan industri kanabis dan ketum bagi tujuan perubatan selaras dengan keputusan Jemaah Menteri dalam mesyuaratnya pada 13 April 2022.
2. Jawatankuasa ini yang dipengerusikan oleh YB Menteri Kesihatan dengan keanggotaannya terdiri daripada semua kementerian dan agensi berkaitan termasuklah Kementerian Dalam Negeri, Jabatan Peguam Negara, Kementerian Pertanian dan Industri Makanan dan Jabatan Kemajuan Islam Malaysia. Sehubungan status kajian penggunaan kanabis dan ketum bagi tujuan perubatan masih dalam kajian dan penelitian Jawatankuasa Induk ini.

3. Namun begitu, KKM ingin juga memaklumkan bahawa satu Kertas Makluman Cadangan Kawalan Ketum disediakan oleh Jawatankuasa Teknikal Undang-Undang Berhubung Tanaman Ketum (JTUU) yang diterajui oleh KKM akan dibentangkan kepada Jawatankuasa Bertindak Penguatkuasaan Undang-Undang (JPU) yang antara lain mengandungi cadangan kawalan ketum.

4. Oleh itu, hala tuju pembangunan industri kanabis dan ketum terutamanya penanaman kanabis dan ketum bagi tujuan perubatan adalah bergantung kepada hasil dapatan Jawatankuasa Induk Pembangunan Industri Kanabis Dan Ketum Bagi Tujuan Perubatan dan JPU dengan mengambil kira aspek perundangan, sosiobudaya, kesihatan, ekonomi, hukum syarak dan seterusnya keputusan Jemaah Menteri terhadap hasil dapatan tersebut.

5. Dalam pada itu, sekiranya terdapat pihak yang mempunyai bukti saintifik yang mencukupi untuk menggunakan keluaran (ubat) yang mengandungi ekstrak kanabis atau ketum (mitragynine) bagi tujuan perubatan, pihak berkenaan boleh mengemukakan permohonan pendaftaran keluaran tersebut kepada Pihak Berkuasa Kawalan Dadah dan seterusnya untuk dipasarkan di Malaysia.

6. KKM ingin menekankan bahawa Akta Dadah Berbahaya 1952 dan dua (2) Akta lain iaitu Akta Racun 1952 dan Akta Jualan Dadah 1952 yang mengawal selia penggunaan ekstrak kanabis atau ketum (mitragynine) bagi tujuan perubatan tidak menghalang pengimportan, pengeksporan, penjualan, pembekalan atau pengilangan keluaran mengandungi ekstrak kanabis atau ketum (mitragynine) bagi tujuan perubatan selagi mana aktiviti tersebut dilakukan dengan mematuhi undang-undang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HASAN BIN ARIFIN
[ROMPIN]**

TARIKH : 25 JULAI 2022 (ISNIN)

SOALAN

YB DATO' SRI HASAN BIN ARIFIN [ROMPIN] minta **MENTERI PERUMAHAN DAN KERAJAAN TEMPATAN** menyatakan di sesetengah negeri, Lembaga Perbandaran atau Kerajaan Tempatan mengenakan syarat kepada pemaju perumahan menggunakan perkhidmatan 'koridor utiliti'. Adakah ini satu kemestian atau ia tidak bertentangan berdasarkan Akta Kerajaan Tempatan.

JAWAPAN

Tuan Yang di-Pertua,

Untuk makluman Ahli Yang Berhormat, koridor utiliti disediakan untuk memastikan perancangan laluan kemudahan utiliti dijalankan secara teratur dan sistematik. Penyediaan koridor utiliti adalah penting dari segi ekonomi kerana ia mengambil kira penjimatan kos dalam pelaksanaan dan penyelenggaraan utiliti. Perancangan rizab bagi koridor utiliti menyumbang kepada pemeliharaan alam semulajadi dan keselamatan penduduk kerana ia tidak akan menyebabkan kacau ganggu.

Walau bagaimanapun, untuk makluman Ahli Yang Berhormat, tiada peruntukan di dalam Akta Kerajaan Tempatan 1976 (Akta 171) yang mewajibkan koridor utiliti. Kementerian Perumahan dan Kerajaan Tempatan (KPKT) melalui PLANMalaysia telah menerbitkan Garis Panduan Laluan Kemudahan Utiliti pada tahun 2012 sebagai rujukan selaras hasrat negara untuk menuju ke arah negara maju.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN PANG HOK LIONG (LABIS)

TARIKH : 25 JULAI 2022 (ISNIN)

SOALAN

TUAN PANG HOK LIONG (LABIS) minta **MENTERI DALAM NEGERI** menyatakan secara terperinci kriteria dan jumlah warganegara Bangladesh telah diberikan kerakyatan Malaysia bagi tahun 2010, 2011, 2012, 2013, 2014, 2015, 2016, 2017, 2018, 2019, 2020 dan 2021 masing-masing.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN), jumlah permohonan kewarganegaraan di bawah Perkara 19(1) Perlembagaan Persekutuan yang telah dimohon oleh warganegara Bangladesh dari tahun 2010 hingga 30 Jun 2022 adalah sebanyak **55 permohonan**. Daripada jumlah tersebut, seramai **12 pemohon** telah dianugerahkan dengan taraf kewarganegaraan Malaysia.

**STATISTIK PERMOHONAN WARGANEGARA
NEGARA ASAL BANGLADESH
PERKARA 19
MENGIKUT STATUS DAN PERKARA
TAHUN 2010 HINGGA 30 JUN 2022**

STATUS	2010	2011	2012	2013	2014	2015	2016	2017	2018	2019	2020	2021	JUMLAH
LULUS	3	3	-	1	2	2	1	-	-	-	-	-	12

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN WONG LING BIU (SARIKEI)

TARIKH : 25 JULAI 2022 (ISNIN)

SOALAN

TUAN WONG LING BIU (SARIKEI) minta **MENTERI DALAM NEGERI** menyatakan berapa jumlah warga Malaysia telah tergoda dengan syarat upahan yang lumayan untuk bekerja di luar negara tetapi akhirnya ditipu dan bekerja dengan kumpulan penipu haram. Berapa jumlah warganegara kita yang telah berjaya diselamatkan dan kembali ke Malaysia. Apakah tindakan yang telah diambil oleh Kerajaan untuk melindungi mangsa-mangsa ini di luar negara.

JAWAPAN

Tuan Yang Di Pertua,

Pihak Polis Di Raja Malaysia (PDRM) telah menerima sebanyak 161 laporan polis yang telah dibuat oleh mangsa dan ahli keluarga. Daripada jumlah ini, pihak PDRM telah mengenalpasti seramai 194 orang warganegara Malaysia dipercayai telah menjadi mangsa sindiket penipuan kerja di luar negara. Dengan kerjasama ASEANAPOL, INTERPOL, Kementerian Luar Negeri dan pihak berkuasa tempatan, seramai 54 orang telah berjaya diselamatkan. Manakala 140 orang masih lagi dalam tindakan untuk mengesan mangsa oleh pihak berkuasa tempatan.

Pelbagai usaha telah diambil oleh pihak PDRM bagi membendung isu ini. Antaranya adalah:

- i. Menubuhkan Pasukan Petugas Khas untuk menangani isu ini;
- ii. Menjalinkan kerjasama dengan ASEANAPOL, INTERPOL, Kementerian Luar Negeri dan pihak berkuasa tempatan bagi mengesan warganegara Malaysia di negara-negara terbabit untuk dibawa pulang; dan
- iii. Menjalankan kempen kesedaran terhadap sindiket tawaran kerja palsu di luar negara ini melalui platform media sosial. Usaha ini akan diperluaskan dan dipergiatkan lagi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK HAJI SHABUDIN BIN YAHAYA
(TASEK GELUGOR)**

TARIKH : 25 JULAI 2022 (ISNIN)

SOALAN

DATUK HAJI SHABUDIN BIN YAHAYA (TASEK GELUGOR) minta **MENTERI DALAM NEGERI** menyatakan berapa bilangan warga China yang :-

(a) masuk ke negara ini antara 2018 hingga 2021 dan berapa bilangan yang keluar semula; dan

(b) berapa bilangan yang berkahwin dengan lelaki tempatan dan menetap di negara ini.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Imigresen Malaysia (JIM), ketibaan warga China ke Malaysia bagi tempoh tahun 2018 hingga 2021 seramai 7,177,043 orang. Manakala, pelepasan warga China yang keluar dari negara pada tahun 2018 hingga 2021 adalah seramai 5,954,765 orang.

Berdasarkan rekod oleh Jabatan Pendaftaran Negara (JPN) pula, sejak tahun 2018 hingga 2021, seramai 2,960 orang warga China yang berkahwin dengan lelaki tempatan.

Untuk makluman Ahli Yang Berhormat jua, Jabatan Pendaftaran Negara (JPN) mendaftarkan perkahwinan dan perceraian bagi pasangan bukan beragama Islam selaras dengan peruntukan di bawah Akta Membaharui Undang-Undang (Perkahwinan dan Perceraian) 1976 [Akta 164].

Akta ini tidak terpakai bagi seseorang anak Negeri (*native*) Sabah, Sarawak atau seseorang Orang Asli Semenanjung Malaysia yang perkahwinan dan perceraianya tertakluk kepada Undang-Undang Adat Anak Negeri atau Adat Orang Asli melainkan jika mereka memilih untuk berkahwin di bawah Akta ini.

Seksyen 27, Akta 164, menyatakan, perkahwinan bagi tiap-tiap orang yang bermastautin secara biasanya di Malaysia dan bagi tiap-tiap orang yang bermastautin di luar negara adalah seorang warganegara atau berdomisil di Malaysia selepas tarikh yang ditetapkan hendaklah didaftarkan menurut Akta ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 25 JULAI 2022 (ISNIN)

SOALAN

TUAN M. KULASEGARAN [IPOH BARAT] minta **MENTERI SUMBER
MANUSIA** menyatakan :-

- a) sebab-sebab kos pembinaan Pusat Rehabilitasi di Meru Ipoh meningkat kepada RM500 juta; dan
- b) adakah kemudahan rawatan barah "*Proton Therapy*" sedia dibawa masuk ke pusat ini jika tidak mengapa.

JAWAPAN

Tan Sri Yang Di-Pertua,

Pusat Rehabilitasi di Meru, Ipoh merupakan satu projek yang khusus untuk menyediakan perkhidmatan rehabilitasi yang komprehensif dan berteknologi tinggi. Pusat ini berperanan membantu memulihkan golongan yang mengalami hilang upaya akibat kemalangan atau penyakit kronik seperti kecederaan otak yang serius, kecederaan saraf tunjang, buta, kelumpuhan dan sebagainya sehingga mereka boleh berdikari, kembali bekerja dan kembali menyumbang kepada masyarakat. Peningkatan kos pembinaan Pusat Rehabilitasi ini adalah disebabkan faktor-faktor berikut:

- i. Peningkatan kos bahan binaan, kos keluli struktur yang meningkat, cabaran logistik global semasa, kekurangan tenaga buruh di Malaysia untuk semua industri yang amat mencabar terutamanya dalam industri pembinaan dan inflasi harga industri pembinaan.
- ii. Kos reka bentuk yang selaras dengan keperluan penyediaan perkhidmatan dan peralatan neuro-robotik berteknologi tinggi dalam memberi rawatan pemulihan yang optimum kepada pesakit.

Pusat Rehabilitasi ini berfokus kepada konsep Rehabilitasi Neuro-Robotik dan Cybernics. Namun begitu, Kementerian menyambut baik cadangan daripada Yang Berhormat berkenaan kemudahan rawatan barah *Proton Therapy* sebagai salah satu perkhidmatan yang disediakan di Pusat Rehabilitasi di Meru, Ipoh dan cadangan tersebut akan dipertimbangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 25.07.2022 (ISNIN)

SOALAN

DATO' JOHARI BIN ABDUL [SUNGAI PETANI] minta **MENTERI
PERDAGANGAN DALAM NEGERI DAN HAL EHWAL PENGGUNA**
menyatakan :-

- (a) adakah harga bahan makanan di pasaran melambung begitu mendadak kerana gagalnya pemantauan atau bekalan yang memang kurang; dan
- (b) apakah masalah utama yang menyebabkan negara tidak dapat mengeluarkan makanan yang mencukupi dan terpaksa bergantung kepada import.

JAWAPAN:

Tuan Yang di-Pertua,

Pemantauan oleh penguatkuasa dilakukan secara kerap, berkala dan efisien. Bekalan yang kurang dan kos pengeluaran yang tinggi adalah punca utama kenaikan harga. Kesan pandemik Covid19 yang melanda dunia telah mengubah cara perniagaan, peningkatan kos serta berlaku kekurangan bekalan. Kesan ini dirasakan bukan sahaja di Malaysia yang mengalami kenaikan harga makanan tetapi seluruh dunia. Kebergantungan makanan dari negara pengeluar menyebabkan Malaysia menerima tekanan jika pengeluar menghadapi gangguan pengeluaran.

Sumber makanan Malaysia banyak bergantung kepada negara pengeluar atas faktor kos dan skala pengeluaran.

Kitaran sumber makanan dunia secara umumnya adalah stabil dan saling bergantung antara satu sama lain. Tidak semua makanan dapat dihasilkan di Malaysia kerana faktor tanah, cuaca dan kesesuaian tanaman terbabit. Malaysia mengeluarkan sawit, sayur-sayuran, ayam, telur, buah-buahan, beras dan lain-lain. Akan tetapi Malaysia juga perlu mengimport gandum, daging lembu, kerbau, kentang, bawang, cili, rempah ratus, buah-buahan, bijirin, kacang dan lain-lain untuk keperluan Keluarga Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB PUAN ISNARAISSAH MUNIRAH BT. MAJILIS
@ FAKHARUDY (KOTA BELUD)**

TARIKH : 25 JULAI 2022 (ISNIN)

SOALAN

PUAN ISNARAISSAH MUNIRAH MAJILIS (KOTA BELUD) minta **MENTERI DALAM NEGERI** menyatakan jumlah kes cubaan menculik, kes culik dan kes kanak-kanak hilang di seluruh negara bagi 5 tahun terakhir dan berapakah daripada jumlah tersebut dapat diselesaikan dan pesalah telah didakwa.

JAWAPAN

Tuan Yang Di Pertua,

Kes kanak-kanak hilang bagi tempoh 5 tahun (2016 hingga 2021) adalah sebanyak 7,290 kes. Walau bagaimanapun, sebanyak 7,221 kes kanak-kanak hilang telah dijumpai semula. Jumlah ini menunjukkan kes selesai adalah sebanyak 99.05%. Sebanyak 69 kes kanak-kanak hilang masih belum ditemui. Antara sebab kanak-kanak hilang adalah mengalami masalah keluarga, ikut rakan sebaya atau teman lelaki untuk mencari kebebasan. Oleh kerana tiada melibatkan unsur jenayah, maka tiada pendakwaan di mahkamah bagi kes kanak-kanak hilang.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 25 JULAI 2022 (ISNIN)

SOALAN

YB TUAN AHMAD FAHMI BIN MOHAMED [LEMBAH PANTAI] minta **MENTERI PERUMAHAN DAN KERAJAAN TEMPATAN** menyatakan apakah tindakan Kementerian bagi memastikan kumpulan B40 khususnya miskin bandar mampu memiliki rumah mereka sendiri memandangkan harga rumah terutama di Kuala Lumpur terlalu tinggi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa memastikan pelaksanaan projek-projek Rumah Mampu Milik (RMM) khususnya bagi golongan B40 selaras dengan strategi Rancangan Malaysia Ke-12 (RMKe-12) iaitu meningkatkan bekalan RMM kepada kumpulan sasar. Bagi golongan B40, KPKT menyediakan Program Perumahan Rakyat (PPR) dan Program Rumah Mesra Rakyat (RMR) yang dijual di antara RM35,000 hingga RM100,000.

KPKT telah menubuhkan Jawatankuasa Kerja dan Jawatankuasa Pemandu Perumahan Mampu Milik Negara untuk menyelaras perancangan bekalan RMM bagi menjayakan pembinaan 500,000 unit RMM di seluruh negara. Strategi pelaksanaan ini melibatkan KPKT sebagai

penyelaras utama kepada 15 Kementerian/ Agensi Persekutuan, kerajaan negeri dan sektor swasta. Sejajar dengan strategi ini, KPKT komited untuk memastikan penyediaan RMM termasuk di Wilayah Persekutuan Kuala Lumpur.

Sehingga kini, KPKT telah membina sebanyak 156 projek Program Perumahan Rakyat (PPR) di seluruh negara yang merangkumi 98,196 unit rumah. Daripada 156 projek PPR yang telah siap tersebut, sebanyak 58 projek adalah merupakan PPR Dimiliki merangkumi 16,823 unit rumah. Pada masa yang sama, terdapat 12 projek PPR Dimiliki sedang dalam pembinaan yang merangkumi sebanyak 3,892 unit rumah. Terdapat 27 projek PPR di Kuala Lumpur yang merangkumi 34,862 unit rumah iaitu 35.5% daripada keseluruhan projek PPR di seluruh negara.

Di bawah Inisiatif Pembiayaan Perumahan Malaysia (i-Biaya) yang telah dilancarkan pada 14 April 2022, program seperti Skim Rumah Pertamaku (SRP) di bawah Cagamas Berhad, Skim Jaminan Kredit Perumahan di bawah Syarikat Jaminan Kredit Perumahan Berhad (SJKP) dan Rent-to-Own (RTO) PR1MA sedang dilaksanakan dengan kerjasama institusi kewangan yang terpilih agar dapat menarik minat pembeli khususnya golongan B40 untuk memudahkan pembiayaan bagi memiliki rumah. SJKP dan SRP menyediakan jaminan kepada pembeli rumah pertama dalam kalangan B40 dan M40 termasuklah kumpulan industri ekonomi gig, kumpulan berpendapatan rendah dan sektor Industri Kecil dan Sederhana. Skim-skim ini boleh dimohon menerusi institusi kewangan yang mengambil bahagian dalam inisiatif ini.

Kementerian akan terus mengkaji dan melaksanakan inisiatif-inisiatif yang bersesuaian untuk memastikan kesinambungan bantuan kepada golongan terkesan khususnya golongan miskin bandar B40, di samping meneruskan agenda perumahan mampu milik selaras dengan RMKe-12.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN
DARIPADA : TUAN TEH KOK LIM [TAIPING]
TARIKH : 25 JULAI 2022 (ISNIN)

SOALAN

YB TUAN TEH KOK LIM [TAIPING] minta **MENTERI PERUMAHAN DAN KERAJAAN TEMPATAN** menyatakan jumlah keluarga yang mengalami masalah tidak mampu memiliki rumah sendiri untuk setiap tahun sejak 2016 hingga kini.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan Laporan Survei Pendapatan Isi Rumah dan Kemudahan Asas (HIS & BA 2019), Jabatan Perangkaan Malaysia (DOSM), daripada keseluruhan 7,276,700 isi rumah di Malaysia, sebanyak 76.9% dikenal pasti memiliki rumah yang didiami, diikuti dengan 19.8% mendiami rumah yang disewa (1,438,300 isi rumah) dan 3.3% mendiami kuarters (243,900 isi rumah). Secara tidak langsung, ini menunjukkan bahawa peratusan isi rumah yang tidak memiliki rumah di Malaysia adalah 23.1% atau 1,682,200 isi rumah.

Selaras dengan strategi Rancangan Malaysia Kedua Belas (RMKe-12) untuk meningkatkan bekalan RMM sebanyak 500,000 unit rumah, Kerajaan telah mewujudkan Jawatankuasa Penyelarasan dan Pelaporan Kluster Perumahan bagi memastikan sasaran ini dapat dicapai menjelang tahun 2025. Strategi pelaksanaan ini akan melibatkan KPKT sebagai penyelaras utama kepada 15 Kementerian/ Agensi Persekutuan, kerajaan negeri dan sektor swasta.

Bagi meningkatkan aksesibiliti perumahan oleh rakyat, Kementerian telah mengambil tindakan seperti berikut:

- (i) mewujudkan Panel Pemikir (Panel of Experts, POE) bagi membantu dan memberi nasihat kepada Kementerian dalam pelbagai isu perumahan khususnya melibatkan kluster sosial, ekonomi dan geopolitik;
- (ii) melaksanakan Program Pemilikan Rumah atau *Home Ownership Programme* (HOPE) dan Karnival Jom Beli Rumah; dan
- (iii) melaksanakan Inisiatif Pembiayaan Perumahan Malaysia (i-Biaya), Skim Rumah Pertamaku (SRP) di bawah Cagamas Berhad, Skim Jaminan Kredit Perumahan di bawah Syarikat Jaminan Kredit Perumahan Berhad (SJKP) dan Rent-to-Own (RTO) PR1MA dengan kerjasama institusi kewangan yang terpilih agar dapat menarik minat pembeli khususnya golongan B40 dan M40 untuk memudahkan pembiayaan bagi memiliki rumah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN CHARLES ANTHONY A/L SANTIAGO
(KLANG)**

TARIKH : 25 JULAI 2022 (ISNIN)

SOALAN

TUAN CHARLES ANTHONY SANTIAGO (KLANG) minta **MENTERI DALAM NEGERI** menyatakan adakah Kementerian akan mempertimbangkan untuk memberi status istimewa kepada kanak-kanak tanpa kewarganegaraan sehingga umur 18 tahun seperti negeri Sarawak. Dan apakah rancangan Kementerian untuk memproses permohonan kewarganegaraan sejak beberapa tahun kebelakangan ini.

JAWAPAN

Tuan Yang Di Pertua,

Penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya.

Kementerian Dalam Negeri (KDN) melalui Jabatan Pendaftaran Negara (JPN) tidak pernah menghalang mana-mana pemohon yang memenuhi syarat-syarat kelayakan sepertimana yang dinyatakan di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] untuk mengemukakan permohonan kewarganegaraan anak mereka. Setiap permohonan yang dikemukakan akan diteliti mengikut giliran yang sewajarnya sebelum keputusan dikeluarkan berdasarkan kepada fakta-fakta dan dokumen sokongan yang dikemukakan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : JAWAB LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 25 JULAI 2022 (ISNIN)

SOALAN

Minta **MENTERI BELIA DAN SUKAN** menyatakan adakah Kementerian meneliti untuk nyah sukan teras negara dan menggantikan sistem tersebut dengan memberi peruntukan berdasarkan prestasi persatuan sukan tersebut.

JAWAPAN

Tan Sri Yang di-Pertua,

Untuk makluman Ahli Yang Berhormat, Kementerian Belia dan Sukan melalui Majlis Sukan Negara (MSN) **tiada perancangan untuk menggantikan Sukan Teras kepada kaedah lain**. Ini kerana ia masih kekal relevan sebagai satu mekanisme kerajaan untuk membantu Persatuan Sukan Kebangsaan (PSK) dalam pelbagai aspek antaranya pemberian geran, program latihan atlet, penyediaan tempat dan peralatan latihan, penyertaan ke kejohanan dalam mahupun luar negara, penginapan, makan dan pendidikan dalam memastikan pembangunan sukan prestasi tinggi sehingga ke peringkat antarabangsa

Pemilihan sukan dalam sukan teras **sentiasa dinilai dari semasa ke semasa** oleh MSN berdasarkan kepada prestasi PSK yang merangkumi prestasi atlet, pengurusan jurulatih, program pembangunan akar umbi, penganjuran kejohanan dan juga termasuk tahap kecekapan tadbir urus persatuan. Sukan Teras bermula dengan **8 jenis sukan pada tahun 2004**, seterusnya ditambah kepada **19 jenis sukan pada tahun 2007** dan pada tahun 2017 sebanyak 3 sukan telah digugurkan daripada senarai Sukan Teras iaitu sukan Angkat Berat, Taekwando dan Sepak Takraw disebabkan oleh faktor-faktor berikut:

- a) Masalah tadbir urus Persatuan Sukan Kebangsaan;
- b) Isu doping yang semakin meningkat di kalangan atlet; dan
- c) Prestasi sukan berkenaan yang tidak konsisten atau pencapaian yang tidak memuaskan.

Pelaksanaan Sukan Teras ini juga telah menunjukkan keberkesanan dengan lahirnya atlet-atlet yang bersinar di persada antarabangsa. Antara ikon-ikon sukan negara yang berjaya menempa nama di pentas antarabangsa adalah YBhg. Datuk Nicol Ann David (Skuasy), YBhg. Datuk Wira (Dr.) Lee Chong Wei (Badminton), YBhg. Datuk Pandelega Rinong (Akuatik), YBhg. Datuk Mohd Azizulhasni Awang (Berbasikal), Shalin Zulkifli (Tenpin boling) dan ramai lagi.

Untuk makluman Ahli Yang Berhormat juga, pelaksanaan program-program MSN pada masa kini seperti Program Podium, Program Pelapis Kebangsaan, Program Pelapis Negeri dan Program Bakat juga memberikan keutamaan kepada 16 Sukan Teras. Ini bagi memastikan sukan-sukan tersebut dibangunkan dengan lebih sistematik dan menyeluruh dari peringkat akar umbi hingga ke peringkat elit dan dapat terus menyumbang pingat di pentas antarabangsa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN KASTHURIRAANI A/P PATTO (BATU KAWAN)

TARIKH : 25 JULAI 2022 (ISNIN)

SOALAN

PUAN KASTHURIRAANI A/P PATTO (BATU KAWAN) minta **MENTERI DALAM NEGERI** menyatakan apakah jangkamasa pemprosesan permohonan pengesahan taraf kewarganegaraan (selepas anak mencapai umur 1 tahun) bagi anak-anak yang lahir di luar negara kepada bapa warga Malaysia serta apakah rekod permohonan kewarganegaraan kepada Jabatan Pendaftaran Negara (JPN) untuk kanak-kanak yang lahir kepada bapa warga Malaysia berbanding ibu warga Malaysia yang lahir di luar negara dari tahun 2013 sehingga kini mengikut pecahan tahun dan bilakah pihak Kerajaan akan meminda Perlembagaan Persekutuan untuk memastikan tiada diskriminasi di antara permohonan kewarganegaraan bagi anak yang lahir di luar negara kepada ibu warga Malaysia.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN), sebanyak **30,939 permohonan** kewarganegaraan diterima untuk individu yang lahir di luar negara dan bapanya bertaraf warganegara sewaktu kelahiran dari tahun 2013 hingga 30 Jun 2022.

Manakala bagi tempoh yang sama, sebanyak **4,901** permohonan

kewarganegaraan diterima untuk individu yang lahir di luar negara oleh ibu bertaraf warganegara yang berkahwin dengan bapa bertaraf bukan warganegara sewaktu kelahiran.

Untuk makluman Ahli Yang Berhormat, penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak dan peraturan imigresen. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

Selain itu, Mesyuarat Jemaah Menteri pada 24 September 2021 telah memutuskan agar satu jawatankuasa ditubuhkan bagi mengkaji dan meminda Perkara 14(1)(b) Perlembagaan Persekutuan. Jawatankuasa tersebut dipengerusikan secara bersama antara YB Menteri Dalam Negeri dan YB Menteri di Jabatan Perdana Menteri (Parlimen dan Undang-Undang). Jawatankuasa ini akan meneliti dan mengkaji cadangan-cadangan pindaan berhubung Bahagian III, Perlembagaan Persekutuan terutamanya Perkara 14(1)(b).

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 25 JULAI 2022 (ISNIN)

SOALAN

TUAN WONG CHEN minta **MENTERI KESIHATAN** menyatakan :-

- (a) berapa ramai orang yang menghadapi '*Long COVID-19*'; dan
- (b) apakah yang dilakukan oleh Kementerian untuk merawat kesan '*Long COVID-19*'.

JAWAPAN

Tuan Yang di-Pertua,

1. Kebanyakan pesakit yang dijangkiti COVID-19 akan pulih dan kembali sihat, namun sebilangan kecil akan mengalami keadaan dipanggil '*Long COVID*'.
2. Sehingga Jun 2022, seramai 31,390 bekas pesakit COVID yang discaj daripada hospital telah diberi janji temu dan datang untuk rawatan susulan di fasiliti kesihatan KKM, bagi tujuan pemantauan dan menerima rawatan bagi gejala '*Long COVID*'.
3. Antara langkah-langkah yang telah dilaksanakan bagi memastikan bekas pesakit COVID-19 yang mengalami '*Long COVID*' mendapat akses kepada rawatan di seluruh negara adalah:

- (i) Pesakit COVID-19 yang telah mendapatkan rawatan di hospital KKM akan diberikan janji temu sejurus discaj daripada hospital terutama bagi yang mengalami komplikasi tertentu atau yang dijangkakan mengalami gejala '*Long COVID*'. Mereka akan diberikan janji temu di Klinik Pakar yang bersesuaian bergantung kepada diagnosa akhir mereka.
 - (ii) Bagi pesakit yang turut mempunyai penyakit kronik yang lain seperti darah tinggi, diabetes dan sebagainya, mereka akan diminta untuk meneruskan rawatan susulan di fasiliti kesihatan seperti yang telah dijadualkan sebelum mereka dijangkiti COVID-19. Sekiranya mereka tidak mempunyai rawatan susulan biasa, mereka akan dirujuk kepada pakar tertentu dan diberikan janji temu susulan.
 - (iii) Bekas pesakit COVID-19 juga boleh mendapatkan rawatan di fasiliti kesihatan awam / swasta yang berhampiran secara *walk-in* sekiranya mempunyai sebarang gejala.
4. Bagi pesakit yang mengalami gejala dan simptom yang semakin teruk semasa dalam tempoh pemantauan dan memerlukan rawatan segera, mereka akan dimasukkan ke hospital bagi mendapatkan rawatan lanjut.
5. Bagi menangani gejala '*Long COVID*' dengan berkesan dan selamat, Kementerian Kesihatan Malaysia (KKM) telah menerbitkan Garis Panduan Pengurusan COVID-19 - *Post COVID-19 Management Protocol* pada Julai 2021 sebagai sumber rujukan dan melibatkan pelbagai disiplin kepakaran termasuklah kesihatan primer, penyakit berjangkit, perubatan dalaman, nefrologi, kardiologi, respiratori, obstetrik, pediatrik, psikiatri dan perubatan rehabilitasi.
6. Kementerian Kesihatan akan terus memantau dan memberi rawatan kepada pesakit '*Long COVID*' yang mempunyai indikasi, berdasarkan garis panduan tersebut dan memastikan akses perubatan yang mencukupi kepada golongan ini
- Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU (BATU GAJAH)**

TARIKH : 25 JULAI 2022 (ISNIN)

SOALAN

TUAN SIVAKUMAR VARATHARAJU NAIDU minta **MENTERI PERPADUAN NEGARA** menyatakan apakah rasional hanya 2 kategori permohonan iaitu pembangunan kemahiran profesional dan keusahawanan serta memperkasakan wanita bagi dana MITRA tahun 2022. Berapa jumlah dana yang telah disalurkan kepada kedua-dua kategori tersebut setakat ini.

JAWAPAN

Tuan Yang Di-Pertua,

1. Bagi pelaksanaan pembangunan sosioekonomi masyarakat India B40, MITRA memberi fokus kepada kluster:
 - i. **Modal Insan;**
 - ii. **Keusahawanan dan Kerjaya;** dan
 - iii. **Kesejahteraan Sosial.**
2. Bagi **Kluster Keusahawanan dan Kerjaya**, sebanyak **lapan (8)** program telah diluluskan termasuk program pembangunan kemahiran profesional dan keusahawanan. Di bawah **program pembangunan kemahiran profesional dan keusahawanan** terdapat **empat (4)** kursus yang telah diluluskan seperti berikut:

BIL	NAMA KURSUS	AMAUN
i.	LATIHAN KEMAHIRAN TEKNIKAL	RM200,800.00
ii.	SIJIL PROFESIONAL DALAM PENGGERUDIAN ARAH MENDATAR	RM243,400.00
iii.	PROGRAM LATIHAN KEMAHIRAN KERJAYA BESERTA KEUSAHAWANAN	RM294,600.00
iv.	OFFICE AUTOMATION KNOWLEDGE EXPERT	RM63,072.00
JUMLAH		RM801,872.00

3. Bagi **Kluster Kesejahteraan Sosial**, **satu (1)** program telah diluluskan iaitu program pemerkasaan wanita dengan dana bernilai **RM57,550.00**.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM KIT SIANG [ISKANDAR
PUTERI]**

TARIKH : 25 JULAI 2022 (ISNIN)

SOALAN

TUAN LIM KIT SIANG minta **MENTERI KESIHATAN** menyatakan berapa ramai pesakit COVID-19 yang menerima rawatan dengan ubat Paxlovid semasa berada di dalam Kategori 2A, 2B, 3, 4 dan 5 jangkitan COVID-19 dan kadar kematian penerima rawatan ini mengikut kategori jangkitan.

JAWAPAN

Tuan Yang di-Pertua,

1. Rawatan ubat antiviral Paxlovid® telah dimulakan di fasiliti Kementerian Kesihatan Malaysia sejak 15 April 2022 bagi merawat pesakit COVID-19. Paxlovid® merupakan ubat antiviral oral pertama di Malaysia untuk merawat pesakit COVID-19 yang mengalami gejala ringan hingga sederhana ataupun Kategori 2 dan Kategori 3. Peluasan penggunaan rawatan ubat antiviral bagi fasiliti pengamal perubatan swasta pula telah dimulakan mulai 20 Jun 2022 bagi menambah akses rawatan kepada pesakit yang memenuhi kriteria.
2. Tiada pesakit daripada kategori 4 dan 5 diberikan rawatan antiviral ini memandangkan indikasi rawatan ini adalah bagi pesakit COVID-19 yang mempunyai tanda dan gejala ringan ke sederhana dalam tempoh 5 hari jangkitan bermula, untuk mencegah tahap keterukan pesakit

daripada meningkat daripada kategori 2 dan 3 ke kategori 4 dan 5 dan mengelakkan kemasukan ke hospital.

3. Sehingga 3 Julai 2022, seramai 4,001 orang pesakit COVID-19 daripada kategori 2 dan 3 telah diberi rawatan antiviral Paxlovid dan semua pesakit telah sembuh sepenuhnya. Tiada kematian disebabkan oleh jangkitan COVID-19 di kalangan pesakit yang diberikan rawatan Paxlovid mengikut indikasi yang ditetapkan oleh KKM.

4. Kementerian Kesihatan Malaysia akan terus mempertingkatkan akses penduduk kepada ubat-ubatan bagi tujuan rawatan dan pencegahan peningkatan tahap keterukan COVID- 19 di Malaysia. Ini juga bagi memastikan bilangan kemasukan ke hospital dan bilangan kematian akibat COVID- 19 berada pada tahap yang rendah dan terkawal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN M. KULASEGARAN
[IPOH BARAT]**

TARIKH : 25 JULAI 2022 (ISNIN)

SOALAN

TUAN M. KULASEGARAN [IPOH BARAT] minta **MENTERI
SUMBER MANUSIA**
menyatakan :-

- (a) jumlah pekerja yang bermanfaat berikutan dengan kenaikan gaji minimum; dan
- (b) berapa ramai majikan yang ingkar atau gagal patuhi perintah gaji minimum iaitu sebanyak RM1,500 dan apa tindakan telah dan akan diambil.

JAWAPAN

Tuan Yang di-Pertua,

Berdasarkan Laporan Survei Gaji Dan Upah 2020 yang diterbitkan oleh Jabatan Perangkaan Malaysia pada 14 Julai 2021, seramai 3.99 juta pekerja telah menerima manfaat kenaikan gaji minimum berikutan pelaksanaan Perintah Gaji Minimum 2020.

Bagi tempoh 1 Jun 2022 sehingga 30 Jun 2022, sebanyak 157 aduan terhadap majikan telah diterima berkaitan ketidakpatuhan majikan terhadap Perintah Gaji Minimum 2022. Hasil siasatan mendapati 118 majikan tidak mematuhi Perintah tersebut. Berikutan perintah ini berkuat kuasa pada 1 Mei 2022, JTKSM telah menasihatkan majikan untuk mematuhi perintah tersebut dan sekiranya gagal tindakan perundangan akan diambil. Buat masa ini masih belum ada kertas siasatan dibuka oleh JTKSM di bawah Perintah Gaji Minimum 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

TARIKH : 25 JULAI 2022 (ISNIN)

SOALAN

DATUK HAJI HASANUDDIN BIN MOHD YUNUS (HULU LANGAT)
minta **MENTERI DALAM NEGERI** menyatakan apakah Kerajaan akan memperkenalkan elaun khas kepada pemandu dan Unit Khas Jabatan Penjara Malaysia yang berdepan dengan risiko serta bebanan tugas yang semakin serius akibat pertambahan banduan.

JAWAPAN

Tuan Yang Di-pertua,

Untuk makluman Ahli Yang Berhormat, elaun khas bagi Pegawai Penjara yang menjalankan tugas sebagai Pemandu telah diluluskan sejak 2005 melalui pemberian Bayaran Insentif Pemandu Jabatan Penjara Malaysia dan ianya masih dimanfaatkan sehingga kini. Kadar bayaran insentif adalah bermula daripada RM50 hingga RM90 sebulan dan ianya berbeza mengikut gred jawatan pegawai tersebut.

Mengambil kira keperluan semasa, Jabatan Penjara Malaysia melalui Kementerian Dalam Negeri juga telah mengemukakan cadangan kenaikan kadar elaun memandu kepada pihak Jabatan Perkhidmatan Awam (JPA) dan kini ianya masih dalam penelitian dan pertimbangan Jabatan yang berkenaan.

Berhubung elaun khas bagi Unit Khas, Jabatan Penjara Malaysia juga telah mengemukakan permohonan untuk mendapatkan Bayaran Insentif Unit Trup Tindakan Cepat (TTC) pada tahun 2021 yang lepas. Namun, permohonan ini tidak mendapat kelulusan JPA.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN KARUPAIYA A/LMUTUSAMI (PADANG
SERAI)**

TARIKH : 25 JULAI 2022 (ISNIN)

SOALAN

TUAN KARUPAIYA A/L MUTUSAMI (PADANG SERAI) minta **MENTERI
DALAM NEGERI** menyatakan tindakan pihak Kementerian bagi rakyat yang
telah lahir di negara ini tetapi tidak mempunyai dokumentasi peribadi atau
dokumentasi tidak dapat dikesan atas sebab tertentu dan bagaimana pihak
Kementerian akan menyelesaikan masalah ini.

JAWAPAN

Tuan Yang Di Pertua,

Kementerian Dalam Negeri (KDN) melalui Jabatan Pendaftaran Negara (JPN) bertanggungjawab untuk mendaftarkan setiap kelahiran kanak-kanak yang dilahirkan di Malaysia samada bertaraf warganegara Malaysia atau bukan warganegara Malaysia berdasarkan Akta Pendaftaran Kelahiran dan Kematian 1957 (Akta 299) bagi Semenanjung Malaysia, Ordinan Pendaftaran kelahiran dan Kematian Sabah 1951 (CAP123) dan Ordinan Pendaftaran Kelahiran dan Kematian Sarawak 1951 (CAP 10). Oleh yang demikian, JPN tetap akan mendaftarkan mana-mana kelahiran yang berlaku di negara ini tanpa mengira status dokumen pengenalan diri pemohon selagi kelahiran tersebut dapat dibuktikan berlaku di Malaysia. Kegagalan untuk mengemukakan bukti dan dokumen berkaitan boleh menjejaskan proses pendaftaran dan menyebabkan dokumen kelahiran tidak boleh dikeluarkan.

Kementerian Dalam Negeri (KDN) melalui JPN sentiasa mengambil langkah proaktif dalam memastikan urusan pendaftaran dokumen pengenalan diri **individu yang berkecukupan** dapat dilaksanakan dengan mudah di seluruh negara termasuk di kawasan pedalaman dan luar bandar melalui inisiatif berterusan iaitu Program Menyemai Kasih Rakyat (MEKAR). Program MEKAR merangkumi Program Pendaftaran Bergerak (*Unit Mobile*) dan Bas MEKAR. Program MEKAR turut menyediakan pelbagai perkhidmatan termasuklah khidmat nasihat berkaitan pendaftaran Kad Pengenalan, Kelahiran dan Kematian.

Selain itu, JPN sentiasa mengkaji penambahbaikan dari semasa ke semasa yang boleh dilaksanakan bagi membantu memudahkan urusan pendaftaran dokumen pengenalan diri mengikut peraturan dan syarat-syarat yang telah ditetapkan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 25 JULAI 2022 (ISNIN)

SOALAN

PUAN HANNAH YEOH TSEOW SUAN minta **MENTERI KESIHATAN** menyatakan status terkini pemindahan pengurusan aplikasi MySejahtera antara Majlis Keselamatan Negara (MKN) dengan KKM dan sama ada perbincangan masih melibatkan pihak swasta dengan Kerajaan serta kos yang terlibat.

JAWAPAN

Tuan Yang di-Pertua,

1. MySejahtera merupakan aplikasi yang dibangunkan oleh Kerajaan Malaysia untuk membantu dalam pengawalan penularan wabak COVID-19 di Malaysia melalui penilaian kesihatan sendiri. Pada masa yang sama, aplikasi ini juga membantu Kementerian Kesihatan mendapatkan maklumat awal untuk mengambil tindakan yang cepat dan berkesan.
2. Jemaah Menteri pada 26 November 2021, telah memutuskan agar aplikasi MySejahtera dipindahkan daripada Majlis Keselamatan Negara (MKN) kepada Kementerian Kesihatan yang bertujuan memudahkan pengoperasian sistem, pemantauan dan pengesanan kontak dan memperkasa hebahan tentang kesihatan awam selari dengan

penguatkuasaan Akta Pencegahan dan Pengawalan Penyakit Berjangkit 1988 [Akta 342] dan Akta Perubatan 1971 [Akta 50].

3. Selain daripada keputusan agar Kementerian Kesihatan dilantik sebagai pemilik aplikasi MySejahtera, Mesyuarat Jemaah Menteri pada 26 November 2021 juga telah memutuskan supaya Kementerian Kesihatan perlu menubuhkan sebuah Jawatankuasa Rundingan Harga dengan keahlian daripada agensi berkaitan untuk melaksanakan rundingan harga perolehan dan pengurusan perkhidmatan aplikasi MySejahtera bagi tempoh 2 tahun dengan pihak syarikat selaras dengan tatacara perolehan Kerajaan.

4. Selaras dengan dengan keputusan Jemaah Menteri tersebut, Kementerian Kesihatan pada 27 Disember 2021 telah mengemukakan permohonan kepada Kementerian Kewangan untuk melaksanakan perolehan secara rundingan terus bagi Pengurusan Aplikasi MySejahtera.

Tuan Yang di-Pertua,

5. Kementerian Kewangan menerusi surat bertarikh 28 Februari 2022 telah meluluskan permohonan Kementerian Kesihatan tertakluk kepada syarat-syarat antara lain ialah:

- (i) KKM bersama agensi lain yang berkaitan menyemak semula kos sebenar Aplikasi MySejahtera dan merundingkan harga ke paras terendah yang menguntungkan Kerajaan harga;
- (ii) hasil rundingan harga hendaklah dikemukakan kepada MoF untuk dimuktamadkan; dan
- (iii) KKM perlu memastikan aplikasi dan data MySejahtera adalah milik Kerajaan Malaysia sepenuhnya.

6. Hasil rundingan ini telah dikemukakan kepada pihak Kementerian Kewangan untuk kelulusan selanjutnya pada 12 Julai 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 25 JULAI 2022 (ISNIN)

SOALAN

PUAN HAJAH FUZIAH BINTI SALLEH minta **MENTERI KESIHATAN** menyatakan :-

- (a) jumlah nilai ubat yang dipulangkan oleh pesakit kepada pihak Kementerian mengikut negeri bagi tempoh bermula Januari 2015 sehingga Jun 2022; dan
- (b) adakah Kementerian mempunyai anggaran terhadap jumlah nilai ubat yang tidak dimakan akan tetapi tidak juga dipulangkan.

JAWAPAN

Tuan Yang di-Pertua,

1. Kementerian Kesihatan Malaysia (KKM) sangat prihatin dalam memastikan alam sekitar tidak tercemar disebabkan pelupusan ubat-ubatan secara tidak terkawal oleh pesakit. Oleh yang demikian pesakit boleh memulangkan ubat-ubatan yang tidak digunakan atau berlebihan ke mana-mana fasiliti kesihatan yang terdekat agar pelupusan dapat dibuat dengan cara yang betul.
2. Berdasarkan kajian bertajuk *Assessing Individual Medication Adherence among Chronic Kidney Disease Patients: A Multi-centered*

Study yang dilaksanakan pada tahun 2019 di hospital KKM dan Hospital Canselor Tuanku Muhriz UKM (HCTM) menunjukkan kepatuhan pesakit kepada pengambilan ubat adalah sebanyak 82.3%. Namun, kajian ini hanya melibatkan pesakit kronik dan tidak memberikan gambaran keseluruhan pola kepatuhan pesakit terhadap pengambilan ubat-ubatan. Satu lagi kajian iaitu *National Survey on The Use of Medicines III* (NSUM III) yang telah dijalankan pada tahun 2015 pula menunjukkan 81.4 peratus masyarakat Malaysia mengetahui cara penggunaan ubat yang betul berbanding kajian NSUM II (2012) terdahulu iaitu 56.6 peratus. Hasil kajian ini secara umumnya menunjukkan terdapat peningkatan terhadap pengetahuan masyarakat berkenaan cara penggunaan ubat-ubatan yang betul melalui program-program pendidikan masyarakat yang telah dilaksanakan oleh KKM.

3. Untuk makluman, dalam tempoh 2017 sehingga 2021, anggaran kos ubat-ubatan yang dipulangkan adalah berjumlah RM 9.54 juta. Antara faktor pemulangan ubat oleh pesakit adalah pertukaran regimen ubat oleh doktor, lambakan ubat yang disimpan di rumah sehingga menyebabkan ubat luput, pesakit tidak patuh kepada rawatan atau pesakit telah meninggal dunia. Selain itu, ubat-ubatan yang dikenalpasti kerap dipulangkan oleh pesakit/waris adalah ubat yang digunakan untuk merawat penyakit-penyakit kronik seperti penyakit darah tinggi, kencing manis serta kolesterol tinggi. Walau bagaimanapun, pemulangan ubat oleh pesakit ini adalah penting bagi memastikan ubat-ubatan tersebut dilupuskan mengikut kaedah yang selamat dan ia tidak digunakan semula oleh pihak lain.

4. Sehubungan itu, bagi meningkatkan pematuhan pesakit kepada ubat-ubatan, KKM telah melaksanakan aktiviti khidmat nasihat pengambilan ubat yang betul semasa pendispensan serta penyampaian kaunseling kepada pesakit secara berterusan di semua fasiliti kesihatan KKM. Selain itu, KKM juga bertindak secara proaktif dengan mengambil inisiatif untuk mendidik rakyat Malaysia agar cakna dalam kepentingan mengambil ubat-ubatan. Beberapa inisiatif telah dilaksana bagi mengoptimumkan penggunaan ubat-ubatan oleh pesakit yang mendapatkan rawatan di fasiliti kesihatan KKM seperti berikut:

- (i) Menggalakkan pesakit membawa baki ubat sedia ada sewaktu mengambil ubat di farmasi. Ubat akan dibekalkan secara top-up daripada baki ubat pesakit sedia ada.
- (ii) Anggota farmasi yang bertugas disarankan untuk bertanya kepada pesakit sama ada masih mempunyai baki ubat pada setiap kali pembekalan ubat dibuat di kaunter. Ini berpandukan dokumen 'Tatacara Pendispensan' yang dijadikan sebagai rujukan anggota bertugas.
- (iii) Kebanyakan fasiliti KKM ada dilengkapi dengan sistem IT seperti Hospital Information System (HIS), Tele Primary Care (TPC) serta Pharmacy Information System (PhIS). Melalui sistem IT sebegini, anggota yang bertugas dapat memantau pembekalan stok ubat-ubat pesakit sehingga tarikh temujanji mereka yang seterusnya.
- (iv) Merujuk pesakit untuk sesi kaunseling bersama pegawai farmasi untuk meningkatkan kefahaman pesakit terhadap ubat-ubatan yang diterima dan juga bagi mengenalpasti punca pesakit mempunyai baki bekalan ubat yang banyak.
- (v) Melancarkan Kempen Kenali Ubat Anda sejak tahun 2007 dan kempen ini dilaksanakan secara berterusan sehingga kini. Matlamat utama kempen adalah bagi meningkatkan kefahaman dan kesedaran masyarakat Malaysia tentang kepentingan penggunaan ubat secara berkualiti;
- (vi) Melancarkan Program Duta Kenali Ubat Anda (Duta KUA) sejak pada tahun 2012. Program ini menggunakan kaedah pembimbing rakan sebaya (*peer education*) dan perubahan tingkah laku bagi memastikan informasi disalurkan dengan lebih berkesan. Melalui latihan yang berstruktur dan komprehensif, Duta Kenali Ubat Anda yang telah dilantik dalam kalangan masyarakat setempat akan lebih memahami dan boleh berkongsi maklumat asas berkenaan ubat-ubatan kepada masyarakat bersama-sama anggota farmasi.

- (vii) Mengadakan Program *Patient's Own Medication* (POMs) pada 2016 bagi pesakit yang dimasukkan wad diminta bawa ubat sedia ada dari rumah. Sekiranya pesakit memerlukan ubat yang sama semasa di wad, ubat pesakit sendiri akan diguna terlebih dahulu dan bekalan akan ditambah balik mengikut keperluan semasa discaj
 - (viii) Menghadkan bekalan ubat susulan pesakit untuk tempoh satu bulan. Polisi ini yang diperkenalkan pada tahun 2016 adalah bertujuan untuk membantu pihak KKM memantau sebarang kesan sampingan serta mengurangkan risiko berlakunya kesilapan penggunaan ubat (medication error) oleh orang selain pesakit yang sepatutnya.
5. Melalui inisiatif-inisiatif yang telah dilaksanakan ini, diharapkan penyebaran maklumat berkenaan ubat-ubatan dan isu kesihatan dapat menyumbang kepada perubahan tingkah laku dan pematuhan pengambilan ubat-ubatan dalam kalangan masyarakat seterusnya dapat mengurangkan jumlah pemulangan ubat-ubatan pada masa hadapan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 25 JULAI 2022 (ISNIN)

SOALAN

DATO' NGEH KOO HAM minta **MENTERI KESIHATAN** menyatakan sama ada Kementerian akan memansuhkan peraturan 361 (5) Peraturan-Peraturan Makanan 1985 kerana ia adalah di luar bidang / skop (ultra vires) Akta Makanan 1983.

JAWAPAN

Tuan Yang di-Pertua,

1. Peraturan 361(5), Peraturan-Peraturan Makanan 1985 menetapkan minuman beralkohol untuk jualan di mana-mana kedai runcit atau kaunter jualan hendaklah dipamerkan di kabinet atau rak pameran yang berasingan daripada kabinet atau rak pameran yang digunakan untuk makanan/minuman lain.
2. Tujuan peraturan ini dibuat adalah untuk mengelakkan kekeliruan pembeli dan melindungi penjualan minuman beralkohol kepada mana-mana orang di bawah umur 21 tahun.
3. Peraturan 361(5), Peraturan-Peraturan Makanan 1985 adalah berkaitan mengawal selia penjualan makanan dan ini termasuk dalam skop Akta Makanan 1983 iaitu bagi melindungi orang ramai terhadap bahayanya dari segi kesihatan dan penipuan pada penyediaan, penjualan

SOALAN NO. 90

dan penggunaan makanan, dan mengenai perkara yang bersampingan atau berkaitan dengannya.

4. Oleh yang demikian, Kementerian Kesihatan Malaysia mendapati bahawa tiada keperluan untuk memansuhkan peraturan 361 (5) Peraturan-Peraturan Makanan 1985 kerana **tidak bercanggah** dengan bidang / skop (ultra vires) Akta Makanan 1983.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN JUNE LEOW HSIAD HUI
[HULU SELANGOR]**

TARIKH : 25 JULAI 2022 (ISNIN)

SOALAN

YB PUAN JUNE LEOW HSIAD HUI [HULU SELANGOR] minta **MENTERI PERUMAHAN DAN KERAJAAN TEMPATAN** menyatakan apakah usaha khusus oleh pihak Kementerian dalam membantu golongan ibu tunggal untuk memiliki rumah pertama.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) menyediakan Program Perumahan Rakyat (PPR) dan Program Rumah Mesra Rakyat (RMR) yang dijual di antara RM35,000 hingga RM100,000 bagi golongan B40. Bagi golongan M40 pula, KPKT menyediakan Rumah Mampu Milik (RMM) dengan harga jualan RM300,000 dan ke bawah seperti Perumahan Penjawat Awam Malaysia (PPAM), program perumahan di bawah Perbadanan PR1MA Malaysia (PR1MA) dan Kediaman SPNB. KPKT sentiasa memberikan keutamaan kepada golongan ibu tunggal dalam mempertimbangkan permohonan terutamanya bagi pemilikan PPR.

Untuk makluman Ahli Yang Berhormat juga, masalah bagi mendapatkan pembiayaan perumahan merupakan isu utama dalam pemilikan rumah bagi golongan B40 dan M40 termasuklah golongan rentan seperti ibu tunggal. Perkara ini turut dibincangkan dalam Majlis Perumahan Mampu Milik Negara (MPMMN) yang telah diadakan pada 10 Februari 2022 dan dipengerusikan oleh YAB Perdana Menteri.

Antara cadangan yang telah diutarakan dalam mesyuarat tersebut adalah Inisiatif Pembiayaan Perumahan Malaysia (i-Biaya), Skim Rumah Pertamaku (SRP) di bawah Cagamas Berhad, Skim Jaminan Kredit Perumahan di bawah Syarikat Jaminan Kredit Perumahan Berhad (SJKP) dan Rent-to-Own (RTO) PR1MA dengan kerjasama institusi kewangan yang terpilih agar dapat memudahkan pembiayaan bagi memiliki rumah. i-Biaya telah dilancarkan pada 14 April 2022. SJKP dan SRP menyediakan jaminan kepada pembeli rumah pertama dalam kalangan B40 dan M40 termasuklah golongan ibu tunggal, kumpulan industri ekonomi gig, kumpulan berpendapatan rendah dan sektor SME.

Selain itu, Program Pemilikan Rumah atau *Home Ownership Programme* (HOPE) dan Karnival Jom Beli Rumah juga telah dilancarkan pada 15 Julai 2022 bertujuan untuk meningkatkan pemilikan rumah dalam kalangan rakyat B40 dan M40 termasuk ibu tunggal.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMABELAS
PARLIMEN KEEMPAT BELAS**

PERTANYAAN : LISAN

**DARIPADA : TUAN NOOR AMIN BIN AHMAD
[KANGAR]**

TARIKH : 25 JULAI 2022 (ISNIN)

SOALAN

minta **MENTERI PERPADUAN NEGARA** menyatakan berapa permohonan projek penyelenggaraan rumah-rumah ibadat selain Islam di negeri Perlis, khususnya di Kangar, yang telah dilaksanakan mengikut tahun dari tahun 2018 sehingga kini.

JAWAPAN:

Tuan Yang Di-Pertua,

1. Kerajaan telah memperuntukkan Geran Kewangan untuk Rumah Ibadat Selain Islam sebanyak RM50 juta dalam belanjawan tahun 2021 dan 2022 bagi kerja-kerja pembaikan, penyelenggaraan dan pembangunan kecil rumah ibadat selain Islam seperti berikut:

Tahun	Peruntukan (RM)
2021	50,000,000.00
2022	50,000,000.00

2. Permohonan dan pelaksanaan projek penyelenggaraan rumah ibadat selain Islam di negeri Perlis dan Kangar adalah seperti berikut:

Permohonan dan Kelulusan Tahun 2021

Bil	Tahun	Negeri	Daerah	Bil Permohonan	Jumlah Permohonan (RM)	Bil Rumah Ibadat Diluluskan	Jumlah Kelulusan (RM)
1	2021	Perlis	Kangar	6	385,910.00	3	143,800.00
			Arau	3	113,350.00	-	-
			Kuala Perlis	1	64,880.00	-	-
JUMLAH				10	564,140.00	3	143,800.00

Permohonan dan Kelulusan Tahun 2022 (sehingga Julai 2022)

Bil	Tahun	Negeri	Daerah	Bil Permohonan	Jumlah Permohonan (RM)	Bil Rumah Ibadat Diluluskan	Jumlah Kelulusan (RM)
2	2022	Perlis	Kangar	3	365,000.00	2	85,000.00
			Arau	-	-	1	50,000.00
			Kuala Perlis	1	88,567.50	1	49,000.00
JUMLAH				4	453,567.50	4	184,000.00

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : DATUK SERI PANGLIMA BUNG MOKTAR BIN RADIN [KINABATANGAN]
TARIKH : 25.07.2022 (ISNIN)

SOALAN

DATUK SERI PANGLIMA BUNG MOKTAR BIN RADIN [KINABATANGAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah mekanisme yang akan diguna pakai oleh pihak Kementerian dalam memastikan minyak masak bersubsidi satu (1) kilogram polibag yang sepatutnya untuk kegunaan domestik, isi rumah ini dapat dimanfaatkan oleh golongan sasar dan tidak diseleweng, disorok atau disalah guna oleh peniaga yang tidak bertanggungjawab.

JAWAPAN

Tuan Yang di-Pertua,

Kerajaan menzahirkan komitmen tinggi dalam usaha membendung sebarang penyelewangan atau kepincangan berhubung barangan keperluan bersubsidi negara terutama minyak masak. Justeru, Kementerian telah mengambil tindakan-tindakan seperti berikut:

- i. Mengarahkan pemeriksaan dan pengauditan di setiap peringkat rangkaian pengedaran minyak masak melalui aktiviti semakan *Pre-Delivery Plan*;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;

- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM); dan
- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga.

Tuan Yang di-Pertua,

Bermula 23 Jun 2022 Penguat Kuasa KPDNHEP telah melaksanakan Pemeriksaan Ops ATM melibatkan barang kawalan seperti ayam, telur dan minyak masak secara harian di setiap peringkat rantai pembekalan dan pengedaran. Tujuannya adalah untuk memastikan keberadaan bekalan adalah stabil dan tiada isu berkaitan kegiatan sorok barang kawalan dan keperluan harian di pasaran selaras dengan Kempen Anti Sorok yang dilancarkan pada awal tahun ini. Ops ATM ini juga bertujuan memastikan harga yang dijual bermula 1 Julai 2022 tidak terlalu tinggi sehingga menyebabkan kegusaran kepada masyarakat dan bagi mengekang peniaga yang tidak beretika daripada mengambil keuntungan secara tidak munasabah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN STEVEN CHOONG SHIAU YOON

TARIKH : 25 JULAI 2022 (ISNIN)

SOALAN

TUAN STEVEN CHOONG SHIAU YOON (TEBRAU) minta **MENTERI DALAM NEGERI** menyatakan langkah yang akan diambil oleh Kerajaan Persekutuan untuk menaik-tarafkan CIQ Sultan Iskandar yang sudah uzur memerlukan sistem software dan hardware baru.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Imigresen Malaysia (JIM) telah mengambil langkah inisiatif untuk meningkatkan mutu perkhidmatan di CIQ Bangunan Sultan Iskandar (BSI) bagi memastikan kelancaran di pintu masuk.

Antara langkah inisiatif yang telah diambil bagi meningkatkan mutu perkhidmatan di CIQ BSI adalah seperti berikut:

- i. Penambahan bilangan kaunter Sistem E-Gate (Autogate) Warga Asing dari 6 kaunter kepada 12 kaunter. Tambahan 20 unit E-Gate lagi akan dilaksanakan pada bulan Mei Tahun 2023 dan akan menjadikan jumlah keseluruhan E-Gate adalah sebanyak 32 unit;
- ii. Penggantian 26 unit Kaunter Sistem E-Gate Warganegara sedia ada kepada teknologi Facial Recognition pada bulan Mac tahun 2023;
- iii. Penggantian komputer sebanyak 300 unit di semua kaunter imigresen di BSI dan menaik taraf Sistem Kawalan Imigresen kepada Sistem Transformasi Web Kawalan Imigresen yang lebih canggih; dan
- iv. Projek pembinaan MBIKE sebanyak 100 laluan di BSI dan 50 laluan di Kompleks Sultan Abu Bakar (KSAB) yang dijangka siap pada tahun 2024;

Selain itu, Kementerian Dalam Negeri (KDN) sedang melaksanakan Projek Sistem Imigresen Bersepadu Nasional (NIISe) bagi membangunkan sebuah sistem keimigresenan baharu yang lebih komprehensif, *sophisticated*, berteknologi tinggi, bersepadu, mesra pengguna dan berupaya memenuhi

keperluan keimigresenan semasa selari dengan perkembangan teknologi terkini bagi menggantikan sistem sedia ada di Jabatan Imigresen Malaysia (JIM) iaitu Sistem myIMMs yang telah beroperasi lebih daripada 20 tahun.

Projek NIISe kini memasuki bulan ke-17 pelaksanaannya melalui pengoptimuman penggunaan teknologi terkini dan pendigitalan dalam penyampaian kemudahan keimigresenan secara *end to end services*. NIISe dijangka akan beroperasi sepenuhnya di 264 Pejabat Cawangan Imigresen dalam dan luar negara termasuk CIQ BSI menjelang tahun 2024 yang dapat memodenkan penyampaian kemudahan keimigresenan kepada pengguna melalui penggunaan teknologi terkini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QUI [KLUANG]

TARIKH : 25.07.2022 (ISNIN)

SOALAN

PUAN WONG SHU QUI [KLUANG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan Kerajaan untuk melaksanakan skim subsidi petrol bersasar.

JAWAPAN

Tuan Yang di-Pertua,

Kementerian Perdagangan Dalam Negeri dan Hal Ehwal Pengguna (KPDNHEP) bersedia melaksanakan skim subsidi petrol bersasar sekiranya perkara tersebut diputuskan oleh Kerajaan. Perkara ini sedang dalam penelitian Kementerian Kewangan bagi mengenal pasti mekanisme terbaik pemberian subsidi petrol secara bersasar di seluruh negara.

Selain itu, antara perkara yang akan diambil kira oleh Kerajaan dalam penetapan skim subsidi petrol bersasar adalah kesan kenaikan harga barangan dan impak kepada pengguna sekiranya skim subsidi petrol diperkenalkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 25.07.2022 (ISNIN)

SOALAN

TUAN FONG KUI LUN [BUKIT BINTANG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah rasional Kerajaan bertindak menghapuskan subsidi beberapa barangan makanan asas sedangkan negara sedang bergelut dengan kenaikan kadar inflasi dan ekonomi yang merosot serta apakah langkah Kerajaan untuk menampung kesan teruk yang dialami rakyat.

JAWAPAN

Tuan Yang di-Pertua,

Kerajaan amat prihatin terhadap situasi rakyat pada masa ini yang terkesan dengan kenaikan kadar inflasi dan ekonomi yang merosot. Oleh itu, Kerajaan telah membuat keputusan untuk tidak menghapuskan subsidi barangan makanan asas seperti minyak masak dan ayam.

Bagi rasionalisasi menamatkan pemberian subsidi minyak masak dalam botol 1kg, 2kg, 3kg dan 5kg, sebagaimana telah diumumkan oleh YAB Perdana Menteri, subsidi minyak masak dalam botol tidak diteruskan atas sebab berikut :

- a. Subsidi minyak masak dalam botol adalah langkah sementara yang ditetapkan oleh Kerajaan bagi menangani kenaikan harga minyak masak dalam botol semasa krisis pandemik covid-19. Perubahan negara ke fasa endemik membolehkan subsidi ini dihentikan pada masa yang sama meneruskan Program Skim Penstabilan Harga Minyak Masak (COSS) iaitu pemberian subsidi minyak masak dalam polibeg 1kg.
- b. Penamatan pemberian subsidi minyak masak dalam botol akan mengurangkan ketirisan penggunaan minyak masak oleh peniaga-peniaga (bukan kumpulan sasar) dan memastikan kewangan yang mencukupi untuk menampung keperluan subsidi minyak masak dalam polibeg 1kg.

Sebagai langkah untuk mengurangkan kesan kenaikan kadar inflasi kepada rakyat, berikut langkah-langkah yang diambil oleh Kerajaan :

- c. Memastikan bekalan makanan sentiasa mencukupi agar ianya tidak memberikan kesan kenaikan harga diperingkat pembekalan (*supply side*). Oleh itu, kuasa yang diperuntukkan kepada Menteri di bawah Akta Kawalan Bekalan 1961 digunakan secara berhemah untuk memastikan bekalan ini terjamin.

- d. Menggerakkan semua agensi-agensi Kerajaan untuk membantu mengurangkan kesan kenaikan kadar inflasi melalui Majlis Tindakan Sara Hidup Negara (NACCOL) melalui pelbagai inisiatif kepada rakyat.
- e. Memastikan subsidi kepada barangan makanan asas diteruskan selama mana harga-harga barangan ini masih lagi tinggi. Namun ianya hendaklah dilaksanakan dengan berhemah dan tidak menjejaskan kedudukan fiskal negara.
- f. Memperbaiki dan mengubah mekanisme pemberian subsidi secara berperingkat kepada pemberian subsidi yang lebih bersasar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 25.07.2022 (ISNIN)

SOALAN

Tuan Su Keong Siong [Kampar] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan punca kenaikan harga barangan makanan yang mendadak. Apa perancangan Kerajaan untuk mengawal dan/atau membendung kenaikan harga barang makanan asas yang sedang meningkat secara drastik dan membebankan rakyat.

JAWAPAN

Tuan Yang di-Pertua,

Untuk makluman Ahli Yang Berhormat, isu inflasi yang dihadapi oleh Malaysia adalah bersifat global yang disebabkan oleh gangguan berpunca daripada pandemik COVID-19. Ini menyebabkan pelbagai komoditi utama dunia seperti jagung, soya, gandum dan gula meningkat harganya selain kos perkapalan yang turut meningkat mendadak. Keadaan itu menjadi lebih teruk terutamanya pada permulaan perang Rusia – Ukraine.

Mengambil kira semangat Keluarga Malaysia, antara langkah jangka pendek dan jangka panjang yang diambil bagi mengurangkan kesan

kenaikan harga barangan adalah seperti berikut:

- i. RM1.1 bilion diperuntukkan kepada subsidi ayam dan telur bagi menstabilkan harga kedua-dua produk ini;
- ii. Kerajaan juga dijangka membelanjakan subsidi minyak masak polibeg 1 kg sehingga RM4 bilion pada tahun ini. Jumlah ini naik secara mendadak berbanding keperluan pada tahun 2020 dan 2021;
- iii. Bagi memastikan keberadaan bekalan minyak masak di pasaran serta minyak masak bersubsidi 1 kg ini dinikmati oleh pihak yang sepatutnya, KPDNHEP melaksanakan penguatkuasaan serta operasi membanteras penyeludupan dengan menggerakkan lebih kurang 2,200 anggota penguatkuasa seluruh negara;
- iv. Kerajaan juga terus mengekalkan harga RON95 sekaligus menyebabkan Kerajaan menanggung perbelanjaan yang besar bagi membantu rakyat. Dengan tidak menaikkan harga RON95 ia telah memberi ruang supaya harga barangan dan perkhidmatan kekal stabil; dan
- v. Bagi membolehkan rakyat mendapat akses untuk membeli barangan pada harga berpatutan, Kerajaan meneruskan Program Jualan Keluarga Malaysia (PJKM) dengan peruntukan sebanyak RM100 juta melibatkan 222 kawasan Parlimen terlibat tanpa mengira status kawasan Parlimen tersebut.

Benar, kita tidak dapat menghalang kenaikan kerana ia adalah disebabkan faktor inflasi global. Namun, impaknya dikurangkan dengan strategi-strategi yang telah dirangka oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 25.07.2022 (ISNIN)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI PERDAGANGAN DALAM NEGERI DAN HAL EHWAL** menyatakan mengapa Kerajaan masih belum peroleh cadangan dan rangka strategi bagi mengatasi masalah kos sara hidup negara walaupun sudah ada MPN dan NCOOL dan apa jaminan yang task force khas Jihad Tangani Inflasi boleh menghasilkan strategi sedangkan ahlinya sebahagian besar adalah orang yang sama dalam MPN dan NCOOL.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah dan sedang melaksanakan beberapa strategi bagi menangani isu kenaikan harga barangan. Walau bagaimanapun, suka dinyatakan bahawa isu ini bersifat global yang turut melanda beberapa negara lain di seluruh dunia. Ia disebabkan oleh gangguan rantai bekalan kesan pasca pandemik COVID-19 menyebabkan pelbagai komoditi utama dunia seperti jagung, soya, gandum dan gula meningkat harganya selain kos perkapalan yang turut meningkat mendadak selain perang Rusia – Ukraine.

Antara langkah jangka pendek dan jangka panjang yang diambil bagi mengurangkan kesan kenaikan harga barangan adalah seperti berikut:

- i. RM1.1 bilion diperuntukkan kepada subsidi ayam dan telur bagi

menstabilkan harga kedua-dua produk ini;

- ii. Kerajaan juga dijangka membelanjakan subsidi minyak masak polibeg 1 kg sehingga RM4 bilion pada tahun ini. Jumlah ini naik secara mendadak berbanding keperluan pada tahun 2020 dan 2021;
- iii. Bagi memastikan keberadaan bekalan minyak masak di pasaran serta minyak masak bersubsidi 1 kg ini dinikmati oleh pihak yang sepatutnya, KPDNHEP melaksanakan penguatkuasaan serta operasi membanteras penyeludupan dengan menggerakkan lebih kurang 2,200 anggota penguatkuasa seluruh negara;
- iv. Kerajaan juga terus mengekalkan harga RON95 sekaligus menyebabkan Kerajaan menanggung perbelanjaan yang besar bagi membantu rakyat. Dengan tidak menaikkan harga RON95 ia telah memberi ruang supaya harga barangan dan perkhidmatan kekal stabil; dan
- v. Bagi membolehkan rakyat mendapat akses untuk membeli barangan pada harga berpatutan, Kerajaan meneruskan Program Jualan Keluarga Malaysia (PJKM) dengan peruntukan sebanyak RM100 juta melibatkan 222 kawasan Parlimen terlibat tanpa mengira status kawasan Parlimen tersebut.

Untuk makluman Ahli Yang Berhormat, penubuhan NACCOL yang dipengerusikan sendiri oleh YAB Perdana Menteri bukan sahaja melihat harga barang, malah ia juga melihat perkara berkaitan dasar. Manakala, Pasukan Khas Jihad Tangani Inflasi bertindak sebagai penyelaras kepada beberapa Kementerian lain selain melapor bagi diambil tindakan secara bersama-sama. Pelantikan Pengerusi Pasukan tersebut adalah di bawah bidang kuasa YAB Perdana Menteri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 25 JULAI 2022 (ISNIN)

SOALAN

TUAN LOKE SIEW FOOK [SEREMBAN] minta **MENTERI PENGANGKUTAN** jumlah kos keseluruhan yang perlu ditanggung oleh Kerajaan secara terperinci termasuk kos faedah pinjaman untuk projek East Coast Rail Link (ECRL) apabila projek tersebut siap kelak.

JAWAPAN

Tuan Yang di-Pertua,

1. Kos pembinaan keseluruhan bagi projek East Coast Rail Link (ECRL) 3.0 seperti yang telah diumumkan oleh Kerajaan adalah sebanyak RM50.27 bilion berbanding kos sebelumnya (ECRL 2.0) iaitu sebanyak RM47.37 bilion. Walaupun sering dicanang bahawa kos ECRL 2.0 adalah sebanyak RM44 bilion, namun terdapat peruntukan kos lain iaitu RM2.379 bilion bagi sebarang pertambahan kuantiti (*viaduct*, terowong dan jambatan) serta kos pembatalan ECRL 1.0 berjumlah RM1 bilion, menjadikan kos keseluruhan ECRL 2.0 adalah RM47.37 bilion.
2. Bagi ECRL 3.0, 75% daripada kos pembinaan berjumlah RM50.27 bilion akan dibiayai oleh pinjaman daripada The Export-Import Bank of China (China EXIM Bank) manakala bakinya akan dibiayai oleh program sukuk yang akan diterbitkan oleh MRL. Kadar faedah pinjaman yang dikenakan oleh China Exim Bank adalah tidak berubah iaitu pada kadar 3.25% setahun manakala moratorium diberikan sehingga tahun 2027.

3. Dengan kos RM47.37 bilion, ECRL 2.0 dirancang untuk melalui Jajaran Selatan bermula dari Temerloh, Pahang ke Kuala Klawang dan Nilai di Negeri Sembilan, kemudian melalui Putrajaya sebelum merentasi Pulau Carey di Selangor untuk sampai ke Pelabuhan Westports di Port Klang. Jajaran ini mempunyai beberapa kelemahan dari segi ketersambungan dengan jajaran keretapi yang sedia ada dan ketersambungan hanya ke satu Pelabuhan di Port Klang iaitu Westports.
4. Jika ECRL 2.0 disiapkan melalui Jajaran Selatan ini, pihak Kerajaan masih perlu menyiapkan Projek Serendah Bypass untuk KTMB menyelesaikan isu kesesakan dan keselamatan perkhidmatannya. Kos pembangunan Projek Serendah Bypass ini dianggarkan mencecah RM6 bilion termasuk kos pengambilan tanah. Jika Kerajaan menyiapkan ECRL 2.0 dan Serendah Bypass secara berasingan, kos yang bakal ditanggung Kerajaan mencecah RM53.479 bilion tidak termasuk kos pembiayaan.
5. Jika dibandingkan, ECRL 3.0 menggunakan Jajaran Asal ECRL 1.0 yang melalui sebelah utara Lembah Klang dari Temerloh ke Bentong, Pahang kemudian melalui Gombak dan Serendah di Selangor sebelum sampai ke stesen Jalan Kastam di Pelabuhan Klang dan seterusnya akan dihubungkan dengan kedua-dua Pelabuhan Northport dan Westports di Port Klang. Ketersambungan ini akan diwujudkan kerana ECRL 3.0 akan menyiapkan *Serendah Bypass* di seksyen di antara Serendah ke Jalan Kastam dengan dua landasan tolok meter dan landasan tolok standard setiap satu. ECRL 3.0 akan menyiapkan dua projek untuk Kerajaan dalam satu pelaksanaan sekaligus secepat mungkin.
6. Jajaran ECRL 3.0 ini akan mewujudkan ketersambungan yang lebih baik diantara ECRL dan KTMB di stesen Serendah, Jalan Kastam dan terminal keretapi di Northport dan Westports bagi perkhidmatan kargo. Hubungan langsung ke dalam dermaga Northport dan Westports amat penting bagi menjayakan perancangan mewujudkan *landbridge* di antara Pelabuhan Kuantan dan Port Klang. Kewujudan *landbridge* ini akan meningkatkan kegiatan *transshipment* di Pelabuhan Kuantan dan Port Klang selain meningkatkan daya saing kawasan-kawasan industri di sepanjang *landbridge* ECRL untuk kegiatan perkilangan *value-added*.
7. Kelebihan ECRL 3.0 dari aspek logistik ini dicapai tanpa mengurangkan tawaran servis keretapi kepada penumpang di mana transit bagi pengguna ECRL adalah di projek yang sedang dibangunkan

kini iaitu Integrated Transport Terminal (ITT) Gombak, Selangor. Ketersambungan ECRL dengan ITT Gombak akan membolehkan penumpang dari negeri-negeri Pantai Timur untuk terhubung terus kepada beberapa rangkaian rel dan perkhidmatan bas. ITT Gombak ini bakal menyediakan ketersambungan kepada LRT terus ke KL Sentral (akses ke laluan MRT 2 dan ERL terus ke KLIA) serta perkhidmatan bas henti-henti/ekspres.

8. Oleh itu, walaupun kos ECRL 3.0 kelihatan lebih tinggi daripada ECRL 2.0, hakikatnya ialah ECRL 3.0 menyelesaikan dua projek sekaligus dengan kos lebih rendah kepada Kerajaan. Malahan pula, ECRL 3.0 akan mempunyai ketersambungan yang lebih baik bagi mencapai objektif Kerajaan dan Kementerian Pengangkutan untuk menaiktaraf sistem pengangkutan rel negara, mewujudkan *landbridge* di antara Timur dan Barat Semenanjung Malaysia dan seterusnya memangkin pertumbuhan ekonomi dan pembangunan di sepanjang jajaran ECRL.

9. Walaubagaimanapun, kos pembinaan ECRL 3.0 tetap memberikan *value for money* di mana ia meningkatkan ketersambungan rel kargo ke hub kargo aktif melalui pembinaan Serendah *Bypass*. Ketersambungan ini meningkatkan daya tarikan untuk pemindahan mod dari jalan raya ke rel, meningkatkan kapasiti kargo bagi jaringan rel sedia ada serta menyelesaikan isu laluan kargo dari/ke utara (Serendah Bypass). Faktor-faktor ini bakal menyumbang kepada aktiviti pengangkutan rel kargo yang lebih aktif di sepanjang jaringan keretapi Pantai Barat dan Pantai Timur, seterusnya meningkatkan pergerakan kargo melalui rel di seluruh negara yang kini hanya sekitar 5% sahaja.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN CHANG LIH KANG (TANJONG MALIM)

TARIKH : 25 JULAI 2022 (ISNIN)

SOALAN

TUAN CHANG LIH KANG (TANJONG MALIM) minta **MENTERI DALAM NEGERI** menyatakan langkah-langkah yang diambil oleh Kerajaan untuk mencegah anak-anak muda kita daripada terperdaya oleh sindiket dalam kes-kes penipuan kerja di Myanmar, Cambodia atau Laos.

JAWAPAN

Tuan Yang Di Pertua,

Pelbagai usaha telah diambil oleh pihak PDRM bagi membendung isu ini. Antaranya adalah:

- i. Menubuhkan Pasukan Petugas Khas untuk menangani isu ini;
- ii. Menjalinkan kerjasama dengan ASEANAPOL, INTERPOL, Kementerian Luar Negeri dan pihak berkuasa tempatan bagi mengesan warganegara Malaysia di negara-negara terbabit untuk dibawa pulang; dan
- iii. Menjalankan kempen kesedaran terhadap sindiket tawaran kerja palsu di luar negara ini melalui platform media sosial. Usaha ini akan diperluaskan dan dipergiatkan lagi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN SIM TZE TZIN (BAYAN BARU)

TARIKH : 25 JULAI 2022 (ISNIN)

SOALAN

TUAN SIM TZE TZIN (BAYAN BARU) minta **MENTERI DALAM NEGERI** menyatakan jumlah mangsa scam pekerjaan yang tertipu bekerja secara haram di Myanmar, Thailand dan Cambodia. Apakah tindakan pihak berkuasa untuk menghalang sindiket ini daripada terus memperbodohkan rakyat Malaysia.

JAWAPAN

Tuan Yang Di Pertua,

Pihak Polis Di Raja Malaysia (PDRM) telah menerima sebanyak 161 laporan polis yang telah dibuat oleh mangsa dan ahli keluarga. Daripada jumlah ini, pihak PDRM telah mengenalpasti seramai 194 orang warganegara Malaysia dipercayai telah menjadi mangsa sindiket penipuan kerja di luar negara. Dengan kerjasama ASEANAPOL, INTERPOL, Kementerian Luar Negeri dan pihak berkuasa tempatan, seramai 54 orang telah berjaya diselamatkan. Manakala 140 orang masih lagi dalam tindakan untuk mengesan mangsa oleh pihak berkuasa tempatan.

Pelbagai usaha telah diambil oleh pihak PDRM bagi membendung isu ini. Antaranya adalah;

- i. Pihak PDRM telah menubuhkan Pasukan Petugas Khas untuk menangani isu ini.
- ii. Kerjasama dengan ASEANAPOL, INTERPOL, Kementerian Luar Negeri dan pihak berkuasa tempatan sedang giat dijalankan bagi mengesan warganegara Malaysia di negara-negara terbabit dan dibawa pulang.
- iii. PDRM telah mula menjalankan kempen kesedaran terhadap sindiket tawaran kerja palsu di luar negara ini melalui platform media sosial. Usaha ini akan diperluaskan dan dipergiatkan lagi.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 19 JULAI 2022 (SELASA)

SOALAN

DR. KELVIN YII LEE WUEN minta **MENTERI KESIHATAN** menyatakan perancangan Kementerian sama ada akan memperkenalkan satu skim insurans kesihatan atau apa-apa jenis inisiatif untuk membiayai kos kesihatan yang semakin tinggi setiap tahun.

JAWAPAN

Tuan Yang di-Pertua,

1. Menurut data daripada *Malaysia National Health Accounts* yang dikeluarkan pada 2021 oleh Kementerian Kesihatan Malaysia, Kerajaan telah membelanjakan sebanyak RM36.6 bilion pada tahun 2020 berbanding hanya RM12.6 bilion pada tahun 2006 bagi tujuan pembiayaan penjagaan kesihatan kepada rakyat. Ini adalah satu peningkatan yang ketara iaitu sebanyak 190% dalam tempoh 14 tahun. Sementara itu, kutipan hasil Kerajaan yang dikenakan ke atas pesakit hanyalah sekitar 1% daripada jumlah yang dibelanjakan.

2. Kutipan hasil yang rendah ini adalah kerana pada masa ini Kerajaan hanya mengenakan caj rawatan pesakit luar sebanyak RM1 atau RM5 kepada warga negara mengikut Perintah Fi (Perubatan) 1982.

3. Kerajaan sedar bahawa model pembiayaan kesihatan awam sedia ada tidak mampan dan akan memberikan tekanan kepada beban kewangan Kerajaan. Sehubungan itu, Kerajaan sedang mengkaji pelbagai opsyen pembiayaan kesihatan yang kalis masa hadapan bagi mengukuhkan sistem kesihatan negara secara menyeluruh, agar perkhidmatan kesihatan lebih saksama (*equitable*), berkualiti tinggi, mudah diakses dengan kos berpatutan dan mampan untuk jangka masa panjang. Perkara-perkara ini akan dimasukkan dalam Kertas Putih Kesihatan yang akan dibentangkan pada hujung tahun ini.

4. Kerajaan memberikan jaminan, dalam pelaksanaan apa juga sistem pembiayaan kesihatan kepada rakyat, Kerajaan akan menggunakan pendekatan '*whole-of-government*' dan '*whole-of-society*' bagi memastikan kepentingan kesihatan rakyat terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 25.07.2022 (ISNIN)

SOALAN

TUAN LIM GUAN ENG [BAGAN] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sebab kenapa beliau tidak memimpin Jawatankuasa Khas Jihad Inflasi demi mencerminkan komitmen tertinggi Kerajaan dan keseriusan untuk menyelesaikan masalah utama rakyat Malaysia, apakah kejayaan untuk menurunkan harga barangan dan adakah perbincangannya seperti perbincangan Majlis Pemulihan Negara yang tidak ada sebarang tindakan susulan.

JAWAPAN

Tuan Yang di-Pertua,

Untuk makluman Ahli Yang Berhormat, YAB Perdana Menteri sendiri telah mempengerusikan Mesyuarat Majlis Tindakan Sara Hidup Negara (NACCOL) yang mana jika sebelum ini Mesyuarat tersebut berlangsung dua (2) kali setahun, kini mesyuarat tersebut telah berlangsung dengan kekerapan dua (2) bulan sekali. Apabila YAB Perdana Menteri sendiri mempengerusikan Mesyuarat ini, perkara yang dilihat bukan sahaja melibatkan harga barang malah ia juga melibatkan dasar.

Berhubung dengan Pasukan Khas Jihad Tangani Inflasi, pelantikan pengerusi pasukan tersebut merupakan bidnag kuasa bawah YAB Perdana Menteri. Untuk makluman, Pasukan ini melihat kepada isu semasa terkini dan bersifat isu harian. Pasukan ini juga bertindak sebagai penyelaras kepada beberapa Kementerian lain seperti KPDNHEP, MAFI dan beberapa Kementerian lain dan melaporkan bagi tindakan diambil secara bersama-sama.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN OSCAR LING CHAI YEW
[SIBU]**

TARIKH : 25 JULAI 2022 (ISNIN)

SOALAN

TUAN OSCAR LING CHAI YEW minta **MENTERI KESIHATAN** menyatakan sama ada siasatan dapat dibuka kepada kes kematian Cikgu Ting Poh Seng, yang disyaki bunuh diri akibat tekanan kerja daripada pihak sekolah. Adakah kes itu berpunca akibat sistem pendidikan kita yang merosot dan yang terlalu menekankan indeks KPI.

JAWAPAN

Tuan Yang di-Pertua,

1. Siasatan kes kematian Cikgu Ting Poh Seng dilaksanakan oleh pihak Polis Diraja Malaysia (PDRM) bagi menentukan sama ada kes ini adalah kes bunuh diri atau kejadian bunuh atau melibatkan kejadian jenayah.
2. Dalam hal ini, pihak PDRM telah menjalankan siasatan berkait laporan polis LTBG Miri rpt 1411/22 di bawah laporan mati mengejut (SDR- *Sudden Death Report*). Kematian Ting Poh Seng adalah berpunca daripada "*Suspected toxic effect from ingested substance*" dan siasatan bagi kes tersebut masih diteruskan.

3. Untuk makluman Ahli Yang Berhormat, selain daripada pelbagai tekanan hidup termasuklah tekanan di tempat kerja, terdapat pelbagai faktor yang menyebabkan seseorang mengambil keputusan membunuh diri. Antaranya adalah pelbagai masalah psikososial seperti masalah kewangan / kemiskinan, masalah rumahtangga, kurang sokongan keluarga dan masyarakat dan pelbagai faktor lain yang menyebabkan seseorang yang menghadapi masalah mengambil jalan singkat menamatkan riwayat hidup sendiri.

4. Setiap individu dan masyarakat Malaysia diseru agar bersifat prihatin dan mengambil berat keadaan ahli keluarga masing-masing, jiran-jiran tetangga dan rakan sekerja serta saling membantu di antara satu sama lain.

5. Sekiranya ada individu-individu yang dikenal pasti mempunyai symptom-symptom seperti kemurungan, *anxiety* (kerisauan melampau), tingkah laku yang abnormal / agresif, bercakap seorang diri dan sebagainya dinasihatkan agar membawa ahli keluarga masing-masing mendapatkan saringan di klinik kesihatan dan mana-mana fasiliti kesihatan terdekat.

6. Masyarakat juga boleh menghubungi pusat kesihatan mental masyarakat (MENTARI) dan mendapatkan janji temu terdekat dengan kadar segera bagi mendapatkan rawatan atau konsultasi tanpa surat rujukan.

Sekian, terima kasih.